

ማቶሴ ፩ዱ ኑ ጎዳ ዩሱስ ኪርስቶስ ሚሺራቾ ቃላ ጊዶ ቆፋ

ማቶሳ ሚሺራቾ ቃላይ፣ ዩሱስ ኪርስቶሱ ቡርፔ ያናይሳ ሲንሳሲዲ ኢዛ ጊሽ የቴቲዳ ዴሬ አሻናዴይ ኢዛ ጊዲዳይሳኔ ያሲ ካሴ ጋለሳ ጨቆ ማፃፋን ባ ዴሬዛስ ኢሚዳ ሂደታ ቃላ ኩንሉዳይ ኢዛ ባጋራ ጊዲዳይሳ የቴዛ ሚሺራቾ ቃላራ ዴስ። ሄሲካ ሄ ሚሺራቾ ቃላይ፣ ዩሱስ ኪርስቶሱ ኢስታ ጊደን ዩሉቴ ዲጨዳ ኣይሁዳ ኣሳስ ፃላላ ጊደንታ ኣላሜ ኣሳስ ኩሜሳሳ።

ማቶሳ ሚሺራቾ ቃላይ፣ ዳርፔ ናጌቴላን ጊጌቴዳ ማፃፋ። ማፃፋዚ ኮይርፔ ዩሱሳስ ዩሉቴላ ጊሽ የቶ ዶሚዲ ኢዛ ዪንቃቴ ጊሺኔ ኢዚ ፓጨቴዳ ፓጨዛ ሎዔሉ የቴዳፔ ጉዬ ኢዚ ጋለላ ዴሬን ሳባኪዳይሳ፣ ታማርሲዳይሳኔ ኣሳ ሃርጌሬ ፓሉዳይሳ ቆንጨሴስ። ቃሴካ ዩሱሲ ጋለላ ዴሬፔ ዩሩሳላሜ ቢዳይሳ፣ ኢዚ ሃይሳ ሃ ኣላሜዛ ቦላ ዴዲዳ ዴዎ ጊሺኔ ሃ ኣላሜዛ ቦላ ጋምዲዳ ወርሴላ ላይላን ወርሴላ ሳሚንታን ሃኒዳ ሃኖታ ጊሽ የቴስ። ሄይቴካ ዩሱሲ ካቁቴዳይሳ፣ ሃይቁዳይሳኔ ሃይቆፔ ዴንዲዳይሳ።

ሃ ሚሺራቾ ቃላዚ፣ ዩሱሲ ያሳ ዎጋ ቢርሻናስ ኢዛስ ጎዳቴሉ ዲዛዴኔ ያሳ ካዎቴላ ጊሽ ታማርሲዛ ጌታ ኣስታማሬ ሂስቴ ሺሺስ። ኢዛ ቴሚርቴዛፔ ዳሪዛ ባጋይ ኢቻሹ ዴማ ዴማ ኪፊሉን ሻኬቴስ።

1. ያሳ ካዎቴላን ዲዛይታ ሃኖ፣ ኢስታ ኦሶ፣ ኢስታ ሹኔ፣ ኢስቲ ሃናና ማላ ኢስታስ ቤሲዛዚኔ ኢስታስ ቤሲዛ ወርሴላ ኤፃ ሻኪ ኤሪሲዛ ዙማ ቦላ ሳባኪዳ ቃላ (ሼምፖ 5-7)
2. ታማኔ ናምዑ ኢዛ ኣሽካራቴ ሚሺራቾ ቃላ የታናስ ከቴቴ ቢሺን ኢስታስ ኢሜቴዳ ዎጋታ (ሼምፖ 10)
3. ያሳ ካዎቴላ ጊሽ ሺቁዳ ዴማ ዴማ ለሚሶታ (ሼምፖ 13)
4. ዩሱሳ ዎስቴ ካላናኮኔ ኢስታስ ጌላና ማላ ኢሜቴዳ ቴሚርቴ (ሼምፖ 18)
5. ሃይሳ ሃ ዎዴዛ ወርሴላ ጊሺኔ ያሳ ካዎቴላይ ያናይሳ ጊሽ ኢሜቴዳ ቴሚርቴ (ሼምፖ 24-25)

ሃ ማፃፋይ ኦይኪዳ ኩሜላ ቆፋ
 ዩሱስ ኪርስቶስ ዩሌቴላ ዛርኬኔ ኢዛ ዩሌቴላ 1:1-2:23
 ፃማቂዛ ዮሃንሳ ኦሶ 3:1-12
 ዩሱሳ ፃማቂቴሊኔ ኢዛ ፓጩቴላ 3:13-4:11
 ዩሱሲ ጋሊላን ኦሶ ዶሚዴስ 4:12-18:35
 ዩሱሲ ጋሊላፔ ዩሩሳላሚ ቡስ 19:1-20:34
 ዩሱሳ ወርሴላ ሳሚንታን ጋኪዳ ሜቶታ 21:1-27:66
 ዩሱሲ ሃይቆፔ ዴንዲ ቤቴዴስ 28:1-20

ዩሱስ ኪርስቶስ ዩሌታ ዛርኬኔ
 (ሉቃ 3:23-38)

1 ዳወቲ ና፣ ኣብራሃሚ ና ጊዲዳ ዩሱስ ኪርስቶስ ዩሌቴላ ዛርኬኔ ሃይሳፌ ካሊዛይሳ፤

2 ኣብራሃሚይ ዩሳቃ ዩሊዴስ፤ ዩሳቂ ያቆቤ ዩሊዴስ፤ ያቆቤይ ዩሁዳኔ ኢዛ ኢሻታ ዩሊዴስ፤ 3 ዩሁዳይ ተማሪፔ ፋሪሳኔ ዛሩ ዩሊዴስ፤ ፋሪሳይ ኤስሮሚ ዩሊዴስ፤ ኤስሮሚይ ኣራሚ ዩሊዴስ፤ 4 ኣራሚይ ኣሚናዲቤ ዩሊዴስ፤ ኣሚናዲቤይ ኔዓሶኔ ዩሊዴስ፤ ኔዓሶኔይ ሳሎሞኔ ዩሊዴስ፤ 5 ሳሎሞንካ ቦዔዜ ኤራዓቢፔ ዩሊዴስ፤ ቦዔዜይ ኡሩቲፔ ኢዮቤዴ ዩሊዴስ፤ ኢዮቤዴይ ኢሴዬ ዩሊዴስ፤ 6 ኢሴዬይ ካዎ ዳወቲ ዩሊዴስ፤ ዳወቲይ ኦሪዮ ማቺይፌ ሶሎሞኔ ዩሊዴስ።

7 ሶሎሞንካ ርቢዓሚ ዩሊዴስ፤ ርቢዓሚይ ኣቢያ ዩሊዴስ፤ ኣቢያይካ ኣሳፌ ዩሊዴስ፤ 8 ኣሳፌይ ዮሳፒፃ ዩሊዴስ፤ ዮሳፒፃይ ኢዮራሚ ዩሊዴስ፤ ኢዮራሚይ ኦዚያ ዩሊዴስ፤ 9 ኦዚያይ ኢዮዓታሚ ዩሊዴስ፤ ኢዮዓታሚይ ኣካዜ ዩሊዴስ፤ ኣካዜይ ሂዚቃሴ ዩሊዴስ፤ 10 ሂዚቃሴ ሚናሴ ዩሊዴስ፤ ሚናሴይ ኣሞፃ ዩሊዴስ፤ ኣሞፃይካ ዮሲያሳ ዩሊዴስ፤ 11 ዮሲያሳ ባቢሎኔ ዲዖ ላይሳ ኢኮኛኔ ኢዛ ኢሻታ ዩሊዴስ።

12 ባቢሎኔ ዲዖፔ ጉዬ ኢኮኛኔይ ሳላቲያሌ ዩሊዴስ፤ ሳላቲያሌይካ ዜሩባቤሌ ዩሊዴስ፤ 13 ዜሩባቤሌ ኣቢዮዴ ዩሊዴስ፤ ኣቢዮዴይ ኤሊያቂሚ ዩሊዴስ፤ ኤሊያቂሚይ ኣዛሪ ዩሊዴስ፤ 14 ኣዛሪይ ሳዶቂ ዩሊዴስ፤ ሳዶቂይ ኣኪሚ ዩሊዴስ፤ ኣኪሚይካ ኤሊዮዴ ዩሊዴስ፤ 15 ኤሊዮዴይ ኣሳዛሪ ዩሊዴስ፤ ኣሳዛሪይ ማታኔ ያቆቤ ዩሊዴስ፤ 16 ያቆቤይካ ኪርስቶስ ፔቴቲዳይሳ ዩሱሳ ዩሊዳ ማራሞ ኤካና ጊጊሲዳ ዮሴፌ ዩሊዴስ። *

* 1:16 ኪርስቶስ ኪርስቶስ ጉሲ “ሚሊሃ” ወይኮ “ቲዩቲዳይሳ” ጉሳ።

17 ሄሳ ጊሽ ኣብራሃሚፔ ዩዲ ዳወቲ ጋካናሰ ታማኔ ኦይዲ ዩሌቴል፤ ቃሴ ዳወቲፔ ባቢሎኔ ዲያ ዎዴ ጋካናሰ ታማኔ ኦይዲ ዩሌቴል፤ ባቢሎኔ ዲያፔ ኪርሰቶሳ ዩሌቴል ጋካናሰ ታማኔ ኦይዲ ዩሌቴል ገዴሰ።

ዩሱስ ኪርሰቶሳ ዩሌጋ

18 ዩሱስ ኪርሰቶሳ ዩሌቴል ታሪኬይ ሃይሳፌ ካሊ ዲዛይሳ፤ ኢዛ ኣያ ማራማ ዮሴፌሰ ገጌታ ዲሺን ኢዚ ኢዚራ ጋይቶንታ ሂሎ ኣያናን ቃንጻታዳ ቤታዲሰ። * 19 ኢዞ ገጊሲዳ ዮሴፌይ ሂሎ ኣሰ ገዲዳ ጊሽ ማራሞ ኣሳ ሲንጻን ቆንጨፎ ኬሶንታ ቆታራ ኣጋናሰ ባ ዎዝናራ ቃቲዳሰ። 20 ሃይሳ ኢዚ ቆፒሺን ያሳ ኪታንቻይ ኣጉሞራ ኢዛሰ ቆንጨዲ “ዳወቲ ና ዮሴፌ! ኔ ገጊሲዳ ማራማ ቃንጻታዳይ ሂሎ ኣያናን ገዲዳ ጊሽ ኢዞ ነሶ ኤፋናሰ ባቦፋ። 21 ኢዞ ኣቲማ ና ዩላና፤ ኢዚ ኣሳ ናጋራፔ ኣሻናይ ገዲዳ ጊሽ ኢዞ ሱንጻ ኔ ‘ዩሱሳ’ ጋ ሱንጻና” ገዴሰ። *

22-23 ጎዳይ ናቤ ኢሳያሳ ዲናን “ሄኮ! ጌላይይ ቃንጻታና፤ ኣቲማ ናካ ዩላና፤ ናዛ ሱንጻይካ ኣማኑዔላ ጌቲታና፤ ሄሳ ቢርሼልካ ‘ዖሲ ኦናራ ዴሰ’ ጌቲቲዲ ፃፊቲዳይሲ ፖሌታና ማላ ሃይሲ ወሪካ ሃኒዴሰ” ገዴሰ። *

24 ዮሴፌይካ ጲስኮፌ ቤጊዲ ጎዳ ኪታንቻይ ኢዞ ኣዛዚዳ ማላ ማራሞ ባሶ ኤፊዴሰ።

25 ገዶ ኣቲን ባዳ ኢዞ ኮይሮ ናዛ ዩላና ጋካናሰ ኢዞ ኤኪቤና። ዩሌቲዳ ጉላ ናዛ ሱንጻ “ዩሱሳ” ገዴሰ። *

2

ኣዎ ኣርሼይ ሞኪዛ ባጋፌ ዩዳ ኤራንቻታ

1 ካዎ ሄርዶሳ ዎዴ ዩሱሲ ቤቴሌሚ ዩሁዳን ዩሌቲዳፔ ጉዬ ኣዎ ኣርሼይ ሞኪዛ ባጋፌ ኤራንቻቲ ዩሩሳላሚ ዩዲ 2 “ዩሌቲዳ ኣይሁዳ ካዎይ ኣዎን ዲዜ? ኣዎ ኣርሼይ ሞኪዛ ባጋራ ኢዞ ያለንቴዛ ቤዩዲ ኢዛሰ ጎይናና ዩዶሰ” ገዲ ኦይቲዳ።

3 ካዎ ሄርዶሲ ሄሳ ሲይዲ ዳጋሚዴሰ፤ ዩሩሳላሚን ዲዛ ኣሳይ ወሪ ኢዛራ ዳጋሚዴሰ። 4 ኢዚካ ቄሴታ ሃላቃታኔ ዎጋ ታማርሲዛይታ ኡባ ሺሺዲ “ኪርሰቶሲ ኣዎን ዩሌታኔ?” ገዲ ኦይቲዳ።

* 1:18 ሉቃ 1:27 * 1:21 ሉቃ 1:31 * 1:22-23 ኢሳ 7:14 * 1:25 ሉቃ 2:21

5-6 ኢስቲካ ኢዛስ “ናቤይ
 የሁዳ ቢታን ዲዛሬ ሃኔ ቤቴሌሜ!
 ታ ዳሬ ኢስራዔል ናጊዛዳይ ኔፕ ከዛና ጊሽ
 ሃንኮ የሁዳ ሃሪዛይታፔ ኣዛንካ ጉፃካ’
 ጊዲ ፃፊዳ ጊሽ ኢዚ ቤቴሌሜ የሁዳን ዩሌታና”
 ጊዲ ዮተዳ። *

7 ሄሳፌ ጉዬ ሄርዶሲ ሄ ኤራንቻታ ጌማራ ጃይጊሲዲኔ ኢስታ
 ሃሳይሲዲ ያለንቴዚ ኢስታስ ቤተዳ ዎዳዮ ሻኪ ኤሪዳስ።
 8 ኤራንቻታ ቤቴሌሜ ዩዲዲ “ቢዲ ጉፋ ናዛ ኮዩቴ፣ ታካ ባዳ
 ኢዛስ ጎይናና ማላ ዳሚዳ ማላ ሃ ታኮ ሲሚዲ ኢዚ ኣዎን
 ዲዛኮን ታስ ዮተቴ” ጊዳስ።

9 ኤራንቻቲካ ካዎይ ኢስታስ ጊዳይሳ ሲዩዳፔ ጉዬ ሲሚ
 ቢዳ፤ ኣዎ ኣርሼይ ዎኪዛ ባጋራ ኢስታስ ቤተዳ ያለንቴይ ኢስታ
 ካሌሌዲ ጉፋ ናዚ ዲዛሶ ጋሊዳስ። 10 ኢስቲ ያለንቴዛ ቤዩዳ
 ዎዳ ዳሮ ኡፋዬተዳ። 11 ከሌ ጌሊዲ ጉፋ ናዛ ኢዛ ኣዮ ማራሚራ
 ዳሚዲኔ ጉልባተዲ ኢዛስ ጎይኒዳ፤ ባ ሳይኔ ሳይኔ ደይዲ ዎርቃ።
 ኤፃኔኔ ካርቤ ጊዛ ሚሽ ኢዛስ ኣሚዳ።

12 ኢስቲ ሄርዶሳኮ ሲዎንታ ማላ ኣጉዎን ከሄ ናጌታና ማላ
 ጌቴተዳ ጊሽ ሃራ ኦጌራ ባ ዳሬ ሲሚዳ።

ጊብጃ ቢታ ቤቴ ቡስ

13 ኤራንቻቲ ቢዳፔ ጉዬ ጎዳ ኪታንቻይ ዮሴፌስ ኣጉዎራ
 ቤተዲ “ሄርዶሲ ጉፋ ናዛ ዎጳና ኮዩዛ ጊሽ ኔ ሲማና ዎዳ ታ
 ኔና ኤሪሳና ጋካናስ ዳንዳዳ ጉፋ ናዛ ኣዬይራ ኤካዳ ዱጌ ጊብጃ
 ቢታ ባቃታዳ ሄን ዳሻ” ጊዳስ።

14 ሄሳ ጊሽ ዮሴፌይ ዳንዲዲ ኣዩዮ ናዛራ ኤኪዲ ጊዳሳራ
 ዱጌ ጊብጃ ቢታ ቢዳስ። 15 ሄርዶሲ ሃይቃና ጋካናስ ሄን
 ዳዒዳስ። ሄሳንካ “ታ ናዛ ታ ጊብጃ ቢታፌ ጃይጋዲስ” ጊዲ
 ጎዳይ ካሴ ናቤ ዱናን ሃሳዩዳይሲ ፖሌተዳስ። *

16 ኤራንቻቲ ኢዛ ባሌሌዳይሳ ኤሪዳ ዎዳ ሄርዶሲ ከሄ
 ሃንቁተዳስ። ኤራንቻቲ ኢዛስ ካሴ ዮተዳ ማላ ባ ኣስ ኪተዲ
 ናዎዑ ላይላኔ ናዎዑ ላይላ ኩዎንታይታ ቤቴሌሜኒኔ ቤታሌሜ
 ዩሾን ዲዛ ጉፋ ኣቱማ ናይታ ኡባ ዎጲሲዳስ።

17-18 ሄሳን
 “ዩሆይኔ ጌታ ዋሶ ጊሪሳይ ኤራማን ሲዬተዳስ፤
 ኢራዔላ ባ ናይታስ ዩካዲስ፤

* 2:5-6 ሚክ 5:2 * 2:15 ሆሴ 11:1

ናይቲ ወሪ ወሪዳ ገሽ
ሚናናስ ዳንዳዮንታ ኢፃዲስ”
ጌቲቲዲ ናቤ ኤርማሳን ዮቴቲዳይስ ፖሌቲዳስ። *

ጊብፃፔ ናዚሬቲ ሲሞ

19 ሄርዶሲ ሃይቂዳፔ ጉዬ ጎዳ ኪታንቻይ አጉሞራ ዮሴፌስ ጊብፃ ቢታን ቤቲዲ፤ 20 “ዳንዳዳ ጉሳ ናዛኔ ኢዛ አዪዮ ኤካዳ ኢስራዔል ቢታ ሲማ፤ ናዛ ዎቆና ኮዪዛይቲ ሃይቂዳ” ገዳስ። 21 ዮሴፌይ ዳንዲዲ ናዛ አዪይራ ኤኪዲ ኢስራዔል ቢታ ሲሚዳስ።

22 ገዳ አቲን አርካላዎሲ ባ አዎ ሄርዶሳ ሶን ዩሁዳን ካዎቲዳይሳ ሲይዲኔ ሄ ባናስ ባቢዳስ፤ ጎዳይ አጉሞራ ኢዚ ሄ ቦንታ ማላ ዮቲዳ ገሽ ጋለላ አወራጃ ቢዳስ። 23 ናዚሬቲ ጌቲቲዛ ካታማዮ ቢዲ ሄን ዱስ ኦይኪዳስ። ሄሳንካ ካሴ ናቤታን “ናዚሬቲ አስ ጌቲታና” ጌቲቲዲ ካሴቲዲ ሲንሳፌስ ሃሳዬቲዳይሲ ኩሚዳስ። *

3

ፃማቂዛ ዮሃንሳ ሳባኮ

(ማር 1:1-8፤ ሉቃ 3:1-18፤ ዮሃ 1:19-28)

1-2 ሄ ዎዴ ፃማቂዛ ዮሃንሲ አሳስ “ሳሎ ካዎቲል ማቲዳ ገሽ አንቴ ናጋራፔ ሲሚቲ” ገ ሳባኪሼ ዩሁዳ ባዞራ ዪዳስ። *

3 “ጎዳ ኦጌ አሊቲ፣ ዎጋ ኦጌዛካ ሎዔሊቲ ገሼ ባዞ ቢታን ዋሲዛ ቃላ”

ጌቲቲዲ ካሴ ናቤ ኢሳያሳን ዮቴቲዳይሲ ዮሃንሳ ገሻሳ። *

4 ዮሃንሲ ጋሜላ ኢሲኬፌ ኦሴቲዳ ማይዎ ማይዔስ። ባ ፃሳን ዳፎ ገፃስ፤ ኢዚ ሚዛ ቁማይ ዳጌራ ኤሳኔ ቦሌ። *

5 ዩራሳላሚፔ፣ ኩሚላ ዩሁዳፔኔ ዮርዳኖሴ ሻፋ ማታን ዲዛ ዳሬ አሳይ ወሪ ዮሃንሳኮ ዎቂዲ፤ 6 ባ ናጋራካ ኢዛስ ፓፂሼ ዮርዳኖሴ ሻፋን ኢዛ ኩሼን ፃማቂቲዳስ።

7 ዳር ፋርሳዌቲኔ ሳዱቃዌቲ ኢዚ ፃማቂዛሶ ዩሺን ቤዪዲ ዮሃንሲ “አንቴኖ ሾሻቶ! አንቴ ሲንሳራ ዲዛ ሃንቆፌ አታና ማላ አንቴና ኦኒ ቤሲዳ? * 8 አንቴ አንቴ ናጋራፔ ሲሚዳይሳ ቤሲዛ

* 2:17-18 ኤር 31:15 * 2:23 ማር 1:24፤ ሉቃ 2:39፤ ዮሃ 1:45 * 3:1-2 ማቶ 4:17፤ ማር 1:15 * 3:3 ኢሳ 40:3 * 3:4 2ካዎ 1:8 * 3:7 ማቶ 12:34፤ 23:33

ኦሪ ኦሊቴ። 9 ኅ ኣዋይ ኣብራሃሜይ ኮስ ዴሰ፣ ጊዛይሳን ኢንቴርካ ኢንቴና ባሌፍቴ፤ ታ ኢንቴስ ያሲ ሃይታ ሹቻታፕ ኣብራሃሜስ ና ኦሊ ዴንፋናስ ዳንዳዬስ ጋይስ። * 10 ሄኮ ካልታይ ቃንፃናስ ሚላታ ጋርሳን ጊጌቲ ኡቴዴስ፤ ሄሳ ጊሽ ሎዖ ኣይፊ ኣይፎንታ ሚሊ ዉሪ ቃንፃታናኔ ታማን ዬጌታና። * 11 ታኒ ማሮቴላስ ሃላን ፃማቃይስ፤ ሃራይ ኣቶ ሸን ታ ኢዛ ጫማ ቶካናስ ቤሶንታዴይ ታፕ ኣጂዛ ሚኖይ ጉዬራ ያና፤ ኢዚካ ሂሎ ኣያናኒኔ ታማን ኢንቴና ፃማቃና። 12 ካል ሱራጊዛ ፒላይ ኢዛ ኩሸን ዴስ፤ ኢዚካ ባ ካላ ባለዛ ፒቲ ጌሻና፤ ባ ጊስቴዛካ ካላ ዲዔን ቆላና፤ ሃፓ ጊዲኮ ቶንታ ታማን ፀጋና” ጊዴስ።

ዬሱሲ ፃማቁቲዴስ
(ማር 1:9-11፤ ሉቃ 3:21-22)

13 ሄ ዋዴ ዬሱሲ ዮሃንሳን ፃማቁታናስ ጋሊላፕ ዮርዳኖሴ ሻፋ ቢዴስ። 14 ጊዴ ኣቲን ዮሃንሲ “ሃይሲ ሃኔና፤ ታኒ ኔናን ፃማቁታና ቤሲሸን ኔኒ ዋናዳ ታኮ ያይ?” ጊዲ ኢዛራ ማርሹቴዴስ።

15 ዬሱሲካ “ኣይኮይ ባዋ፣ ኤር ጋርኩ? ሃይሳ ኦሊዲ ኑኒ ሂሎቴል ኡባ ፖላናስ ኮስ ቤሴስ” ጊዴስ። ዮሃንሲካ ኢዛ ቆፋ ኤር ጊ ኤኪዴስ። 16 ዬሱሲ ፃማቁቲዲ ሃላፊ ኬዚዲ ማላ ሄራካ ሳሎይ ዶዬቲን ያሳ ኣያናይ ሃራጵ ካፎ ሚሳቲዲ ኢዛ ቦላ ዋጂሸን ቤዬዴስ። 17 ሳሎፔካ “ታኒ ኢዛን ኡፋዬቲዛ ናዚኔ ታ ሲቁዛ ታ ናዚ ሃይሳ” ጊዛ ቃላይ ሲዬቴዴስ። *

4

ዬሱሲ ፓጨቲዴስ
(ማር 1:12-13፤ ሉቃ 4:1-13)

1 ሄሳፊ ጉዬ ሂሎ ኣያናይ ፃላዔን ፓጨታና ማላ ዬሱሳ ዲጌ ባዞ ቢታ ኤፊዴስ። * 2 ኦይዲ ታሙ ጋላሰኔ ኦይዲ ታሙ ቃማ ያሚዳፕ ጉዬ ዬሱሲ ጋፊዴስ። 3 ፓጨዛይሲ ዬሱሳኮ ሸቂዲ “ኔ ያሳ ና ጊዲኮ ኣኔ ሃይታ ሹቻታ ኡኬል ጊዳና ማላ ኣዛዛ” ጊዴስ።

4 ዬሱሲካ “ኣሲ ያሳ ዲናፕ ኬዚዛ ቃላንፕ ኣቲን ካላን ፃላ ዴና፣ ጌቴቲ ፃፊቴዴስ” ጊዲ ኢዛስ ዛሪዴስ። *

* 3:9 ዮሃ 8:33 * 3:10 ማቶ 7:19 * 3:17 ሜዴ 22:2፤ ማቶ 12:18፣17:5፤ ማር 1:11፤ ሉቃ 9:35 * 4:1 ኢብ 2:18፤ 4:15 * 4:4 ዛሬ 8:3

5 ቃሴካ ፃላዔይ ዩሱሳ ጌሻ ካታማዮ ኤፊ ያሳ ኬፋ ቁስቲ ቦላ ኬሲዲ፣ 6 “ኔ ያሳ ና ጊዲኮ ኣኔ ሃይሳፌ ዲጌ ጉፓ፤ ኣይሲ ጊኮ

ኔ ቶሆይ ሹቻን ቋጹቶንታ ማላ ኪታንቻቲ

ባ ኩሸራ ኔና ኦይኪ ዳንፋና ማላ ኔ ጊሽ

ዶሲ ባ ኪታንቻ ኪታና፣ ጌቲቲ ፃፊቲዳስ” ጊዳስ። *

7 ዩሱሲካ “ጌሻ ማፃፋን ኔ ጎዳ ያሳ ፓጮፋ፣ ጌቲቲ ፃፊቲዳስ” ጊዲ ዛሪዳስ። *

8 ቃሴካ ፃላዔይ ዩሱሳ ኬሂ ቋቃ ዙማ ቦላ ኬሲዲ ሳሎ ጉፓንፉን ዲዛ ካዎቲፋ ቦንቸዛራ ኡባ ኤሂ ቤሲዲ፣ 9 “ኔ ኩንዳዳ ታስ ጎይኒኮ ሃይሳ ኡባ ታ ኔስ ኢማና” ጊዳስ።

10 ዩሱሲ “ሃይሶ ፃላዔ! ታ ሲንፋፌ ሃካ! ኔኒ ኔ ጎዳስ ያሳስ ጎይና፤ ኢዛስ ፃላላ ኣዛዜታ፣ ጌቲቲ ጌሻ ማፃፋን ፃፊቲዳስ” ጊዳስ። *

11 ሃሳፌ ፃላዔይ ኢዛ ኣጊዲ ቢዳስ፤ ኪታንቻቲካ ዩዲ ኢዛ ማዲዲ።

ዩሱሲ ሳባኮ ኦይኪዳስ
(ማር 1:14-15፤ ሉቃ 4:14-15)

12 ዩሱሲ፣ ዮሃንሲ ቃሽቲዳይሳ ሲይዲ ጌዴ ጋለላ ሲሚዳስ።

* 13 ናዚሬቲ ካታማ ኣጊዲ ዛቢሎኔ ኒፍታሌሜ ሄራን ኣባ ማታን ዲዛ ቂፊርናሆሜ ካታማን ዲስ ኦይኪዳስ። *

14-16 “ሃሳን ዛቢሎኔኒኔ ኒፍታሌሜ ቢታን፣ ዮርዳኖሴፔ ሄ ፒንፋን ኣባ ሳንቄራ ኤፊዛ ኦጌ ማታን ዲዛ ኣይዛቤ ጊዲዳ ጋለላ ዳሬ ኣሳይ፣

ቋማን ዲዛ ዳሬይ ዎልቃማ ፖዎ ቤዩዳስ።

ሃይቆ ኩዋ ጊደን

ዲዛ ዳሬስ ፖዎይ ፖዒዳስ”

ጌቲቲዲ ናቤ ኣሳያሳ ዲናን ካሴቲዲ ሃሳዬቲዳይሲ ፖሌቲዳስ።

17 ዩሱሲ ሄ ዎዴፔ ሃ ሲሚን “ሳሎ ካዎቲላ ማቲዳስ፣ ማርታ ጌለቲ” ጊዲ ሳባኮ ኦይኪዳስ። *

ኮይሮ ዩሱሳ ካሊዳይታ ዪይጌቲሕ
(ማር 1:16-20፤ ሉቃ 5:1-11)

* 4:6 ማዛ 91:11-12 * 4:7 ዛሬ 6:16 * 4:10 ዛሬ 6:13 * 4:12 ማቶ 14:3፤ ማር 6:17፤ ሉቃ 3:19-20 * 4:13 ዮሃ 2:12 * 4:17 ማቶ 3:2

18 ዩሱሲ ጋሊላ አባ ላንቄራ አዲሼ ናምዑ አሻንታ፤ ሄይቲካ ጴጥሮሳ ጌቴቲዛ ሲሞናኔ ኢዛ አሻ ኢንዲራሳ ቤዩዳስ። ኢስቲካ ሞሌ ኦይኪዛይታ ጊዲዳ ጊሽ ሞሌ ኦይኪዛ ጌቴ አባን ዩሊሼ ዳቴስ። 19 ዩሱሲ ኢስታ “ሃ ዩቴ! ታና ካሊቴ! ታ ኢንቴና ኣስ ኦይኪዛ ኣስ ኬሳና” ጊዳስ። 20 ኢስቲ ሄራካ ሞሌ ኦይኪዛ ጌቴዛ ዩጊ ኣጊዲ ዩሱሳ ካሊዳ።

21 ጉሉ ሲንፌ ቢሼ ሃራ ናምዑ አሻንታ ዛቢደሳ ና ናምዓታ ያቆቤኔ ዮሃንሳ ቤዩዳስ፤ ኢስቲካ ባ አዋ ዛቢደሳራ ዋሳሎ ጊደን ሞሌ ጌቴ ሎዔፍቴስ። ዩሱሲካ ኢስታ ያይጊን፤ 22 ኢስቲ ሄራካ ዋሳሎዛኔ ባ አዋ ኣጊዲ ካሊዳ።

ዩሱሲ ሃርጊዛይታ ፓሌዳስ
(ሉቃ 6:17-19)

23 ዩሱሲ አይሁዳታ ኢስታ ዋሳ ኬላን ታማርሲሼኔ ካዎቴላ ሚሽራቾ ቃላ ሳባኪሼ ቃሴ ዳሬ ጊደን አይ ሃርጊይካ ሳኪዛይታ ፓሊሼ ኩሜላ ጋሊላን ዩዩዳስ። * 24 ሄሳ ጌደን ሎዎ ናሾይ ኩሜላ ሶሪያ ቢታን ሲዩቴዳስ፤ ዳሬይካ ዲማ ዲማ ሳኮን ዳር ዋቴዛይታ፣ ዳይዳንሉ ኢስታን ጌሊዳይታ፣ ቦላፌ ቢታን ዩጊዛ ሃርጊይ ዲዛይታኔ ሲሊዳይታ ኢዛኮ ኤሂን ኡባካ ፓሊዳስ። 25 ሄሳፌ ዳንዲዳይሳን ጋሊላቴ፣ ታሙ ካታማታቴ፣ ዩሩሳላሜቴኔ ዩሁዳቴ፣ ዮርዳኖሴ ሻፋ ፒንላፌ ዩዳ ዳር ኣሳይ ኢዛ ካሊዳስ። *

5

ዩሱሲ ዙማ ቦላ ታማርሲዳ ቲሚርቲ

1 ዳር ዳሬይ ሽቁዳይሳ ቤዩዲ ዩሱሲ ፑዳ ዙማ ቦላ ኬዚ ኡቴዳስ፤ ኢዛ ካሊዛይቲካ ኢዛኮ ዩዳ። 2 ኢዚካ ኢስታ ሂዘጊ ታማርሶ ኦይኪዳስ፤

ቱማ ኣንጅ ዳማና ኣሳቲ
(ሉቃ 6:20-23)

3 “ኣያናን ባና ካዉሽዛይቲ ኣንጅቲዳይታ፤

* 4:23 ማቶ 9:35፤ ማር 1:39 * 4:25 ታሙ ካታማፕ ጊሪኬ ቃላ ሃሳዩዛይቲኔ አይሁዳ ጊደንታ ዳሬቲ ኢሲፌ ዲዛሶይ ታሙ ካታማታ ጌቴቲስ። ሄ ካታማታፕ ዳር ባጋቲ ጌሊላ ኣባፌ አዋ ኣርሼይ ጌልዛሶ ባጋራኔ ፑዳሃ ባጋራ ኡሻቻ ቦላ ዳቴስ።

አይሲ ጊኮ ሳሎ ካዎቴል ኢስታሳ።

4 ቃጴቴዛይቲ እንጃቲዳይታ፤

አይሲ ጊኮ ኢስቲ ማኔታና። *

5 አሽኬቲ እንጃቲዳይታ፤

አይሲ ጊኮ ኢስቲ ቢታ ላታና። *

6 ዲሎቴል ጋፌቲዛይቲኔ ሳዎቴዛይቲ እንጃቲዳይታ፤

አይሲ ጊኮ ኢስቲ ካላና። *

7 አሳስ ሎጾ ኦሊዛይቲ እንጃቲዳይታ፤

አይሲ ጊኮ ኢስታሰካ ሎጾይ ኦሴታና።

8 ዎዚና ዲሎቲ እንጃቲዳይታ፤

አይሲ ጊኮ ኢስቲ ጾሳ ቤያና።

9 ሳርቴል ኦሊዛይቲ እንጃቲዳይታ፤

አይሲ ጊኮ ኢስቲ ጾሳ ናይታ ጌቴቲ ያይጌታና።

10 ዲሎቴል ጊሽ ሳዴቲዛይቲ እንጃቲዳይታ፤

አይሲ ጊኮ ሳሎ ካዎቴል ኢስታሳ። *

11 “ታ ጌዶን አሳይ ኢንቴና ጫዩኮ፣ ሳዲኮኔ ኢታ ዮጾ ዎርዶራ ኢንቴ ቦላ ሃሳዩኮ ኢንቴ እንጃቲዳይታ። * 12 ኢንቴ ሳሎን ዴማና ዎጋይ ኬሂ ጊታ ጊዲዳ ጊሽ ኡፋይሳን ጉፒቴ። ኢንቴፌ ሲንላን ዲዛ ናቤታካ ሃሳሉ ሳዲዳ። *

ማዲኔ ፖጾ ለሚሶ
(ማር 9:50፤ ሉቃ 14:34-35)

13 “ኢንቴ ሃ ቢታ አሳስ ማዲኔ ማላ። ማዲኔ ባ ማልጾቴላ ዩዲዛ ጊዲኮ ጌዴ ካሬ ዩጌቲዲ ዩጴቴላፌ ኣቲን፣ ዛሪዲ ዴማናስ ዳንዳዩዜ? * 14 ኢንቴ ዴሬስ ፖጾ። ዙማ ቦላ ዲዛ ካታማያ ቆቲታናስ ዳንዳዮኩ። * 15 አሲ ያምፔ ኦይሊዲ ኬላን ዲዛ አሳ ኩሜላስ ፖጾና ማላ ቆቃሶን ዎሴስ ኣቲን ጌማ ሶን ዎሊ ኤሬና። * 16 ሃሳሶካ አሳይ ኢንቴ ሎጾ ኦሶ ቤዩዲ ሳሎን ዲዛ ኢንቴ አዎ ቦንቻና ማላ ኢንቴ ፖጾይ አሳ ሲንላን ፖጾ። *

ሙሴ ዎጋ ጊሽ

* 5:4 ኢሳ 61:2 * 5:5 ማዛ 37:11 * 5:6 ኢሳ 55:1-2 * 5:10 1ጴፅ 3:14 * 5:11 1ጴፅ 4:14 * 5:12 2ታር 36:16፤ ሃዎ 7:52 * 5:13 ማር 9:50፤ ሉቃ 14:34 * 5:14 ዮሃ 8:12፤ 9:5 * 5:15 ማር 4:21፤ ሉቃ 8:16፤ 11:33 * 5:16 1ጴፅ 2:12

17 “ታኒ ሙሴ ዋጋኔ ናቤታ ቃላ ሻራና ዪዳ ኢንቴሰ ሚሳቶፖ፤ ፖላናሰ ያዲሰ ኣቲን ሻራናሰ ያቤኬ። 18 ታ ኢንቴሰ ቱሙ ጋይሰ፤ ሳሎይኔ ሳዳይ ኣቆና ጋካናሰ ሙሴ ዋጋይ ወሪ ፖሌታና ኣቲን ዋጋፔ ኢሲ ፒዳሌይካ ዋይኮ ቂሪኛካ ሻሪቱኩ። * 19 ሄሳ ጊሽ ኦኒካ ሃ ኣዛዘታፔ ጉዲዛሮ ጊዲኮካ ኦቶንታ ዩጊ ኣቋኮ፣ ሃንኮይታካ ዩቋ ኣቆና ማላ ታማርሲኮ ሳሎ ካዋቴላን ሄሳዳይ ጉል ጌቴቲ ዪይጌታና፤ ጊዶ ኣቲን ሃይታ ኣዛዘታ ኦሊ ፖሊሼ ሃንኮይታ ፖላና ማላ ታማርሲኮ ሄሳዳይ ሳሎ ካዋቴላን ጊታ ጌቴታና። 20 ታ ኢንቴሰ ጋይሰ፣ ኢንቴ ዪሎቴሊ ፋርሳዌታፔኔ ሙሴ ዋጋ ታማርሲዛይታ ዪሎቴላፔ ኣቋንታ ኣጊኮ ሳሎ ካዋቴላ ጌላና ዳንዳዬኬታ።

እስ ዋቆናሰ ቤሴና

21 “ካሴ ኣሳታሰ ‘ዋቆፓ፤ ዋቋዳዳ ቦላ ፒርዴታና’ ጌቴቲዳይሳ ኢንቴ ሲዪዳታ። * 22 ታ ቃሴ ኢንቴሰ ጊዛይ ባ ኢሻ ቦላ ኦጌይ ባይንዳ ሃንቂቲዛዳ ቦላ ፒርዴታና፤ ኦኒካ ባ ኢሻ ‘ናፓይ’ ጊዛዳይ ዲላታ ሲንላን ኦይሼታና። ‘ኤያይ’ ጊዛዳ ጋናሚ ታማ ፒርዳይ ናጌሰ። 23 ሄሳ ጊሽ ኔኒ ያርሾ ሺሺዛሶን ያሳሰ ያርሻና ጊሽን ኔ ኢሻይ ኔ ቦላ ሚሼቲዳዚ ኔሰ ቆፔቲኮ፣ 24 ኔ ያርሺዛይሳ ሄን ያርሾሶን ኣጋጋዳ ኮይሮ ባዳ ኔ ኢሻራ ጊጋ፤ ሄሳፌ ጉዬ ሲማዳ ኔ ያርሾዛ ያሳሰ ሺሻ።

25 “ኔና ሞቲዳ ኔ ሞርኬይ ኔ ቦላ ፒርዲሶንታ ማላ፣ ፒርዲዛ ዳናይ ቃቺዛይሳሰ ኔና ኣሊ ኢሞንታ ማላ፣ ቃሾ ኬላን ኔ ዋቆንታ ማላ ቡሮ ኦጌ ቦላ ዳሼ ኔ ሞርኬራ ኤሌላ ጊጋይቻ። 26 ታ ኔሰ ቱሙ ጋይሰ፤ ኢዚ ፒርዲሲ ወርሲዳ ጊዲኮ ወርሴላ ሳንቲዮ ቃንፃና ጋካናሰ ቃሾፔ ቢርሼታካ።

ላይማታናሰ ቤሴና

27 “‘ላይማቶፓ’ ጊዛይሳ ኢንቴ ሲዪዳታ። * 28 ታኒ ጊዲኮ ኢንቴና ሂዘጋይሰ፤ ማጫሳ ኣሞ ኣይፌራ ዪሊዳዳይ ወሪ ባ ዋዘናን ኢዚራ ላይማቲዳሰ። 29 ናጋራ ኦላናሰ ኔ ኡሻቻ ኣይፌይ ኔሰ ጋሶ ጊዲኮ ኔፔ ኬሳ ዋራ ዩጋ፤ ኔ ኣሳቴላይ ኩሜል ጌዳ ጋናሚ ታማን ዩጌታናፔ ኔ ኣሳቴላፌ ኢሲና ፓጩኮ ሎዎ። 30 ኔ ኡሻቻ ኩሼይ ናጋራ ኦሶሰ ጋሶ ጊዲኮ ኔፔ ቃንፃ ዲጋ፤ ኔ ኣሳቴላይ

* 5:18 ሉቃ 16:17 * 5:21 ኬሳ 20:13፤ ዛሬ 5:17 * 5:27 ኬሳ 20:14፤ ዛሬ 5:18

ኩሜል ጋናሜን ዩጌታናይሳፌ ኔ ኣሳቴላፌ ኢሲ ቢሊቴይ ኔሰ ፓጮ ጊዲኮ ሎዎ።

31 “ማቶ ኣንጂ ዩዲዛዴይ ፒርማ ዋራቃታ ኢዚሰ ኢማና ቤሴሰ’ ጌቴቴዳሰ። * 32 ታኒ ቃሴ ኢንቴና ሂዘጋይሰ፤ ሃራ ኣሳራ ላይማቲሽን ቤዮንታ ዲሼ ባ ማቶ ኣንጂዛዴይ ወሪ ኢዛ ላይማታና ማላ ኦፍሰ። ሄሳሶካ ኣንጄቴዳር ኤኪዛዴይካ ላይማቲዳ ማላ ቆዴቴሰ። *

ጫቆ ጊሽ

33 “ካሴ ኣሳታሰ ‘ዋርዶ ጫቆፋ፤ ያሳ ሲንላን ኔ ጫቂዳይሳ ናጋ’ ጌቴቴዳይሳ ኢንቴ ሲዪዴታ። * 34 ታ ቃሰ ኢንቴና ኣይኮካ ጫቆፍቴ ጋይሰ፤ ሳሎይ ያሳሰ ኡቴዛ ኣልጋ ጊዲዳ ጊሽ ሳሎን ጫቆፍቴ። * 35 ቢታይ ያሳ ቶሆይ ዩጲዛሶ ጊዲዳ ጊሽ ቢታንካ ጫቆፍቴ። ዋጋ ካዎ ካታማ ጊዲዳ ጊሽ ዩሩሳላሜንካ ጫቆፍቴ። * 36 ኢንቴ ሁዒንካ ጫቆፍቴ፤ ኢንቴ ሁዒ ቢናናፔ ኢሲኔዮካ ቦል ዎይኮ ካሬል ሂሰታናሰ ዳንዳዬኬታ። 37 ሄሳ ጊሽ ኢንቴ ኢንቴ ጊደን ሃሳዬቴሽን ኢንቴ ሃሳያይ “ኤ” ጋናዝ ጊዲኮ “ኤ” ጌቴ “ኣካይ” ጋናዝ ጊዲኮ “ኣካይ” ጌቴ፤ ሄሳፌ ካሬ ጊዲዳይ ወሪ ኢታ ኣሳፔ ዪዛዛ።

**ሃሎ ኬሶ ጊሽ
(ሉቃ 6:29-30)**

38 “ኣይፌ ጊሻሰ ኣይፌ ኣቻ ጊሻሰ ኣቻ’ ጌቴቴዳይሳ ኢንቴ ሲዪዴታ። * 39 ታ ቃሴ ኢንቴሰ ጊዛይ ኢታ ኦሊዳዴራ ኤቄቶፒቴ፤ ጊዶ ኣቴን ኔሰ ኡሻቻ ሻጋላ ባቂዛዴሰ ሃንኮይሳካ ዩሻ ቤሳ። 40 ኢሲ ኣሲ ኔ ጊዶራ ማይዲዳይሳ ኔፔ ኤካናሰ ኔና ሞቲኮ ቦላራ ማይዲዳይሳካ ጉጃዳ ኢዛሰ ኢማ። 41 ኢሲ ኣሲ ኔና ኢሲ ሳቴ ኦጌ ኔ ባና ማላ ዎልቃሊኮ ኢሲፌ ናሞዑ ዳኮ ጊዳና ኦጌ ኢዛራ ባ። 42 ኔና ዎሲዛዴሰ ኢማ፤ ኔፔ ታልዒ ኤካናሰ ኮዪዛዴሰ ዘኮ ዛርፓ።

43 “ኔ ላጌ ሲቃ፤ ኔ ሞርኬ ኢፃ’ ጌቴቴዳይሳ ሲዪዴታ። 44 ታ ቃሰ ኢንቴና ኢንቴ ሞርኬታ ደሲቴ፤ ኢንቴና ጎዲዛይታሰ ዎሲቴ

* 5:31 ማቶ 19:7፤ ማር 10:4 * 5:32 ማቶ 19:9፤ ማር 10:11-12፤ ሉቃ 16:18፤ 1ቆር 7:10-11 * 5:33 ሉዌ 19:12፤ ታይ 30:2፤ ዛሬ 23:21 * 5:34 ያቆ 5:12፤ ማቶ 23:22 * 5:35 ኢሳ 66:1፤ ማዛ 48:2 * 5:38 ኬሳ 21:24፤ ሉዌ 24:20፤ ዛሬ 19:21

ገይሱ።⁴⁵ እንጅ ሄሳቶ ኦሊኮ እንጅ ሳሎ አዋሰ ናይታ ገዳና። ኢዚ አዋ ኦርሽ ኢታታሲኔ ሎጋታሰ ኢሲ ቦላ ጋሊ ኢሜሰ። ኢራካ ጊሎታሲኔ ናጋራንቻታሰ ኢሲ ቦላ ቡኪሴሰ።⁴⁶ እንጅና ደሲዛይታ ፃላላ እንጅ ደሲኮ እንጅሰ አዛ ጎዓይ ዲዜ? ቃራፃ ቃንጂሲዝይቲ ሄሳቶ ኦሌቴኔ? ⁴⁷ እንጅ አሻታ ፃላ እንጅ ሳርቲኮ ሃንኮይታፔ አዛን ሎዔቲ? አማኖንታይቲካ ሄሳቶ ኦሌቴሰ። ⁴⁸ ሄሳ ጊሽ እንጅ ሳሎ አዋይ ዋሶይ ባይንዳይታ ገዲዳ ማላ እንጅካ ዋሶይ ባይንዳይ ገዲቴ። *

6

ማንቆስ ማዶ ኢሞ

¹ “እሲ እንጅና ቤያና ማላ አሳ ሲንፋን ሎጋ ኦሎንታ ማላ ናገቲቲ፤ ሄሳቶ ኦሊኮ እንጅ ሳሎ አዋፔ ጎዓ ዳሜኬታ። * ² እንጅ ማንቆታሰ ማዶ ኢሚዛ ዋይ አሲ ታና ቤዮ ገዲ አሳ ሲንፋን ቦንቹታናሰ ኦጌኒኔ አይሁዳ ዋሳ ኬፋን ፀሩምባ ፑኒሲዛ ቆጴፔ ቆሞን ሃኒዛይታሶ ኦሎፎቴ። ታ እንጅሰ ቱሙ ገይሰ፤ ኢሰቲ ባ ዋጋ ኡባ ሃን ኤኪቹዳ። ³ እንጅ ማንቆታሰ ኢሚሽን ኡሻቻ ኩሽይ ኦሊዛ ሃዲሪሳ ኩሽይ ኤርፖ። ⁴ እንጅ አሞይ ገማን ገዶ፤ ቆታን ኦሴቲዳይሳ ቤዩዛ እንጅ አዋይካ እንጅ ዋጋ እንጅሰ ኢማና።

ዋሳ ጊሽ (ሉቃ 11:2-4)

⁵ “እንጅ ዋሲሽ ቆጴፔ ቆሞን ሃኒዛይታ ማላ ሃኖፒቲ፤ ኢሰቲ አሲ ቤያና ማላ አይሁዳ ዋሳ ኬፋታኒኔ አይዱ ኦጌ ቦላ ኤቂዲ ዋሳናሰ ደሴቴሰ። ታ እንጅሰ ቱሙ ገይሰ፤ ኢሰቲ ኩሜሳ ዋጋ ኤኪቹዳ። * ⁶ ኔ ዋሳና ጌሊዛ ኔ ኪፊሌ ጌላ፤ ካሬካ ኔ ቦላ ጎርዳዳ ገማን ዲዛ ኔ አዋኮ ዋሳ። ገማን ኦሴቲዳይሳ ቤዩዛ ኔ አዋይ ኔ ኦሶ ማላ ኔሰ ኢማና።

⁷ “አማኖንታ አሳይ ኢሲ ቃላ ዛሪ ዛሪ ዋሲኮ ኢሰታሰ ሲዬቲዛ ሚሳቲን ኢሰቲ ዛሪ ዛሪ ገዛይሳሶ እንጅካ ዋሲሽ ኢሲ ቃላ ዛሪ ዛሪ ጎፒቲ። ⁸ ገዶ አቲን እንጅ አዋይ እንጅ ዋሳናፔ ካሴቲዲ እንጅሰ አዚ ኮሺዛኮኔ ኤሪዛ ጊሽ እንጅ ኢሰታ ሚሳቶፒቲ። ⁹ እንጅ ዋሲሽ ሳሎን ዲዛ ኦ አዋዉ!

* 5:48 ሉቁ 19:2፤ ዛሬ 18:13 * 6:1 ማቶ 23:5 * 6:5 ሉቃ 18:10-14

ኔ ሱንሊ አንጃቶ።

10 ኔ ካዎቴሊ ሃዮ፤

ኔ ሼኔይ ሳሎን ጊዲዳ ማላ ሳዓንካ ሃኖ።

11 ሃቺሰ ጊዲዛ ካላ

ኑሰ ሃቺ አማ።

12 ኑ ኑና ቆሂዳይታሰ አቶ ጊዛ ማላ

ኔካ ኑ ቆሆ ኑሰ አቶ ጋ።

13 ኢታፔ ኑና አሻ አቲን ኑና ፓጩን ጌልላፋ፤

ቦንቸይ ሜርፔ ሜርና ጋካናሰ ኔይሳ። አሚን።

ጊ ዎሲቴ።

14 “አንቴ አንቴና ቆሂዳይታሰ አቶ ጊኮ አንቴ ሳሎ አዋይ አንቴሰ አቶ ጋና። 15 ቃሴ አንቴ አሳ ናጋራ አቶ ጎንታ ኢዲኮ አንቴ አዋይካ አንቴ ናጋራ አቶ ጌና።

ፆማ ጊሽ

16 “አንቴ ፆማ ፆሚሽ ቆጴፔ ቆሞራ ፆሚዛይታላ ሹሎፍቴ። ኢሰቲ ባ ፆሚዛይሳ አሲ ኤራና ማላ ባ አይፊሶ ኢሴቴሰ። ታ ቱሙ ጋይሰ፤ ሄሳላ ኦሊዛይቲ ባ ዋጋ ኩሜላ ኤኪቺዳ። 17 ኔኒ ፆማ ፆሚሽ ኔ አይፊሶ ሜጩታ፣ ኔ ሁዔ ቲዩታ። 18 ሄሳላ ኔ ፆሚኮ ገማን ዲዛ ኔ አዋይ ፃላላ ኤሪዛዚኔ አሲ ኦኒካ ኤርጎታ ቆታን ጊዳና። ቆታን ኦሴቲዳይሳ ቤዪዛ ኔ አዋይካ ኔ ዋጋ ኔሰ አማና።

ሳሎን ዲዛ ሃር

(ሉቃ 12:33-34)

19 “ቢላይ ሚዛሶን ቡቁዲኔ ሺይዲ ዋሪቲዛሶን ካይሶይ ቦኪዲ ካይሳናሰ ዳንዳዪዛሶን፣ ሃ ቢታ ቦላ አንቴሰ ሚሽ ሺሹፍቴ። * 20 ጊዶ አቲን ቢላይ ማናሰ፣ ቡቁዲ ዎይኮ ሺይዲ ዋሪቶንታሶን፣ ካይሶይ ቦኪ ኤካና ዳንዳዮንታሶን ሄን ሳሎን አንቴሰ ሚሽ ሺሺቴ። 21 ኔ ሚሻይ ዲዛሶን ኔ ዎዘናይ ሄን ዴሰ።

22 “አይፊይ አሳቴሳሰ ፖ፣ ሄሳ ጊሽ ኔ አይፊይ ፓፃ ጊዲኮ፣ ኔ ኩሜላ አሳቴሳይካ ፖፃ ጊዳና። 23 ኔ አይፊይ ሃርጋንቻ ጊዲኮ፣ ኔ ኩሜላ አሳቴሳይካ ቋማ ፃላ ጊዳና። ሂሰቲኮ ኔናን ዲዛ ፖፃይ ቋማ ጊዲኮ፣ ቃሴ ቋማይ ዋኒዳ ገርድ ጊዳ ቋማ ጊዳንዴ?

* 6:19 ያቆ 5:2-3

24 “ኢሲ ኣሲ ናምዑ ጎዳሰ ኦፋና ዳንዳዬና። ኢሳ ኢዲዲ ናምዓንጾዛ ደሳና፤ ዎይኮ ኢሳ ቦንቸዲ ናምዓንጻ ሌቃና፤ ያሳሲኔ ሚሻሰ ናምዓታሰ ጋሌ ኦፋናሰ ዳንዳዬና።

ዳር ቆፖፍቲ

25 “ሄሳ ጊሽ ታ ኢንቴና ኢንቴ ዱሳ ጊሽ ኣይ ሚና? ኣይ ኡዩና? ኣይ ማይዲና? ጊዲ ሂርጎፍቲ ጋይሰ። ሸምፖይ ቁማፔ፣ ኣሻይ ማይፖፔ ኣጼኔ? 26 ኣኔ ሳሎ ካፎታ ፃለቲ! ዜሬቴና፣ ማፃቴና፣ ዲዔን ቆሌቴና ሺን ኢንቴ ሳሎ ኣዎይ ኢሰታ ሚዜሰ። ኢንቴ ኢሰታፊ ኬሂ ኣጼኬቲ? 27 ኣኔ ኢንቴፊ ዳር ዋይቲዲ ባሰ ኢሜቲዳ ላይላ ቦላ ሃራ ኢሲ ጋላሰ ፑጅና ዳንዳዬዛ ኣሲ ዲዜ? *

28 “ቃሴ ማይፖ ጊሽ ኣዛሰ ሂርጌቲ? ኣኔ ጮ ዴንባን ዲዛ ጨሻታ ፃለቲ፤ ዳቡሬቴና ዎይኮ ሱቁቴና። 29 ሄሳ ጊሽ ታ ኢንቴና ጊዛይ ሃራይ ኣቶ ሺን ካዎ ሶሎሞኒካ ባ ቦንቸራ ሃ ጨሻታፔ ኢሲኔይ ማላ ሎፖ ማይዲቤና። 30 ኢንቴና ፓጩ ኣማናይ ዲዛይቶ! ሃቺ ኣሳ ኣይፊን ቤቲዲ ዎንቶ ታማን ዎጳና ማታ ሃይሳሶ ማይዚዛ ያሲ ኢንቴና ሄሳፊ ሎዔሌ ኣሌ ማይዛናሰ ዳንዳዬኔ? 31 ሄሳ ጊሽ ኦ ኣይ ማኔ? ኣይ ኡያኔ? ኣይ ማይዳኔ? ጊዲ ሂርጎፍቲ። 32 ሃንኮ ኣማናጎታ ኣሳይ ሃይሳ ዴማናሰ ዳር ቆፔሰ። ሃይሲ ዉሪ ኢንቴሰ ኮሺዛይሳ ኢንቴ ሳሎ ኣዎይ ኤሬሰ። 33 ሃራፔ ሲንፋቲዲ ያሳ ካዎቴላ ፃሎቴላ ኮዩቴ፤ ሃይቲ ዉሪ ኢንቴሰ ፑጅታና። 34 ሄሳ ጊሽ ዎንቶሰ ኬሂ ቆፖፍቲ፤ ዎንቶ ሜቶይ ዎንቶሰ ኣቆ፤ ኢሲ ኢሲ ጋላሳይ ባሲ ጊዲዛ ሜቶራ ዴሰ።

7

**ሃራ ኣሳ ቦላ ፒርዳናሰ ኮሻና
(ሉቃ 6:37-42)**

1 “ኢንቴ ቦላ ፒርዳቶንታ ማላ ሃራ ኣሳ ቦላ ፒርዳፍቲ።
2 ኢንቴ ፒርዲዳ ማላ ኢንቴ ቦላካ ፒርዳታና። ኢንቴ ማኪዳ ሚሻራ ኢንቴሰ ማኬታና። * 3 ኔ ኣይፊን ዲዛ ጊታ ሚላ ቤዮንታ ዳሼ ኔ ኢሻ ኣይፊን ዲዛ ቁሪ ቡራ ኣዛሰ ፃላይ? 4 ኔ ኣይፊን

* 6:27 ባሰ ኢሜቲዳ ላይላ ቦላ ሃራ ኢሲ ጋላሰ ፑጅና ዳንዳዬዛ ኣሲ ዲዜ? ጊዛይሳ ኢሲ ኢሲ ጌሻ ማፃፋታ ቢርሼላን “ባሲ ዲዛ ኣዲሳቴላ ቦላ ኢሲ ዎጳ ፑዴ ፑጅናሰ ዳንዳዬዛ ኣሲ ዲዜ?” ጊዛዚ ዴሰ። * 7:2 ማር 4:24

ገታ ሚሊ ዲሺን ኔ አሻ 'አኔ ታ ኔ አይፊፔ ቁሪ ቡራዮ ከሳይሰጥ ጋናሰ ዋና ዳንዲያይ? 5 ኔኖ ቆጆፔ ቆሞን ሃኒዛይሶ ካሴታዳ ኔ አይፊን ዲዛ ገታ ሚላ ከሳይቻ። ሃሳፌ ካላዳ ኔ አሻ አይፊን ዲዛ ቡራ ከሳናሰ ሎዔላ ያላንዳሳ። 6 ባ ቶሆን ዩጶንታ ማላኔ ሲሚዲ አንቴና ሳዲ ዳኬሬሶንታ ማላ አንጃቲዳይሳ ካናታ ሲንላን ዩጎፍቴ፤ ቃሴ አንቴ ዋርቃካ ጉዲንላታ ሲንላን ዩጎፍቴ።

ዋሲቴ፣ ኮዪቴ፣ ቆጻቴ
(ሉቃ 11:9-13)

7 “ዋሲቴ አንቴሰ አሚታና፤ ኮዪቴ አንቴ ዴማና፤ ካሬ ቆጻቴ አንቴሰ ዶዬታና። 8 ዋሲዳ ኡባሰ አሚታና፤ ኮዪዛ አሲ ዴማና፤ ቆጻዛዴሰ ካሬይ ዶዬታና። 9 አንቴ ገደፌ አሳዴሰ ናይ ኡኬላ ዋሲኮ ሹቶ አሚዛ አዋይ ዳንዴ? 10 ዋይኮ ሞሌ ዋሲኮ ሾሽ አሚዛዴይ ዳንዴ? 11 ሂሰቲን አንቴ ኢታታ ገዲ ኡቲዲ አንቴ ናይታሰ ሎፖ ሚሽ አሞ ኤሪዛይታ ገዲኮ አንቴ ሳሎ አዋይ ኢዛ ዋሲዛይታሰ ዋኒዲ አጁዛ ሎፖ ሚሽ አሚኔ? 12 ሃሳ ገሽ ሃራ አሲ አንቴሰ ኦላና ማላ አንቴ ኮዪዛይሳ፣ አንቴካ ሃራታሰ ኦሊቴ። ሙሴ ዋጋይኔ ናቤቲ ሃይሳን ኩዬቴሰ። *

አሆ ፔንጌኔ ፀንላ ፔንጌ
(ሉቃ 13:24)

13 “ፀንላ ፔንጌራ ጌሊቴ፤ ጳዮሶ ኤፊዛ ኦጌይ ገታ፤ ፔንጌይካ አሆ፤ ዳር አሳይ ሄ ፔንጌዛራ ጌሊሰ። 14 ዴፖሰ ጋሊዛ ኦጌይ ገዲኮ ፀንላ፤ ፔንጌይካ ፀንላ፤ ጌላናይቲካ ጉላታ ያላላ።

ዋርዶ ናቤታ
(ሉቃ 6:43-44)

15 “ኢሰታሰ ገደ ባጋይ ካና ሱይቲ ማላ ገዲ ኡቲዲኔ ዶርሳ አቲ ማይዒዲ አንቴ ገደ ጌሊዲ ገደራ ኦሊዛ ዋርዶ ናቤታፔ ናጌቲቴ። * 16 አንቴ ኢሰታ፣ ኢሰታ ኦሶን ኤራንዴታ። አጉንላ ዋራፔ ዋይኔይ፣ ኪንዲቾ አጉንላፌ ባላሴ አይፊይ ማጻቲዜ? 17 ሃሳላካ ሎፖ ሚሊ ወሪ ሎፖ አይፊሰ፤ ኢታ ሚሊካ ኢታ አይፊ አይፊሰ። 18 ሎፖ ሚሊ ኢታ አይፊ አይፋናሰ ዳንዳዮንታይሳ ማላ ኢታ ሚሊ ሎፖ አይፊ አይፋናሰ ዳንዳዬና። 19 ሎፖ አይፊ አይፊንታ ሚሊ ወሪካ ቃንጻታናኔ ታማን ዩጌታና። * 20 ሃሳ ገሽ አንቴ ኢሰታ ኢሰቲ አይፊዛ አይፊን ሻኪ ኤራና። *

* 7:12 ሉቃ 6:31 * 7:15 ካና ሱይቲ ኢሲ አሲ ባጋ ጋሞላ ቃላን ሱጴሚ ጌቴቲሰ። * 7:19 ማቶ 3:10፤ ሉቃ 3:9 * 7:20 ማቶ 12:33

21 “ሳሎን ዲዛ ታ ኣዋ ሼኔ ፖሎንታ ዲሼ ታና ጎዶ! ጎዶ! ጊዛይ ወሪ ሳሎ ካዋቱል ጌሌና። 22 ሄ ጋላስ ዳሮቲ ጎዶ! ጎዶ! ኩኒ ኔ ሱንግን ቲንቢቲ ዮቲቤኮኒ? ኔ ሱንግን ዳይዳንሊ ኬሲቤኮኒ? ኔ ሱንግን ዳሮ ማላታ ኣሊቤኮኒ?” ጋና። 23 ሄ ዋዳ ታ ኢስታስ ‘ታ ኢንቴና ሙሌካ ኤሪኬ! ኢንቴ ኢታቲ ታፔ ሃኪቲ’ ጋዳ ቆንጨፍራ ታ ኢስታስ ዮታና።

ኬሌ ኬዲዛ ኤያኔ ኤራ ኣሳ ለሚሶ
(ሉቃ 6:47-49)

24 “ሂስቲኮ ሃይሳ ታ ቃላ ሲይዲ ኦሶን ፔይሺዛይይ ባ ኬሌ ዛላ ቦላ ኬዲዛይ ሚሳቲስ። 25 ዴዎ ኢራይ ቡኪን፤ ሃሮይካ ሃሮቲዳስ፤ ጫርኪይካ ጫርኪዳስ፤ ኬላካ ሱጊዳስ ሺን ዛላ ቦላ ኬዳቲዳ ጊሽ ኩንዲቤና።

26 “ሃይሳ ታ ቃላ ሲይዲ ኦሶንታይይ ጊዲኮ ባ ኬሌ ኣጩ ቦላ ኬዲዳ ኤያ ኣሳ ማላ። 27 ዴዎ ኢራይ ቡኪን ሃሮይካ ሃሮቲዳስ፤ ጫርኪይካ ጫርኪዳስ፤ ሄ ኬላካ ሱጊዳስ፤ ኬላይካ ኢታ ኩንዳላ ኩንዲዳስ” ጊዳስ። 28 ዩሱሲ ታማርሲ ወርሲን ኣሳይ ኢዛ ቲሚርቲዛን ማላሌቲዳስ። 29 ጋሶይካ ሙሴ ዋጋ ታማርሲዛይታ ማላ ጊድንታ ኢዚ ጎዳቲሊ ዲዛ ኣሳ ማላ ታማርሲዳስ።

8

ዩሱሲ ኢንቲራቻ ሃርጌይ ኦይኪዳ ኣዳዛ ፓሊዳስ
(ሉቃ 6:37፣41-42)

- 1 ዩሱሲ ዙማ ቦላፌ ዋዲን ዳሮ ዳሬይ ኢዛ ካሊዳስ።
- 2 ኢሲ ኢንቲራቻ ሃርጌይ ዲዛይይ ዩሱሳኮ ሽቂዲ ኢዛ ሲንግን ጉልባቲዲ “ጎዶ! ኔ ኮይኮ ታና ፓላናስ ዳንዳያሳ” ጊዳስ *
- 3 ዩሱሲ ባ ኩሼ ዩዲዲ “ታ ደሳዲስ፤ ፓዎ!” ጊን ኣዳዚ ሄ ሃርጌዛፔ ሄራካ ፓዲዳስ። 4 ቃሴካ ዩሱሲ ኣዳዛ “ኔ ፓዲዳይሳ ኦናሲካ ዮቶፓ፤ ጊዶ ኣቲን ባዳ ኔና ቄሴስ ቤሳ። ኢስቲ ኣዛዚዳ ያርሾዛ ጋላ፤ ሄሲካ ኢስታስ ማርካ ጊዳና” ጊዳስ።

ዩሱሲ ማቶ ሃላቃዛ ኣሽካራ ፓሊዳስ
(ሉቃ 7:1-10)

* 8:2 ኢንቲራቻ ጊሻ ማፃፋይ ቆንጨሲዛ ማላ ኣሳቲላ ቦላ ቦላራ ጋልባን ኬዚዛ ዲማ ዲማ ሃርጌታ ኡባ ቤሴስ።

5 ዩሱሲ ቁፊርናሆሜ ጋኪዳ ማላ ማቶ ሃላቃይ ኢዛኮ ሸቂዲ ኢዛ ሂዘጊ ዋሲዳስ። 6 “ጎዶ! ታ ኣሸካራይ ኮሂ ሳኬቲዲ ኮላን ኢቲዲ ዳስ” ጊዳስ።

7 ዩሱሲካ ኢዛስ “ታ ባዳ ፓላና” ጊዳስ። 8 ማቶ ሃላቃይ ኢዛስ ዛሪዲ “ታ ኔና ታ ኮሌ ጌልላናስ ቤሲዛዳ ጊዲኮ፤ ጊዶ ኣቲን ኔ ሃን ዳዳ ኢሲ ቃላ ፃላ ጊኮ ታ ኣሸካራይ ፓፃና። 9 ታሰካ ታና ኣዛዚዛ ሃላቃቲ ታፔ ቦላራ ዳቴሰ፤ ቃሴካ ታስ ኣዛዜቲዛ ዋታዳራቲ ታፔ ጋርሳራ ዳቴሰ፤ ኢስታፌ ኢሳ ‘ባ!’ ጊኮ ቤሰ፤ ቃሴ ኢሳ ‘ሃያ!’ ጊኮ ዩሰ፤ ታ ኣሸካራ ‘ሄሳ ኦላ!’ ጊኮ ኦሌሰ” ጊዳስ።

10 ዩሱሲ ኢዛ ዛርዛን ማላሌቲዲ ባና ካሊዛይታስ “ታ ኢንቴስ ቱሙ ጋይሰ፤ ሃራይ ኣቶሽን ኢስራዔሌታ ጊዶን ሃይሳ ማላ ኣማኖይ ዲዛዳ ኢሳዳካ ዳማቤኮ። 11 ታ ኢንቴስ ዮታይሰ፤ ዳሮቲ ኣዋ ኣርሼይ ሞኪዛ ባጋፌኔ ሙሊዛ ባጋፌ ያና። ሳሎ ካዎቴላ ማዳን ኣብራሃሚንታራ ዩሳቃንታራኔ ያቆቤንታራ ኢሲፌ ኡታና። * 12 ሳሎ ካዎቴላ ኢስታስ ጊዳና ቤሲዛ ኣሳቲ ሂን ካሬ ቆማን ዩጌታና። ሂንካ ዩሆይኔ ኣቻ ጋርጨኞ ጊዳና” ጊዳስ። * 13 ዩሱሲካ ማቶ ሃላቃስ “ኔ ባ ኔ ኣማኖ ማላ ኔስ ሃና” ጊዳስ፤ ኣሸካራዚ ሄራካ ፓፂዳስ።

ዩሱሲ ዳርታ ፓሊዳስ
(ማር 1:29-34፤ ሉቃ 4:38-41)

14 ዩሱሲካ ቡር ጳፅርሳ ኮሌ ጌልሺን ጳፅርሳ ቦሎቴያ ሚሾ ሃርጌ ሳኬታዳ ኢቲዳር ቤዩዳስ። 15 ኢዚ ኩሼ ዩሱሲ ቦቲን ሚሾ ሃርጌይ ኣጊዳስ። ኢዛካ ዳንዳዳ ዩሱሳ ሞካዲስ።

16 ሄ ጋላሳ ኦማሪስ ዳይዳንሉ ኦይኪዳ ዳር ኣሳታ ዩሱሳኮ ኤሂዳ። ኢዚካ ቱና ኣያናታ ባ ቃላራ ኢስታፌ ኮሲዳስ፤ ሃርጋንቻታካ ኡባ ፓሊዳስ። 17 ኢሳያሲ “ኢዚ ኑ ሃርጌ ኤኪዳስ፤ ኑ ሳኮካ ቶኪዳስ” ጊዳ ቃላይ ሃይሳን ፖሌቲዳስ።

18 ዳር ኣሳይ ኢዛ ጊዳሊዳይሳ ቢዩዲ ዩሱሲ ኣሳ ኣባፌ ሄ ፒንሐ ፒናና ማላ ኣዛዚዳስ። 19 ሄሳ ዋዳ ኢሲ ኣይሁዳ ኣማኖ ታማርሲዛዳይ ኢዛኮ ሸቂዲ “ኣስታማሬ! ኔ ቢዛሶ ኣዋካ ታ ኔና ካላና” ጊዳስ።

20 ዩሱሲካ ኢዛስ ዛሪዲ “ዎርካናታስ ኦላይ ዳስ፤ ሳሎ ካፎታስ ኮሌ ዳስ፤ ታስ ኣሳ ናስ ጊዲኮ ሁዔ ጌልሊዛሶይ ባዎ” ጊዳስ።

* 8:11 ሉቃ 13:29 * 8:12 ማቶ 22:13፤ 25:30፤ ሉቃ 13:28

21 ኢዛ ካሊዛ ኢሲ ሃራ ኣሲ ቃሴ “ጎደ! ኮይሮ ባዳ ታ ኣዎ ሞጎ?” ገዳሰ። † 22 ኢዚ ቃሴ “ሃይቂዳይቲ ባ ሃይቁል ሞጌቶ፤ ኔኒ ገዲኮ ታና ካላ” ገዳሰ።

ዩሱሲ ኣባ ዳምባላ ጮቡ ሂሰቲዳሰ
(ማር 4:35-41፤ ሉቃ 8:22-25)

23 ሄሳፌ ጉዬ ዩሱሲካ ዎጎሎን ጌሊን ኢዛ ካሊዛይቲካ ኢዛራ ኢሲፌ ቢዳ። 24 ቆፖንታ ኣባ ገደን ዳምባላይ ዴንዲዲ ዎጎሎዮ ሚታና ጋካናሰ ኢሰታ ዋይሲዳሰ። ሄሲ ዉሪ ሃኒሺን ዩሱሲ ጳሰኪዳሰ። 25 ኢዛ ካሊዛይቲ ኢዛ ቤጎልዲ “ጎደ! ኑ ቆዮሰ፤ ኑና ኣሻ!” ገዳ።

26 ዩሱሲካ ኢሰታ “ኢንቴኖ ኣማኖይ ፓጩዳይቶ! ኣዛሰ ሃይሳ ማላ ባቤቲ?” ገዳሰ። ሄሳፌ ዴንዲዲ ጫርኮዛኔ ኣባ ዳምባላ ኢዚ ሃንቂን ሄራካ ሲርጵ ገዳሰ።

27 ኢሰቲካ “ሃይሲ ኣባይኔ ጫርኮይካ ኢዛሰ ኣዛዘቲዛዳይ ኢዚ ዋኒዳዴ?” ገዲ ማላሌቲዳ።

ቱና ኣያናፔ ፓዲዳ ናምቡ ኣሳታ
(ማር 5:1-20፤ ሉቃ 8:26-39)

28 ኢዚ ኣባ ፒኒዲ ጌርጌሴኖኔ ጌቴቲዛ ዴሬ ጋኪዳ ማላ ዳይዳንሊ ኦይኪዳ ናምቡ ኣሰ ዳይቲ ባ ዲዛ ዱፎፔ ኬዚዲ ኢዛራ ገገዳ። ኣሲ ሄ ኦጌዛራ ኣቆናሰ ዳንዳዬቶንታ ማላ ኣሳሰ ዳሮ ኬሂ ሜቶ ገዲ ዳቴሰ። 29 ኢሰቲካ “ዮሳ ናዉ! ኔሰ ኑናራ ኣዛ ኢሲፌቴል ዲዜ? ኑ ዎዳይ ጋኮንታ ዲሺን ኑና ፀጋና ያዲ?” ገዲ ዋሲዳ።

30 ሄን ኢሰታፌ ጉል ሃኪዲ ዳሮ ጉዲንሳ ዉዳይ ኢሲ ቦላ ሄሜቴሰ። 31 ዳይዳንሳቲ ዩሱሳ “ኔ ኑና ኬሳና ገዲኮ ሃይታን ዳሮ ጉዲንሳታን ኑ ጌላና ማላ ኑሰ ፒቃዴ ኢማ” ገዲ ዋሲዳ።

32 ዩሱሲካ ኢሰታ “ቢቲ!” ገዳሰ። ዳይዳንሳቲካ ኢሰታፌ ኬዚዲ ጉዲንሳታን ጌሊዳ። ጉዲንሳቲ ዉሪካ ባ ዲዛሶ ኣፎራ ቢቻርሼ ኣባን ጌሊዲ ሃሳን ሚቴቲዲ ሃይቂዳ።

33 ጉዲንሳ ሃሚዛይቲ ኤሌሊዲ ካታማይ ዲዛሶ ቢዲ ጉዲንሳይ ሃናይሳኔ ዳይዳንሊ ኢሰታ ኦይኪዳ ኣሳታ ቦላ ሃኒዳይሳ ኡባ ኣሳሰ ዮቲዳ። 34 ካታማ ኣሳይ ዉሪ ዩሱሳራ ጋጋናሰ ኬዚዳሰ። ዩሱሳ ቤዩዲኔ ኢሰታ ዴሬ ዩዲ ባና ማላ ኢዛ ዋሲዳ።

† 8:21 ታ ኣዎ ሞጎ? ኢዛ ኣዎይ ሃይቃና ጋካናዉ ሄሚዲ ሃይቂኮ ሞጌ ያናሰ ዲዛ ኢዛ ኣሞዛ ቤሲዛ ሚሳቴሰ።

9

ጉንዳ አዳዛ ፓዖ

(ማር 2:1-12፤ ሉቃ 5:17-26)

1 ሄሳፌ ጉዬ ዬሱሲ አባ ቦላ ዋሳሎራ ፒኒዲ ካሴ ባ ዲዛ ካታማ ዩዴስ። 2 ሄን ኢሲ ጉንዳ አዳዛ፣ አሳይ ሃላራ ቶኪዲ ዬሱሳኮ ኤሂዴስ። ዬሱሲካ ኢስታ አማኖ ቤዪዲ ጉንዳ አዳዛ “አይኮይ ባ፤ ሃይሶ ናዙ! ኔ ናጋራይ አቶ ጌቴቴዴስ” ጊዴስ። *

3 ሄ ዋዴ ሙሴ ዋጋ ታማርሲዛይቲ “ሃይሲ ያሳ ጫሻ” ጊዲ ባ ዋዝናን ቆፒዳ።

4 ዬሱሲ ኢስታ ቆፋ ኤሪዲ “አንቴ ዋዝናን ኢታ ዮዖ አዛሰ ቆፐቲ? 5 ኔ ናጋራይ አቶ ጌቴቴዴስ’ ጉሳፌኔ ‘ዴንዳዳ ባ!’ ጉሳፌ አዋይሲ ካዉሼ? 6 ጊዴ አቲን አሳ ናሰ ቢታ ቦላ አሴ ናጋራፔ ማራናሰ ሽኔይ ዲዛይሳ ኤሪና ማላሳ” ጊዲ ጉንዳ አዳዛ “ዴንዳ! ኔ ሃላ ኤካዳ ጌዴ ኔሶ ባ” ጊዴስ። 7 ጉንዳ አዳዚካ ዴንዲዲ ባሶ ቢዴስ። 8 ዴሪይካ ሄሳ ቤዪዲ ማላላቴፋኒኔ ባቦን ኩሚዲ ሃይሳ ሲሬ ጎዳቴላ አሳሰ አሚዳ ያሳ ጋላቲዴስ።

ዬሱሲ ማቶሳ ያይጊዴስ

(ማር 2:13-17፤ ሉቃ 5:27-32)

9 ዬሱሲ ሄፔ ዴንዲዲ ቢሼ ኢሲ ማቶሳ ጌቴቴዛይይ ቃራፃ ቃንዲሲዛሶን ኡቴዳይሳ ቤዪዲ “ታና ካላ!” ጊን፣ ዴንዲዲ ኢዛ ካሊዴስ።

10 ዬሱሲ ማቶሳሶን ማዳ ቦላ ዲሺን ዳር ቃራፃ ቃራፃዘይቲኔ ናጋራንቻቲ ኢዛኮ ዩዲ ኢዛራኔ ኢዛ ካሊዛይታራ ኢሲፌ ማናሰ ኡቲዳ። 11 ፋርሳዌቲ ሄሳ ቢዪዲ ዬሱሳ ካሊዛይታ “አንቴና ታማርሲዛይሲ ቃራፃ ቃንዲሲዛይታራኔ ናጋራንቻታራ ዋሰቲ ኢስታራ ኢሲፌ ካላ ሚዜ?” ጊ ኦይቺዳ።

12 ዬሱሲካ ኢስቲ ጊዛይሳ ሲይዲ ኢስታ “አኪሜይ ኮሺዛይ ሳኬቲዳይታሰ አቲን ሳኬቶንታ ፓፃታሰ ጊዴና። 13 ሄሳ ጊሽ ‘አንቴ ቢዲ ያርሾ ጊዴንታ ማርቴላ ዶሳይሰ’ ጊዛ ቃላ ቢርሽላ ታማሪቲ። ናጋራንቻታ ያይጋና ያዲሰ አቲን ያሎታ ያይጋናሰ ያቤኬ” ጊዴስ። *

ዬሱሳ ካሊዛይቲ ያማ ያሞንታ ጋሶ

(ማር 2:18-22፤ ሉቃ 5:33-39)

* 9:2 ሃላ፣ ኢሲ ኢሲ ባጋ ጋሞላ ቃላን ሃላ ጉሲ ዛጳ ጉሳ። * 9:13 ማቶ 12:7

14 ግማቁዛ የሃሂሳ ካሊዛይቲ ዩሱሳኮ ዩዲ “ኮኔ ፋርሳዌቲ ያሚሸን ነና ካሊዛይቲ ኣዛሰ ያሜቴኔ?” ጊ ኦይቸዳ።

15 ዩሱሲ ኢሰታሰ “ሚሸራ ላጌቲ ሚሸራዚ ኢሰታራ ዲሸን ሙዞታና ቤሲዜ? ሚሸራይ ኢሰታፊ ኤኬታና ዋዳይ ያና፤ ኢሰቲ ሄ ዋዳ ያማና።

16 “ጋልዓ ማይያ ቦላ ኦራላ ዋሶ ዋሊ ሲኪዛ ኣሲ ዳና። ጋልዓ ቦላ ኦራላ ዋሊ ሲኪኮ ኦራላዚ ጋልዓዛ ፔዴሬላዲ ሃ ዳሲ ዳሪሳና። 17 ኦኒካ ኦራላ ዋይኔ ጫጃ ጋልዓ ሉካሞን ጉጃና። ጉጃዚ ጊዲኮ ሉካሞዚ ጱቃና፤ ዋይኔ ጫጃዚካ ጉካና፤ ሉካሞዚካ ጎዓይ ባይንዳዚ ጊዳና። ጊዶ ኣቲን ኦራላ ዋይኔ ጫጃይ ኦራላ ሉካሞዛን ጉጃቴሰ። ሄሳ ማላራ ዋይኔ ጫጃዚኔ ሉካሞዚ ሎያ ናጌቲዲ ጋሞዓና” ጊዳስ። †

ያዲሮሳ ናዮኔ ዩሱሳ ኣፋላ ማጫራ ቦቸዳ ማጫሳዮ (ማር 5:21-43፤ ሉቃ 8:40-56)

18 ዩሱሲ ኣሳ ሃሳይሶን ዲሸን ኢሲ ሹሜይ ኢዛ ሰንላን ኩንዲዲ “ታሰ ና ዳራ ሃይቃና ጋዉሰ። ኢዛ ገፃ ዳና ማላ ያዳ ኔ ኩሼ ኢዚ ቦላ ዋላርኪ?” ጊን። 19 ዩሱሲ ዳንዲዲ ኢዛራ ቢዳሰ፤ ዩሱሳ ካሊዛይቲካ ኢዛራ ቢዳ።

20 ታማኔ ናሞፀ ላይላ ኩሜላ ኢዚፔ ሱላ ጉኪዛ ኢሲ ማጫሲ ዩሱሳፔ ጉዩራ ያዳ ኢዛ ኣፋላ ማጫራ ቦቸዳሶ። *

21 ኢዛ ሄሳ ኦላዲይ “ታ ኢዛሰ ኣፋላ ማጫራ ቦቸዳኮ ገፃና” ጊዛ ኣማኖይ ኢዚ ዋዝናን ዲዛ ጊሽ ቦቸዳሶ።

22 ዩሱሲካ ጉዩ ሲሚ ጸሊዲ ማጫሳዮ “ኣይኮይ ባ፣ ታ ናዩ፤ ነና ኔ ኣማኖይ ገሊዳሰ” ጊን ማጫሳያ ሄራካ ገፃጋዳሶ።

23 ዩሱሲካ ሹሜዛ ሶ ማታ ጋኪሸን ዳሬይ ዛዩራኔ ዲንኬራ ዋሲሹ ዩኪዛይሳ ቤዒዲ። 24 “ኪቸቲ! ናያ ጳሰካዱሰ ኣቲን ሃይቃቤኩ” ጊን ኢሰቲ ኢዛ ቦላ ሚጪዳ። 25 ዳሬይ ዉሪ ከላፊ ኬዚን ኢዚ ኬሌ ጌሊዲ ናይ ኩሼ ኦይኪዳሰ፤ ናያካ ዳንዳ ኤቃዳሶ። 26 ኢዛ ጎባቴላ ሄ ዳሬ ኡባን ሴቴቲዳሰ።

ዩሱሲ ዱና ዲዳዛኔ ቆቄታ ገሊዳሰ

27 ዩሱሲካ ሄፔ ቢሸን ናሞፀ ቆቄቲ “ዳዉቴ ናዉ! ኦና ማራሪኪ!” ጊዲ ዋሲሹ ኢዛ ጌዶ ካሊዳ።

† 9:17 ሉካሞ፣ ኢሲ ኢሲ ባጋ ጋሞላ ቃላን ኦጎር ጉሳ። * 9:20 ታይ 15:38፤ ዛሬ 22:12

28 ቆቄቲካ ዩሱሲ ጌሊዳ ኩላ ኢዛ ካሊዲ ጌሊዳ። ዩሱሲካ ኢስታ “ታ ኢንቴ ኣይፌ ፓላና ዳንዳዒዛይሳ ኣማኔቲ?” ጌዲ ኦይቹደስ። ኢስቲካ “ኤ፣ ጎደ!” ጌዳ።

29 ሄሳፌ ጉዬ ዩሱሲ ኢስታ ኣይፌ ቦቹዲ “ኢንቴ ኣማኖ ማላ ኢንቴስ ሃኖ!” ጌዳስ። 30 ኢስታ ኣይፌይካ ፃሊደስ። ዩሱሲካ “ሃይሳ ኦኒካ ኤርንታ ማላ” ጌዲ ማንሳ ዮቲደስ።

31 ጌደ ኣቲን ኢስቲ ቢዲ፣ ሄራ ኡባሶን ዩሱሳ ጊሽ ዋራሲዳ። 32 ኢስቲ ሄፕ ኬዚሽን ዳይዳንላ ኦይኪዳ ኢሲ ዲና ዲዴ ኣስ ዩሱሳኮ ኤሂዳ። 33 ዳይዳንላዚ ኬዚዳፕ ጉዬ ሄ ዲና ዲዴ ኣዳዚ ሃሳያ ኦይኪደስ፤ ዴሪዚካ ማላሌቲዲ “ሃይሳ ማላ ሃኖይ ኢስራዔል ቢታን ሃኒን ኦ ቤዪ ኤርኮ” ጌዳ።

34 ጌደ ኣቲን ፋርሳዌቲ ዛራዲ ኢዛ “ዳይዳንላ ኬሲዛይ ዳይዳንላታ ሃላቃና” ጌዳ። *

ዩሱሲ ኣሳሰ ማቹቲደስ

35 ዩሱሲ ኣይሁዳታ ዋሳ ኩላን ኣይሁዳታ ታማርሲሽኔ ያሳ ካዋቲላ ማሽራቾ ቃላ ዮቲሽ ቃሴካ ሃርጌ ኡባፌ ኣሳ ፓላሽ ጉታታን ጉታታን ዩዪደስ። * 36 ኣሳይ ዉሪ ሄሚዛይይ ባይንዳ ደርሳ ማላ ኬሂ ማቶቲቲዲ ፃሊዛይ ባይንዳዴ ጌዲዳይሳ ቤዪዳ ዋዴ ኢስታስ ዳር ማሽቲደስ። * 37 ባና ካሊዛይታስካ “ማፃ ጋኪዳ ካላይ ዳር ሺን ማፂ ሺሺዛይቲ ጉላታ። 38 ሄሳ ጊሽ ካላ ጎዳይ ካላኮ ኦሳንቻታ ዩዳና ማላ ዋሲቲ!” ጌደስ።

10

ዩሱሳ ካሊዛ ታማኔ ናምባታ ኪቴቴላ

(ማር 3:13-19፤ ሉቃ 6:12-16)

1 ዩሱሲ ባና ካሊዛ ታማኔ ናምባታ ባኮ ፃይጊዲ፣ ኢስቲ ቱና ኣያናታ ኬሳና ማላ ቃሴካ ሳኮፔኔ ሃርጌፌ ፓላና ማላ ኢስታስ ጎዳቴላ ኢሚደስ። 2 ታማኔ ናምቡ ሃዋሪታ ሱንላይ ሃይሳፌ ካሊዛይሳ፤ ኮይር ጳፅርሳ ጌቴቲዛ ሲሞና፣ ኢዛ ኢሻ ኢንዲራሳ፣ ዛቢደሳ ና ያቆቤኔ ኢዛ ኢሻ ዮሃኒሳ፣ 3 ፒሊጶሳኔ ባርቴሌሞሳ፣ ቶማሳኔ ቃራፃ ሺሺዛ ማቶሳ፣ ኢልፊዮሳ ና ያቆቤኔ

* 9:34 ማቶ 10:25፤ 12:34፤ ማር 3:22፤ ሉቃ 11:15 * 9:35 ማቶ 4:23፤ ማር 1:39፤ ሉቃ 4:44 * 9:36 ማር 6:34

ታዲሳ፡ 4 ባ ባጋስ ሚሼቲዛ ሲሞናኔ ጉዬፔ ዬሱሳ ሃይቆስ አሉ ኢሚዳ አስቆሮንቶ ዩሁዳ። *†

5 ሃይታ ታማኔ ናሞዓታ ኡባ “ጌዳ አይዛቤታ ጋሐ ቦፒቴ፤ ሳማሪያ አሳ ካታማ ጌሎፒቴ። 6 ጊዶ አቲን ኢሰራዔሌ ዳራ ጋርሳፌ ቆዩዳ ደርሳታኮ ቢቴ። 7 ቢዲኔ ‘ሳሎ ካዎቴሐ ማቲደስ!’ ጊዲ ሳባኪቴ። * 8 ሃርጋንቻታ ጋሊቴ፡ ሃይቂዳይታ ሃይቆፔ ዳንሊቴ፡ እንቺራቻ ሃርጊዛይታ ጌሺቴ፤ ዳይዳንሳታ ኬሲቴ፤ እንቲ ማላ ኤኪዳይሳ ማላ ኢሚቴ፤ 9 ዋርቃ፡ ቢራ ዋይኮ ፃርቂማላ ጊዲን እንቲ ከሴን ኦይኮፍቴ። 10 ኦሳንቻሰ ሃቺሰ ሃቺሰ ጊዲዛዚ ኮሺዛ ጊሽ እንቲ ኦጌስ ጊዲ ሽንቁ፡ ኮሾንታ ማይያ፡ ጫማ ዋይኮ ጉፌ ኤኪ ቦፒቴ። *

11 “ኢሲ ካታማ ዋይኮ ኢሲ ጉታ እንቲ ጌሊዛ ዋዳ እንቲና ሞካናዳ ኮዩ ዳሚዲ ኢዛ ኬላን ሸምፒቴ፤ ሄፔ ኬዛና ጋካናስ ሄን ዲሺቴ። 12 እንቲ ኦና ኬሊካ ጌሊሽ ‘ሳር’ ጊቴ። 13 ሄ ኬላይ ሳርታይ ቤሲዛ ኬሌ ጊዲኮ እንቲ ሳርታይ ሄ ኬላስ ጊዶ፤ ሶርታይ ቤሶንታ ኬሌ ጊዲኮ እንቲ ሳርታይ አጊዲ እንቲሰ ሲሞ። 14 አይ አሲካ እንቲና ሞኪ ኤካናሲኔ እንቲ ጊዛ ሲያናስ ኮኾንታዩ ጊዲኮ ሃሳዴ ኬላፌ ዋይኮ ሄ ካታማፔ ኬዚሽ ኢሰታ ቦላ ዩዛ ጎሜፔ እንቲ ኦቲዳይሳስ ማርካ ጊዳና ማላ እንቲ ቶሆ ቦላ ዲዛ ጉዲላ ፒቲዲ ኬዚቴ። * 15 ታ እንቲሰ ቱሙ ጋይሰ፤ ፐርዳ ጋላስ ሄ ካታማይ ቦላ ጋካና ፐርዳይ ሶዶሜ ቦላን ጋሞራ ቦላ ጋኪዳ ፐርዳፌ ዳያ ጊዳና። *

16 “ታ እንቲና ደርሳ ማላ ካና ሱይቴታ ጊዶራ ኪታይሰ። ሄሳ ጊሽ ሸሻ ማላ ጨንጫታኔ ሃራጴ ማላ አሽኬታ ጊዲቴ። *

17 አሳይ እንቲና ኦይኪዲ ፐርዲዛ ዲላታስ ሽሻና፤ አይሁዳቲ ባ ዋሳ ኬላን እንቲና ጋራፋና፤ ሄሳ ጊሽ ኢሰታፌ ናጌቲቴ። *

18 ታ ጌዶን ዳሬ ሃሪዛይታኮኔ ካዎታኮ እንቲና ኤፋና፤ ኢሰታ

* 10:4 ባ ባጋስ ሚሼቲዛ ሲሞና ሃይሲ ሃ ሱንላይ ጉጃቲዳይ ኢሲ ኢሲ አሳቲ ኢዚ ባ ሃይማናቴዛስ ሚሼቲዛ ጊሻሳ ጌቲሰ። ሃራቲ ቃሴ ኢዚ ኢሲ አሳ አይሌቴላፌ ኬሲዛ ኢሲ ዲርጂቲ ጊዶን ዲዛ ጊሻሳ ጌቲሰ። † 10:4 አስቆሮንቶ ሃይሳ ሃ ቃላ ጊሽ ሸቂዛ ናሞዎ ቆፋቲ ዳቲሰ፤ ኢሶይ ዩሁዳይ አስቆሮንቶ ጊዛ ዳሬፔ ዩዳይሳ ቤሳናስ ጎጻቲሽን ሃራይቲ ቃሴ ዩሁዳ፡ ዋርዳንቻኔ ባሌሊዛይሳ ጊዲ ጫያናስ ጎጻቲዛ ሱንላ ጌቲሰ። * 10:7 ሉቃ 10:4-12 * 10:10 1ቆር 9:14፤ 1ባሞ 5:18 * 10:14 ሃዋ 13:51 * 10:15 ማቶ 11:24 * 10:16 ሉቃ 10:3 * 10:17 ማር 13:9-11፤ ሉቃ 12:11-12፤ 21:12-15

ሲንጠራይ ኣማናንታ ኣሳታ ሲንጠራይ ኢት ማርካ ጊዳና። 19 ኢትና ኢስት ኦይኪዛ ዎዴ ኙ ኣይ ጊ ሃሳዪና? ዎዘጊ ዛሮ ኢሚና? ጊ ሂርጎፍቴ። ሄ ዎዴ ኢት ጋናዚ ኢትጠሰ ኢሚታና። 20 ኢትናን ሃሳዪናይ ኢት ኣዎ ኣያናፕ ኣትን ኢትና ጊዴኬታ።

21 “ኢሻይ ባ ኢሻ ሃይቆስ ኣሊ ኢማና፤ ኣዎይ ባ ና ቦላ፡ ናይቲ ባና ዬሊዳይታ ቦላ ማካላቴላን ዴንዲዲ ሃራ ኣሳን ዎዲሳና። 22 ታ ጊሽ ኣሲ ዉሪካ ኢትና ኢፃና። ጊዶ ኣትን ዉርሴል ጋካናስ ሚቅኒ ኤቁዳይ ኢዚ ኣታና። * 23 ኣሳይ ኢትና ኢት ዲዛ ሄራፕ ጎዲኮ ሃራሶ ኪቹቴ! ታ ኢትጠሰ ቱሙ ጋይስ፤ ኢት ኢስራዔሌ ካታማ ኡባ ጋኮንታ ዲሺን ታ ኣሳ ናይ ያና።

24 “ኢሻካራይ ጎዳፕ ዎይኮ ካሊዛዴይ ካሌሊዛዴፌ ኣዴና። * 25 ታማሪይ ባና ታማርሲዛይሳ ማላ ዎይኮ ኢሻካራይ ጎዳ ማላ ጊዲኮ ሄሲ ኢዛስ ጊዳና። ኬላ ኣዎ ‘ቢዔሊዜቡላ’ ጊኮ ሶ ኣሳ ኣይሲ ሃሳፌ ኢታ ጌቴኔ! *

26 “ሄሳ ጊሽ ኢስታስ ባቦፍቴ፤ ጌሜቲዳይ ቆንጮንታ ቆቴቲዳይ ጌሽ ኬዘንታ ኣቴና። * 27 ታ ኢትጠሰ ዲማራ ዮቲዳይሳ ፖፖን ሃሳዪቴ፤ ሃይላን ሲዱዳይሳ ቆንጮን ሃሳዪቴ። 28 ኢሻ ዎዲኮፌ ኣትን ሺምፖ ዎዲናስ ዳንዳዮንታይታስ ባቦፍቴ፤ ሃሳፌ ኣሾኔ ሺምፖ ጋሊ ጋናሜ ታማን ዳይሳናስ ዳንዳዪዛይሳስ ባቢቴ። 29 ኢሲ ሳንቴን ባይዜቲዛ ናምዑ ሲኔ ካፎታፕ ኢሲኒያካ ኢት ሳሎ ኣዎ ሺኔይ ባይንዳ ጮ ኩንዳ ኣቱኩ። † 30 ሃራይ ኣቶ ሺን ኢት ሁዔ ቢናናይካ ታዩቦን ዴስ። 31 ሃሳ ጊሽ ባቦፍቴ። ዳር ሲኔ ካፎታፕ ኢት ዎጋይ ኣዲ ቦንቹቲዳዛ።

32 “ኣሳ ሲንጠራይ ታስ ማርካቲዛዴስ ታካ ሳሎን ዲዛ ታ ኣዎ ሲንጠራይ ኢዛዴስ ማርካታና። 33 ቃሴ ኣሳ ሲንጠራይ ታና ካዲዳይ ታካ ሳሎን ዲዛ ታ ኣዎ ሲንጠራይ ኢዛ ካዳና። *

34 “ታ ቢታ ቦላ ሳርቴል ኤሃናስ ዩዳ ኢትጠሰ ሚሳቶፖ፤ ማሻ ኤሃናስ ኣትን ሳርቴል ኤሃናስ ያቤኬ። 35 ታኒ ዩዳይ ና ኣዎፕ፤ ማጫ ና ኣዩፕ፤ ና ማቾ ቦሎቲፕ ሻካናሳ። 36 ኣሳስ ዎርኬይ ሶ ኣሳ ጊዳና።

* 10:22 ማቶ 24:9፤ ማር 13:13፤ ሉቃ 21:17 * 10:24 ሉቃ 6:40፤ ዮሃ 13:16፤ 15:20 * 10:25 ማቶ 9:34፤ 12:24፤ ማር 3:2፤ ሉቃ 11:15 * 10:26 ማር 4:22፤ ሉቃ 8:17 † 10:29 ሲኔ ካፎ ኢሲ ኢሲ ባጋ ጋሞል ቃላን ሲኔ ጊዛይሲ ጋሺ ካፎ ጉሳ። * 10:33 2፻ም 2:12

37 “ታፔ አሉዲ ባ አዋ ወይኮ ባ አዮ ሲቁዛዴይ ታስ ጊዳናስ ቤሴና። ታፔ አሉዲ ባ አቱማ ና ወይኮ፣ ማጫ ና ሲቁዛዴይ ታስ ጊዳናስ ቤሴና። 38 ባ ማስቃሌ ቶኪዲ ታና ካሎጎታ ኣሲ ታስ ጊዳናስ ቤሴና። * 39 ባ ሼምፖ አሻናስ ኮዩዛዴይ ዳይሴሰ፤ ባ ሼምፖ ታ ገሽ አሉ አሚዛዴይ አሼሰ። *

40 “አጎቴና ሞኪ ኤኪዛዴይ ታናካ ሞኪ ኤኬሰ። ታና ሞኪ ኤኪዛዴይ ታና ከቲዳዳካ ሞኪ ኤኬሰ። * 41 ኢሲ ናቤ ናቤቴላን ሞኪ ኤኪዛዴይ ሄ ናቤዛ ዋጋ ዳማና። ዲሎ አስ ኢዛ ዲሎቴላ ገሽ ሞኪ ኤኪኮ ሄ ዲሎዛ ዋጋ ኤካና። 42 ሄሳ ገሽ ታ አጎቴሰ ቱሙ ጋይሰ፤ ኦኒካ ሃይታ ጉላታፔ ታና ካሊዛዴ ጊዲዳ ገሽ ኢሲ ፀዓ ኢርፃ ሃላ ኡሺኮ ሂኒሰካ ዋጋይ ዳዬና” ጊዳሰ።

11

ፃማቁዛ ዮሃኒሲ ከቲዳ አሳታ
(ሉቃ 7:18-35)

1 ዬሱሲካ ባና ካሊዛ ታማኔ ናምዑ አሳታሰ አዛዘ አሚ ወርሲዳፔ ጉዬ ታማርሳናሲኔ ሳባካናስ ጋሊላን ዲዛ ካታማታ ቢዳሰ።

2-3 ዮሃኒሲ ቃሾ ከላን ዲሼ ኪርሰቶሳስ ኦሊዛ ሃናታ ሲይዲ ባና ካሊዛይታ ኢዛኮ ዬዲዲ “አሲ አሺዛዴይ ያና ጌቴቴዳይ ኔኔዬ? ሃራ ናጊኖ?” ጊዲ ኦይቺዳሰ።

4 ዬሱሲካ ዛሪዲ “ቢዲ አጎቴ ሲዳይሳኔ አጎቴ ቤዬዳይሳ ዮሃኒሳስ ዮቴቴ። 5 ቆቁቴ ያሌቴሰ፤ ዎቤቴ ሃሙቴቴሰ፤ አጎቶራቻ ሃርጊዛይቲ ፓፀቴሰ፤ ቱሌቴ ሲዬቴሰ፤ ሃይቁዳይቲ ሃይቆፔ ፓፂ ዳንዴቴሰ፤ ማንቆታሰ ሚሺራቾ ቃላይ ዮቴቴሰ። 6 ታናን ዲዲቶንታዳይ አንጃቴዳዳ” ጊዳሰ።

7 ዮሃኒሳ ካሊዛይቲ ቢዳፔ ጉዬ ዬሱሲካ አሳሰ ዮሃኒሳ ገሽ “አይ ቤያናስ ዲጌ ባዘ ቢዳቴ? ጫርኮይ ቃሊዛ ሾምቦቆ ቤያናስ ዩዳቴ? 8 ዎይኮ አይ ቤያናስ ከዚዳቴ? ሎፖ ማይፖ ማይዒዲ ሎዒ ኡቲዳዴ ቤያና ዩዳቴ? ሎፖ ማይፖ ማይዒዲ ሎዒዛይቲ ካዎታ ከላን ዳቴሰ። 9 ሂሰቲን አይ ቤያና ከዚዳቴ? ናቤ ቤያና ከዚዳቴ? ኤ፣ ታ አጎቴሰ ጋይሰ ናቤፔ አዲዛይሳ ቤያናሳ።

10 “ኔ ባና ኦኔ ኔሰ ጊሊሳናዴ ኔፔ ካሴታ ታ ኔሰ ከታና

* 10:38 ማቶ 16:24፤ ማር 8:34፤ ሉቃ 9:23 * 10:39 ማቶ 16:25፤ ማር 8:35፤ ሉቃ 9:24፤ 17:33፤ ዮሃ 12:25 * 10:40 ማር 9:37፤ ሉቃ 9:48፤ ዮሃ 13:20

ጌቴቴዲ ኢዛ ጊሽ ካሴ ፃፌቴዲዳይ ኢዛኮ!'
ጊዴስ። 11 ታ ኢንቴስ ቱሙ ጋይስ፤ ማጫሳፔ ዩሌቴዲ አሳፔ ፃማቁዛ ዮሃንሳ ሚሳቴዛ አሲ ቢታ ቦላ ዴንዲቤና። ጊዲኮካ ያሳ ካዎቴላን አሰ ኡባፌ ላፋ አሲ ዮሃንሳፔ አቆና።

12 “ፃማቁዛ ዮሃንሳ ዎዴፔ ሃ ሲሚን ሃዲ ጋካናስ ሳሎ ካዎቴላያ ዳሮ ባጭታ ቦላ ዳዉስ። ሚና አሳቴ ፃላ ኢዛ ዴማና።
13 ናቤቴካ ሙሴ ዎጋይካ ዉሪ ዮሃንሳ ዎዴ ጋካናስ ቡሮፔ ሃናናይሳ ዮቴዳ። 14 ሂሰቴኮ ኢንቴ ኤካና ኮይኮ ኢዚ ያና ጌቴቴዲ ኤላሲ ኢዛኮ! * 15 ሲዱዛ ሃይሊ ዲዛ አሰ ሲዮ!

16-17 “ሃይሳ ሃ ዎዴ አሳ አዛን ለሚሰ? ጊያን ኡቴዲ ባ ላጌታ ኅ ኢንቴስ ዲሊ ዲዲን ኢንቴ ዲርቤኬታ! ዬሆ ዚላልል ዚላሊን ዬኪቤኬታ!’ ጊዛ ናይታ ሚሳቴቴስ። 18 ዮሃንሲ ሙሳፌኔ ኡሻፌ ናጌቴዲ ዬዳ ጊሽ ‘ኢዚ ዳይዳንፋራ ዴስ’ ጊዳ። 19 ታ አሳ ናይ ማሼኔ ኡያሼ ዬን ‘ሃይሲ ሚዲ ካሎንታ አሳ፣ ኡሻንቻ፣ ቃራፃ ሺሺዛይታሲኔ ናጋራንቻታሰ ላጌኮ!’ ጊዳ። ጊዶ አቴን ያሳ ኤራቴሊ ባ ኦሶን ጂላዲስ” ጊዴስ።

**አማኖንታ ኢጂዳ ጊሽ ዋላሴቴዳ ካታማታ
(ሉቃ 10:13-15)**

20-21 ሄሳፌ ጉዬ ዬሱሲ ኢዚ ማላታታ ኦሊዳ ካታማ አሳይ ማሮቴላን ጌሎንታ አጊዳ ጊሽ “ኩራዚኔኔ ቤቴሳይዳ! ኢንቴና አዬ አና! ኢንቴ ቦላ ኦሴቴዳ ማላታይ ጂርሴ ቦላኔ ሲደና ቦላ ኦሴቴዳኮ ኢሰቴ ማቃ ማይዲዲኔ ቢዲንሳን ኡቴዲ ቤኒ ቤኒ ማሮቴላን ጌላናኮሺን። * 22 ሄሳ ጊሽ ታኒ ኢንቴስ ጊዛይ ፒርዳ ጋላስ ኢንቴፌ አቋ ጂርሴሲኔ ሲደናስ ቁፃቴይ ካዉያና።

23 “ሃኔ ቂፊርናሆሜ ፑዴ ሳሎ ቆቁ ቆቁ ጋናስ ኮያዲ? ጊዶ አቴን ኔኒ ዲጌ ሲዶሌ ዎቆንዳሳ፤ ኔ ቦላ ኦሴቴዳ ማላታይ ሶዶሜን ኦሴቴዳኮ ሶዶሜይ ሃቺ ጋካናስ ዳናኮሺን። 24 ሄሳ ጊሽ ታ ኔና ጊዛይ ፒርዳ ጋላስ ቁፃቴይ ኔፔ ሶዶሜስ ካዉያና” ጊዴስ። *

**ከርሰቶሲ አሚዛ ሸምፖ
(ሉቃ 10:21-22)**

25 ሄ ዎዴ ዬሱሲ “ሳሎኔ ሳዓ ጎዶ! ታ አዎዉ! ሃይሳ ዳሮ ኤራንቻታፔኔ ጨንጫታፔ ቆታዳ ቂሪ ናይታሰ ኔ ቆንጨሲዳ ጊሽ

* 11:14 ማቶ 17:10-13፤ ማር 9:11-13 * 11:20-21 ማቃ ጊዛይሲ ኢሲ ኢሲ ባጋ ጋሞላ ቃላን ዋሮ ጌቴቴስ። * 11:24 ማቶ 10:15፤ ሉቃ 10:12

ታ ኔና ጋላታይስ። 26 ታ አዋዉ! ኤ ሃይሲ ኔ ሲንላን ሎፖ ኔ ሼኔ ጊዲዲ ቤቲደስ።

27 “ወሪካ ታ አዋፔ ታስ ኢሜቲደስ፤ አዋፔ ኣቲን ናዛ ጊሽ ኤሪዛ ኣስ ባዋ፤ ቃሴ ናዛፔኔ ናዚ ባ ሼኔን ቆንጨሲዳ ኣሳፔ ሃራይ አዋ ኤሪዛ ኣስ ባዋ። *

28 “ቶሆይ ዳዲዳይቶ፣ ዳቡሪዳይቶ ኢንቴ ወሪካ ታኮ ሃ ዪቴ፤ ታካ ኢንቴስ ሼምፖ ኢማና። 29 ታ ቃምባራ ቶኪቴ፤ ታፔካ ታማሪቴ፤ ታኒ ታ ዎዝናን ኣዳኔ ኣሽኬ፤ ኢንቴ ሼምፖስ ኢንቴ ሼምፖ ዳማና። 30 ታ ቃምባራይ ሻይኮኔ ታ ቶሆይ ካዉሻ” ጊደስ።

12

ሳምባታ ጊሽ ሸቂዳ ኦይሾ

(ማር 2:23-28፤ ሉቃ 6:1-5)

1 ሃሳፌ ጉዬ ዩሱሲ ሳምባታ ጋላስ ካላ ጊደራ ኣጲ ቢደስ። ኢዛ ካሊዛይቲካ ጋፊዳ ጊሽ ቲያ ዲሊዲ ሸጌቹ ሙስ ኦይኪዳ።

2 ፋርሳዊቲ ሃሳ ቤዪዲ ዩሱሳ “ሂኮ ኔና ካሊዛይቲ ሳምባታ ጋላስ ኦሌታናስ ቤሶንታይሳ ኦሌቴስ” ጊዳ።

3 ኢዚካ ኢስታስ ዛሪዲ “ዳወቴይኔ ኢዛራ ዲዛ ኣሳቲ ጋፊዳ ዎዴ ኢዚ ኣይ ኦሊዳኮኔ ናባቢቤኬቲ? 4 ያሳ ኬሌ ጌሊዲ ቁሴታፔ ኣቲን ዳወቴይኔ ኢዛራ ዲዛይቲ ቦቻናስ ቤሶንታ ዲማቲዳ ኡኬላ ሚደስ።

5 ቃሴ ቁሴቲ ሳምባታ ሻሪዲ ያሳ ኬላ ጊደን ኦሶ ኦሊኮ ሞሮ ጊደንታይሳ ሙሴ ዎጋፔ ናባቢቤኬቲ?

6 ጊዲኮካ ታ ኢንቴስ ጊዛይ ያሳ ኬላፊ ኣጲዛይይ ሃን ደስ።

7 ‘ታኒ ያርሾ ጊደንታ ማሮቴላ ደሳይሰ’ ጊዛ ቃላይ ኣይ ጉሲኮኔ ኢንቴ ኤሪዛኮ ዓሎታ ቦላ ፐርዴኬታኮሺን። * 8 ኣሳ ናይ ሳምባታስ ሳዳ” ጊደስ።

9 ሃፔ ኢዚ ጌዴ ኣጲሽ ኣይሁዳታ ዎሳ ኬላን ጌሊደስ።

10 ሃንካ ኢሲ ኩሼ ሲሊዳይይ ደስ። ዩሱሳ ሞታናስ ጋሶ ኮይዲ “ሳምባታ ጋላስ ጋላናስ ቤሲኬ?” ጊዲ ኢዛ ኦይቹደስ።

11 ኢዚካ ኢስታ “ኢንቴፊ ኢሳዴ ዶርሲ ሳምባታ ጋላስ ኦላን ጌሊኮ ባ ዶርሳ ኢዚ ጌሊዲ ኦላፊ ሳቹ ኬሲ ኤሬኔ? *

12 ሂስቲኮ ኣሲ ዶርሳፊ ኬሂ ኣጴኔ? ሃሳ ጊሽ ሳምባታ ጋላስ ሎፖ ኦሶይ ዲጌቴና” ጊደስ። 13 ቃሴካ ኣዴዛ “ኔ ኩሼ

* 11:27 ዮሃ 3:35፤ 1:18፤ 10:15 * 12:7 ማቶ 9:13 * 12:11 ሉቃ 14:5

ፒዲሳ!” ገደሰ፤ አዳዚካ ባ ኩሼ ፒዲሲን ሂንኮ ኩሼዛ ማላ ፓፃ ገዲደሰ። 14 ገደ አቲን ፋርሳዌቲ ሄፔ ኬዚዲ፣ ዩሱሳ ዋሰቲ ኦይኪ ዋፋናኮኔ ባ ገደን ዘሬቲዳ።

ፆሲ ደሪዳ አሽካራ

15 ዩሱሲ ኢሰታ ቆፋ ኤሪዲ ሄፔ ሃራሶ ሸርዒ ገደሰ። ዳር ዴሬይ ኢዛ ካሊደሰ፤ ሃርጋንቻታካ ኡባ ፓሊደሰ። 16 ኢዚ ኦናኮኔ አሳሰ ዮቶንታ ማላ ኢሰታ አዛዚደሰ። 17-21 ሄሲካ ሃኒዲይ ናቤ አሳያሳን

“ታ ደሪዳይኔ

ታ ኢዛን ኡፋዬቲዛ ታ ናይ ሃይሳኮ!

ታ አያናፔ ታ

ኢዛ ቦላ ዋፋና፤

ኢዚካ አማኖንታ ዴሬታሰ ቱሙ ፐርዳ አዋጃና፤

ማርሼቴና፤ ዋይኮ ዋሲና።

ኢዛሰ ቃላይካ ካሬን ሰዬቴና፤

ቱማ ፐርዳ ፆና ጋፋና ጋካናሰ

ዲንጨቲ ኡቲዳ ሸምቦቆካ ሚንፎናኔ

ጨዋቲዛ ሙቃዳካ ቶይሴና፤

አይዘበቲ ኢዛ ኡፋይሳን ናጋና”

ጌቴቲ ዮቴቲዳ ቲንቢቴ ቃላይ ፖሌታና።

ዩሱሳኔ ቢዔሊዜቡላ

(ማር 3:20-30፤ ሉቃ 11:14-23)

22 ሄሳፌ ጉዬ ዳይዳንሉ ኦይኪን ፆላናሲኔ ሃሳያናሰ ዳንዳዮንታ ኢሲ አሰ ዩሱሳኮ ኤኪ ዩዳ። ዩሱሲካ ኢዛ ፓሊን አዳዚ ፆላናሲኔ ሃሳያናሰ ዳንዳዩደሰ። 23 አሳይ ዉሪካ ማላሌቲዲ “ሃይሲ አዳዚ ዳዉቲ ናሻ?” ገደሰ።

24 ገደ አቲን ፋርሳዌቲ ሄሳ ሲዩዳ ዋዴ “ሃይሲ አዳዚ ዳይዳንሉ ኬሲዛይ ዳይዳንላ ሃላቃ ቢዔሊዜቡላ ዋልቃን ፃላ ገዳናሰ ቤሴሰ” ገዳ። *

25 ዩሱሲካ ኢሰታ ቆፋ ኤሪዲ “ባ ገደን ኢሶይ አሳፌ ሻኬቲዛ ካዋቴሉ ዉሪካ ኩንዳና፤ ባ ገደን ሻኬቲዛ ካታማይ ዋይኮ ኬላ አሲ ሚኔና። 26 ፃላዔይ ፃላዔ ኬሲዛ ገዲኮ ፃላዔይ ባ ገደን ሻኬቲደሰ ጉሳ። ሄሳሶ ሃኒኮ ኢዛ ካዋቴሉ ዋኒ ሚናና ዳንዳዩዜ? 27 ታኒ ቢዔሊዜቡላ ዋልቃን ኬሲዛ ገዲኮ ኢንቴ ናይቲ አዛ ዋልቃን ኬሳኔ? ሄሳ ገሽ ኢንቴ ናይቲ ኢንቴ ቦላ ፐርዳና። 28 ገደ

* 12:24 9:34፤ 10:25

አቲን ታኒ ዳይዳንል ኬሲዛይ ፆሳ አያናን ገዲኮ ፆሳ ካዎቴሌ ኢንቴኮ ዪዴሰ ጉሳ።

29 “ዎይኮ ኢሲ አሰ ዎልቃራ ዲዛይ ኬሌ ገሊዲ ሚሼ ሆንቃና ኮይኮ ካሴቲዲ ሄ ዎልቃራ ዲዛ ኣዴዛ ኦይኪ ቃቸንታ ዎሰቲ ሆንቃን? ቃቸዳፔ ጉዬ ሆንቃና ዳንዳዬሰ።

30 “ታናራ ገደንታዳይ ታናራ ኤቁቴሰ፤ ታናራ ኢሲፌ ሺሾንታ አሲ ዉሪካ ላሌሰ። * 31 ሄሳ ገሸ ታ ኢንቴሰ ቱሙ ጋይሰ፤ ናጋራ ኦሶይኔ ጫሺ ዉሪ አሳሰ አቶ ጌቴታና ሺን ዲሎ አያና ጫዩዳዳይ ማራቴና። 32 አይ አሲካ አሳ ና ሶላ ሃሳዩዛ ኢታ ቃላ ገሸ ማራታና ሺን፣ ዲሎ አያና ሶላ ሃሳዩዛ ኢታ ቃላይ ገዲኮ ሃይሳ ሃ ዎዴን ገዲን ዎይኮ ቡሮ ያና ዎዴን ገዲን ማርይ ዴና። *

ሎዎ ሚሊ ሎዎ አይፌን ኤሬቴሰ
(ሉቃ 6:43-45)

33 “ሚሊ ዉሪ አይፌን ኤሬቴዛይሳ ማላ ኢንቴ ሎዎ አይፌ ዴማናሰ ኢንቴሰ ሎዎ ሚሊ ዴ፤ ኢንቴሰ ኢታ ሚሊ ዲዛ ገዲኮ ኢንቴ ኢታ አይፌ ኤካና። * 34 ኢንቴኖ ማርኼራ ዲዛ ሾሻቶ! ኢንቴ ኢታታ ገዲ ኡቲዲ ዎሰቲ ሎዎ ሃሳያናሰ ዳንዳዬቲ? ኡሎ ገደን ኩሚዳዚ ዲናራ ሃሳዬቴሰ። *

35 “ሎዎ አሲ ባ ዎዝናን ኩንሊ ዎሊዳ ሎዎ ቆፋፔ ሎዎ ሃሳዬሰ፤ ኢታ አሲካ ባ ዎዝናን ኩንሊ ዎሊዳ ኢታቴላፌ ኢታ ዮዎ ኬሴሰ። 36 ገደ አቲን ታ ኢንቴሰ ገዛይ አሳይ ባ ሃሳዩዳ ሃዳ ቃላ ኡባ ገሸ ፐርዳ ጋላሰ ዉሪካ ኦይሼታና። 37 ጋሶይካ ኔ ቃላፔ ዴንዲዳይሳን ኔ ዲላዳ አታና ኔ ቃላፔ ዴንዲዳይሳን ኔ ሶላ ፐርዳታና” ገዴሰ።

ማላታ ቤያናሰ ሺቁዳ ኦይሾ
(ማር 8:11-12፤ ሉቃ 11:29-32)

38 ሄሳፌ ጉዬ ኢሲ ኢሲ ሙሴ ዎጋ ታማርሲዛይቲኔ ፋርሳዌቲ ዬሱሳ “አሰታማሪ! ኦ ኔፔ ማላሊሲዛ ማላታ ቤያናሰ ኮዮሰ” ገዴ። * 39 ኢዚ ኢሰታሰ ዛሪዲ “ሃ ኢታኔ ላይማ ዬሌታይ ማላታ ኦይቼሰ፤ ገደ አቲን ናቤ ዮናሳ ማላታፔ አቲን ሃራ ማላታይ ኢሜቴና። * 40 ዮናሲ ገታ ዋሌ ኡሎ ገደን ሄዙ ቃማኔ ሄዙ

* 12:30 ማር 9:40 * 12:32 ሉቃ 12:10 * 12:33 ማቶ 7:20፤ ሉቃ 6:44 * 12:34 ማቶ 3:7፤ 23:33፤ 15:18፤ ሉቃ 3:7፤ 6:45 * 12:38 ማቶ 16:1፤ ማር 8:11፤ ሉቃ 11:16 * 12:39 ማቶ 16:4፤ ማር 8:12

ጋላስ ጋምቧዳ ማላ አሳ ናይካ ሄቩ፡፡ ጋላሲኔ ሄቩ፡፡ ቃማ ቢታ ጋርሳን ጋምባና፡፡ 41 ናናዌ አሳይ ፐርዳ ጋላስ ሃይሳ ሃ ዩሌታራ ዴንዲዲ ሃ ዩሌታ ቦላ ፐርዳና፤ ጋሶይካ ናናዌ አሳይ ዮናሳ ማርካቴላን ማርቴላ ጌሊዳ ገሻሳ፡፡ ሄኮ ዮናሳፔ አጁዛይይ ሃን ዴስ፡፡ 42 ዱጌሃ ዴሬ ካዎያ ሶሎሞኔ ኤራቴላ ሲያናስ ቢታ ጋፃፔ ዴንዳዳ ዩዳ ገሽ ፐርዳ ጋላስ ኢዛ ሃይሳ ዩሌቴላራ ዴንዳዳ ሃ ዩሌቴላ ቦላ ፐርዳና፡፡ ሄኮ ሶሎሞኔፔ አጁዛይይ ሃይሳን ዴስ፡፡

43 “ቴና አያናይ አሳፔ ከዚዲ ሸምፖ ዴማናስ ሃላ ባይንዳ ማላ ቢታን ዳቡሬስ፡፡ ጊዶ አቴን ባ ኮዩዛ ሸምፖ ዴማና፡፡ 44 ሃሳፌ ቃሴ ካሴ ታ ዲዛሶ ሲማ ባና ጊዲ ቤኒሶ ኢዚ ሲሚሽን ካሴ ኢዚ ዲዛሶይ አይኮይኔ ባይንዳ ማላ ከሌ ጊዲዲ ጌዩዳይሳኔ ጊጌቴ ዲዛይሳ ዴማስ፡፡ 45 ሃሳፌ ቢዲ ሃራ ባፔ አቴዛ ላፑን ኢታ አያናታ ባናራ ኤኪዲ ዩስ፡፡ ኢሰቴካ ሄ አዴዛን ጌሊዲ ዴዳና፡፡ ሄ አዴዛስ ካሴ ዲሳፌ ጉዩ ዲሳይ ኢታ ጊዳና፡፡ ሃይሳ ኢታ ዩሌቴላሰካ ሃሳ ማላ ሃናና” ጊዴስ፡፡

ዩሱሳ አዩዮኔ ኢዛ ኢሻታ
(ማር 3:31-35፤ ሉቃ 8:19-21)

46 ዩሱሱ አሳስ ዮቴሽን ኢዛ አዩያኔ ኢሻቴ ኢዛ ዮቻና ኮይዲ ካሬን ኤቂዳ፡፡ 47 ኢሲ አሲ “ሄኮ ኔ አያኔ ኔ ኢሻቴ ኔና ሃሳዩሳናስ ካሬን ኤቂዲ ኔና ኮዩቴስ” ጊዴስ፡፡ *

48 ዩሱሱካ “ታ አያ ኦኔ? ታ ኢሻቴቹ፡ ኢሰቴ ኦናንቴ?” ጊዴስ፡፡ 49 ባ ኩሼራ ባና ካሊዛይታኮ ማላቴዲ “ታ አያኔ ታ ኢሻቴ ሃይታንታ፡፡ 50 ሳሎን ዲዛ ታ አዋ ሸኔ አሊዛይቴ ዉሪካ ታስ ኢሻ፡ ሚቾኔ አዮ” ጊዴስ፡፡

13

ዜሬላ ዜሪዛዳ ለሚሶ
(ማር 4:1-9፤ ሉቃ 8:4-8)

1 ሄ ጋላሲ ዩሱሱ ከላፌ ካሬ ከዚዲ አባ ላንቄን ኡቴዴስ፡፡
2 ዳር ዴሬይ ኢዛ ዩዩ አጁ ጊዶሊዳ ገሽ አሳ አባ ጋፃን አጊዲ ዋሳሎ ጊዶ ጌሊ ኡቴዲ፡፡ * 3 ዳር ዮፖ ለሚሶራ “ኢሲ ጎሻንቻይ ዜሬላ ዜራናስ ከዚዴስ፡፡ 4 ኢዚ ዜሪሸን ኢሲ ኢሲ ዜሬላ ኦጌ ዲናን ዎጂን ካፎቴ ዩዲ ማፀ ሚዳ፡፡ 5 ኢሲ ኢሲ ዜሬላ ማላኔ

* 12:47 ኢሲ ኢሲ ገሻ ማፃፊታን ጋይዶ ኦይዲ ታማኔ ላፑና ቦላ ዲዛ ቃላይ ዴና፡፡ * 13:2 ሉቃ 5:1-3

ሹቻቸዛ ቢታ ቦላ ዋዲን ቢታይ ማላ ቢታ ገዲዳ ገሽ ኤሌ ጫሪዳ።⁶ ገደ ኣቲን ኣዋይ ኣዋቲን ሹሊዲኔ ፃፅ ዩደንታ ኣገዳ ገሽ ማሊዳ።⁷ ኢሲ ኢሲ ዜሬላይ ኣገንፋ ገደን ዋዲዳ፤ ኣገንፋይካ ዲጪዲ ጫሪቻ ጩሊዳ።⁸ ሃራ ዜሬሊካ ሎዖ ኦርዳ ቢታን ዋዲዲ ኣይፊካ ኣይፊዳ፤ ኢሶይ ፃቱ፣ ኢሶይ ኡሱፑን ታሙ ኢሶይ ሃቡ ታሙ ኣይፊ ኢሚዳ።⁹ ሲዩዛ ሃይሉ ዲዛይይ ሲዮ!” ገ ዮቲዳ።

¹⁰ ሃሳፌ ኢዛ ካሊዛይቲ ኢዛኮ ሸቂዲ “ኣዛሰ ለሚሶራ ዮታይ?” ገዳ።

¹¹ ኢዚካ ኢሰታሰ “ሳሎ ካዋቲላ ፀራ ኤሮይ ኢንቴሰ ኢሚቲዳ፤ ኢሰታሰ ገዲኮ ኢሚቲቤና።¹² ዲዛዳ፤ ዲዛይሳ ቦላ ጉጃታና ኣራና ሸን ባይንዳዳፊ ሃና ዲዛራካ ኤኬታይቻና። *
¹³ ታ ሃይሳሎ ለሚሶራ ዮቲዛይ ኢሰቲ ሲዩሽ ኤዘጎንታ ገሸኔ ፃሊሽ ዳሞንታ ገሻሳ።

¹⁴⁻¹⁵ “ኢሳያሲ
ኣንቴ ሲሳ ሲያናሽን ዩሽ ቆፕኬታ፤
ፃሎ ፃላና ሸን ዋዘናን ዋሌኬታ፤
ዳሬዛ ዋዘናይ ሙሚዳ፤
ኢሰታ ሃይላይካ ሲዩና፤
ፃሎንታ ማላ ባ ኣይፊ ቂልሞዲዳ፤
ሃሲ ባይንዳኮ ኢሰቲ ባ ኣይፊራ ቤዩዲኔ
ባ ሃይላራ ስይዲ
ባ ዋዘናን ዩሽ ቆፕዲ
ታኮ ሃ ሲሚን
ታ ኢሰታ ፓላና ሸን።

ገዳ ቲንቢቲ ቃላይ ኢሰታን ፖሌቲዳ። *

¹⁶ “ኣንቴ ኣይፊይ ፃሊዛ ገሸኔ ኣንቴ ሃይላቲ ሲዩዛ ገሽ ኣንቴ ኣንጃቲዳይታ።¹⁷ ታ ኣንቴሰ ቱሙ ጋይሰ፤ ዳር ናቤቲኔ ዳር ፃሎ ኣሳቲ ሃዲ ኣንቴ ቤዩዛይሳ ቤያናሲኔ ሃዲ ኣንቴ ሲዩዛይሳ ሲያናሰ ኣሞቲዳ ሸን ኢሰታሰ ሃኒቤና።

¹⁸ “ሂሰቲኮ ሃዲ ዜሬላ ለሚሶዛ ቢርሽላ ሲዩቲ፣¹⁹ ካዋቲላ ቃላ ሲይዲ ዩሽ ቆፖንታ ኣይ ኣሳ ዋዘናፕካ ፃላዲ ዩዲ ዜሬቲዳ ዜሬላ ኤሶን ማዲቻና። ሃሲካ ኦጌ ቦላ ዋዲዳ ዜሬላ።
²⁰ ሹቻ ቦላ ዜሬቲዳይሲ ቃላ ሲዩዳ ማላ ኡፋይሳን ሲይዲ

* 13:12 ማቶ 25:29፤ ማር 4:25፤ ሉቃ 8:18፤ 19:26 * 13:14-15 ኢሳ 6:9-10

ሄራካ ኡፋይሳን ኤከዛዴ ሚሳቴሰ። 21 ጊደ ኣቲን ፃፅ ዩዳናስ ዳንዳዮንታ ኣጊዳ ገሸ ዳር ጋምዮንታ ቃላ ጌደን ሜቶይኔ ጎዴቴሉ ዪዛ ዎዴ ኤሌሊ ዱጵቴሰ። 22 ኣጉንጎ ጊደን ዘሬቴዳ ዘሬላይ ቃላ ሲይዲ ሃይሳ ሃ ኣላሚዛስ ዳር ሜቶቴላኔ ዲሬቴላ ቆፋን ባሌቴዲኔ ጩሌቴዲ ኣይፌ ኢሞንታ ኣሳ ማላ። 23 ሎዖ ቢታን ዘሬቴዳ ዘሬላይ ቃሌ ቃላ ሲይዲ ዩሺ ቆፒዛዴ ሚሳቴሰ፤ ቱሙ ኣይፌ ኣይፌስ፤ ኢሶይ ያቱ፣ ኢሶይ ኡሱፑን ታሙ፣ ኢሶይ ሃዙ ታሙ ኣይፌ ኢሚዴስ” ጊዴስ።

ሌሾ ሌሚሶ

24 ዩሱሲ ቃሌካ ሃራ ሌሚሶ ኢስታስ “ሳሎ ካዎቴሉ ባ ጎሻ ጋዴን ሎዖ ዘሬላ ዘሬዳዴ ሚሳቴሰ። 25 ጊደ ኣቲን ኣሲ ዉሪ ኢቺዳ ዎዴ ሞርኬይ ዪዲ ገሰቴዛ ጊደን ሌሾ ዘሬዲ ቢዴስ። 26 ገሰቴዚ ዲጩዲ ኣይፌ ኣይፊዛ ዎዴ ሌሾይካ ኢዛራ ኢሲፌ ቤቴዴስ።

27 “ካላ ጎዳ ኣሸካራቴ ጎዳዛኮ ሸቂዲ ‘ጎደ! ኔኒ ኔ ጎሻን ሎዖ ዘሬላ ዘሬቤኪ? ሃይሲ ሌሾይ ኣዎፔ ዪዴ?’ ጊዴ።

28 “ኢዚካ ኢስታስ ‘ሂሳ ሞርኬይ ኦላዴስ’ ጊዴስ። ኣሸካራቴካ ‘ኑ ቢዲ ሌሾዛ ሾዳና ማላ ኮያይ?’ ጊ ኦይቺዳ።

29 “ኢዚካ ኢስታስ፣ ‘ኣካይ ሃኔና፤ ጋሶይካ ኢንቴ ሌሾዛ ሾዲሾ ገሰቴዛራ ጋሊ ሾዳና፤ 30 ኣጊቴ! ማፃ ዎዴይ ጋካናስ ኢሲፌ ዲጩ፤ ሄ ዎዴ ማዲዛይቴ ሌሾዛ ካሴቴዲ ቆሪ ማዲ ታማን ፀጋናስ ሚርቄን ሚርቄን ቃቺቴ፤ ገሰቴዛ ቃሌ ሺሺዲ ጎታራን ጌልላቴ’ ጋዳ ታ ኢንቴስ ዮታና” ጊ ዮቴዴስ።

ሚላ ኣይፌ ሌሚሶኔ ኢርሾ ሌሚሶ (ማር 4:30-32፤ ሉቃ 13:18-19)

31 ሃራ ሌሚሶ ኢስታስ “ሳሎ ካዎቴሉ ኢሲ ኣሲ ባ ጋዴ ጊደን ዘሬዳ ባርዛፌ ሚላ ኣይፌ ማላ። 32 ባርዛፌ ሚላ ኣይፌይ ሃራ ሚላ ኣይፌ ኡባፌ ዳር ሳፋ ጊዲኮካ ዲጩዳ ሚላ ኡባፌ ጊታ ጊዳዉስ። ሳሎ ካፎቴካ ኢዚ ሃጋ ቦላ ኬዲዲ ዳና ጋካናስ ጊታ ሚላ ጊዳዉስ” ጊዴስ።

33 ሃራካ ሃራ ሌሚሶ ኢስታስ “ሳሎ ካዎቴሉ ማጫሲ ሊዳይ ዴንዳና ማላ ሊዳ ጊደን ጉጂዳ ጉላ ኢርሾ ሚሳታዉስ” ጊዴስ።

34 ዩሱሲ ሃይሳ ኡባ ኣሳስ ሌሚሶራ ዮቴዴስ። ሌሚሶይ ባይንዳ ኢሲኖካ ዮቴቤና። 35 ሃሳንካ ካሴ ናቤ ዳናን

“ታ ዳና ታ ሌሚሶን ደያና፤ ኣላሜይ ሜዴቶሳፔ ሃ ሲሚን

ቆቴቲዳይሳ ታ ሃሳያና”

ጌቴቲ ዮቴቲዳይሰ ፖሌቲዳሰ። *

ሌሾ ለሚሶዛ ቢርሼል

36 ሃሳፌ ዩሱሲ አሳ አጊዲ ሶ ጌሊዳሰ። ኢዛ ካሊዛይቲ ኢዛኮ ሸቁዲ “ካላ ገደን ዲዛ ሌሾዛ ገሽ ኔ ዮቴዳ ለሚሶዛ ቢርሼል ኩሰ ዮታ” ገደ።

37 ኢዚካ ኢሰታሰ ዛሪዲ “ሎዖ ዜሬል ዜሪዳይ አሳ ና።
38 ጎሻይ ሃይሳ አላሜዛ፤ ሎዖ ዜሬልይ ካዎቴላ ናይታ ገዲዳይሳ ቤሴሰ፤ ሌሾይ ቃሴ ዓላዔ ናይታ። 39 ሌሾዛ ዜሪዲ ቢዳ ሞርኬይ ዳቡሎሳ። ማፃ ዎዳይ አላሜ ወርሴል ገዲሺን ማዳዘይቲ ያሳ ኪታንቻታ።

40 “ሌሾይ ቆሬቲዲ ታማን ፀጌቲዛይሳ ማላ አላሜ ወርሴላን ሃሳሶ ሃናና። 41 አሳ ናይ ባ ኪታንቻታ ኪታና፤ ኢሰቲካ ናጋራሰ ጋሶ ገዲዳይታኔ ኢታ ኦልዛይታ ኢዛ ካዎቴላ ገደፌ ኡባ ቆሪ ኬሳና። 42 ዩሆይ ዲዛሶኔ አቕ ጋርጨዛሶን ዳር ዎልቃማ ታማን ኢሰታ ዩጋና። 43 ሃሳ ዎዳ ደሎቲ ባ አዎ ካዎቴላን አዎ አርሼ ማላ ፖሳና። ሲዩዛ ሃይላ ዲዛዳይ ሲዮ!

ቆታን ዲዛ ሃርኔ ኢንቆ ጌቴቲዛ ዎርቃ ለሚሶ

44 “ሳሎ ካዎቴላ ጋዳ ገደን ቆቴቲዳ ሚሽ ሚሳቴሰ። ኢሲ አሰ ሄ ሚሻዮ ዳሚዲ ዛሪ ቆቴዳሰ። ኡፋይሳፌ ዳንዲዳይሳን ቢዲ ባሰ ዲዛዚ ኡባ ባይዚዲ ሄ ሚሺያ ዲዛ ቢታ ሻሚዳሰ።

45 “ሃሳሶካ ሳሎ ካዎቴላ አልዖ ዎርቃ ኮዩዛ ዛልዓንቻ ሚሳቴሰ። 46 ዳር አልዖ ገዲዳ ኢንቆ ገዛ ሹቻ ዳሚዳ ማላ ቢዲ ባሰ ዲዛዚ ኡባ ባይዚዲ ሻሚዳሰ።

ሞሌ ጌቴ ለሚሶ

47 “ቃሴካ ሳሎ ካዎቴላ አባ ገደን ዩጌቲዲ ዲማ ዲማ ሞሌ ኦይኪዳ ሞሌ ጌቴ ሚሳቴሰ። 48 ሞሌ ኦይኪዳይቲ ጌቴይ ኩሚን ጎቹዲ አባ ላንቄ ኬሲዳ። ሄን ኡቲዲ ሎዖ ሎዖ ሞሌ ቆሪዲ ኬሼን ጉጂዳ። ኢታ ሞሌታ ዎራ ዩገዳ። 49-50 አላሜ ወርሴላን ሃሳሶ ሃናና። ኪታንቻቲ ዩዲ ናጋራንቻታ ደሎታፔ ሻኪዲ ዩኪዛሶኔ አቕ ጋርጨዛሶ ጌዳ ቶዖንታ ታማን ዩጋና።

51 “ዩሱሲ ኢሰታ ሃይሲ ወሪ ኢንቴሰ ጌሊዳ?” ገዳሰ። ኢሰቲካ “ኤ” ገደ።

* 13:35 ማዛ 78:2

52 ኢዚካ ዛሪዲ “ሦሳ ጊሽ ሳሎ ካዎቱላ ፀራይ ጌሊዳ ሙሴ ዎጋ ታማርሲዛዴይ ኦኒካ ኢዛሰ ሚንጂ ዋሊዳ አልፎ ሚሻፌ ኦራላኔ ካሴ ጋልዓ ሚሽ ኬሲዛዴ ሚሳቴሰ” ጌዴሰ።

ናቤይ ባ ዴሬን ቦንቹቴና
(ማር 6:1-6፤ ሉቃ 4:16-30)

53 ዬሱሲካ ሃይታ ለሚሶታ ዮቲ ወርሲዲ ሄፔ ሃራሶ ቢዴሰ።
54 ጌዴ ባ ዴሬ ቢዲ አይሁዳታ ዋሳ ኬላን አሳ ታማርሶ ኦይኪዴሰ። ኢሰቲካ ማለሌቲዲ “ሃይሲ አዴዚ ሃይሳ ኤራቴላኔ ሃይታ ማላታታ ኦላና ዋልቃ አዋፔ ዴሚዴ? 55 ሃይሲ አናጻዛ ና ዴኔ? ኢዛ አይዬ ሱንላ ማራዋ ጌዴኔ? ኢዛ ኢሻቲ ያቆቤ፥ ዮሴፌ፥ ሲሞናኔ ዩሁዳ ጌዴቴኔ? 56 ሚቹቲ ኦናራ ዲዛይታ ጌዴቴኔ? ሂሰቲን ሃይሲ አዴዚ ሃይሳ ኡባ አዋፔ ኤኪዴ?” ጌዳ።

57 ሦሳ ጊሽ ኢሰቲ ኢዚ ገዛይሳ ኤኪቤቴና።

ዬሱሲካ ኢሰታሰ “ናቤይ ባ ዴሬኒኔ ባ ኬላን ቦንቹቴና አቲን ሃራሶን ቦንቹቴሰ” ጌዴሰ። 58 ኢሰቲ አማኖንታ አገዳ ጊሽ ዳር ማላታታ ሄን ኦሊቤና።

14

ፃማቂዛ ዮሃንሳ ሃይቆ
(ማር 6:14-29፤ ሉቃ 9:7-9)

1 ሄ ዋዴ ጋለላ ዴሬ ሃሪዛ ሄርዴሲ አሳይ ዬሱሳ ናሺዛይሳ ሲይዴሰ። 2 ሄርዴሲ ባ አሽካራታሰ “ሦሳ ጊዲኮ፥ ፃማቂዛ ዮሃንሲ ሃይቆፔ ዴንዲዲ ዩዴሰ ጉሳካ! ሃይሲ ወሪ ገታ ማላታይ ኢዛ ኩሼን ኦሴቲዛይ ሄሳሳ” ጌዴሰ።

3 ሄርዴሲ ባ አሻ ፒሊጶሳ ማቾ ሄርዲያዲ ጋሶን ዮሃንሳ ኦይሊዲ ቃሾ ኬላን ዩገዴሰ። * 4 ጋሶይካ ዮሃንሲ ሄርዴሳ “ኔ ኢዛ ኤካና ማላ ዎጋ ጌዴና ጌዳ ጊሻሳ” ጌዴሰ። 5 ሄርዴሲካ ዮሃንሳ ዋቆናሰ ኮዩሺን አሳይ ዮሃንሳ ናቤ ማላ ጻሊዛ ጊሽ ባቢዴሰ።

6-7 ሄርዴሲ ባ ዬሌቴላ ጋላሰ ሄርዲያዲ ናያ ዬላን ኢዛ ኡፋይሲዲ ጊሽ ናያ ኢዛ ኦይቹዳዝ ኡባ ኢማናሰ ኢዚሰ ጫቂዴሰ። 8 ናያካ አይዬ ዘሬን “ፃማቂዛ ዮሃንሳ ሁዔ ኬሬን ዋላዳ ሃዒ ሃኒን ታሰ ኢማ” ጋዴሰ።

* 14:3 ሉቃ 3:19-20

9 ሃ ዎዴ ካዎዚ ኢዛስ ሚሹቲዳስ። ገዶ ኣቲን ጫቋዳ ገሺኔ ኢዛራ ዲዛ ኢማጥ ገሽ ገዲ ናይ ኦይሾይ ፖሌታና ማላ ኣዛዚዳስ። 10 ከቲዲኔ የሃኒሳ ዎይኔ ከፋን ዲሺን ቆቆ ቃንዲሲዳስ። 11 ቃንጻቲዳ ሁዔዛ ከሬን ዎሊዲ ናይስ ኢሚዳ። ናያካ ኤካዳ ባ ኣዩይስ ኢማዲስ። 12 የሃኒሳ ካሊዛይቲ ኢዛ ኣሃ ኤኪዲ ዋጊዲኔ ሃኒዳይሳ ኡባ ዩሱሳስ የቲዳ።

ዩሱሲ ኢቻሹ ሺ ኣሳ ሚዚዳስ
(ማር 6:30-44፤ ሉቃ 9:10-17፤ ዮሃ 6:1-14)

13 ሄሳ ሲዩዳ ማላ ዩሱሲ ካሴ ባ ዲዛሶ ኣጊዲኔ ዎጎሎን ጌሊዲ ባርካ ሃራ ኣሲ ባይንዳሶ ቢዳስ። ዴሬይካ ሄሳ ሲይዲ ካታማይ ዲዛሶፕ ቶሆራ ኢዛ ካሊዳስ። 14 ዩሱሲካ ዎጎሎዛፕ ዎጲሹ ዳሮ ኣሳ ቤዩዲ ኣሳስ ሚሹቲዳስ። ሳኬቲዛይታካ ፓሊዳስ።

15 ጋዴይ ቃሚ ቃሚ ቢዛይሳ ቤዩዲ ኢዛ ካሊዛይቲ ኢዛኮ ሸቋዲ “ሃይሲ ኦ ዲዛሶይ ባዘ፤ ጋዴይካ ቃሚ ቃሚ ቢዛ ገሽ ጌዴ ጉታታን ጉታታን ቢዲ ባሲ ማናዝ ሻማና ማላ ኣሳ ዩዳ” ገዳ።

16 ገዶ ኣቲን ዩሱሲካ ኢሰታ “ኢንቴ ኣሳስ ማናዝ ኢሚቴ ኣቲን ኣሳይ ባናስ ኮሹና” ገዳስ።

17 ኢሰቲካ ኢዛስ ዛሪዲ “ሃይሳን ኦስ ኢቻሹ ኡኬሌኔ ናሞዑ ሞሌፕ ኣቲን ሃራይ ባዎ” ገዳ።

18 ኢዚካ ኢሰታ “ኣኔ ሄይታ ዲዛይታ ሃ ታስ ኤኪ ዩቴ” ገዳስ። 19 ቃሴካ ኣሳይ ማታ ቦላ ኡታና ማላ ኣዛዚዳስ። ኢቻሹ ኡኬላኔ ናሞዑ ሞሌታ ባ ኮሹን ኦይኪዲ ባ ኣይፌ ፑዴ ሳሎ ቆቁ ሂሰቲ ጋላቲዲ፥ ኡኬላ ማንሉ ባና ካሊዛይታስ ኢሚዳስ። ኢሰቲካ ኣሳስ ኢሚዳ።

20 ኣሳይ ዉሪካ ሚዲ ካሊዳስ። ሄሳፌ ጉዩ ኢዛ ካሊዛይቲ ኣሳፕ ሚሺን ኣቲዳይሳ ታማኔ ናሞዑ ሌማቴ ኩሚሉ ሺሺዳ።

21 ሚዳ ኣሳይ ማጫሳቲኔ ጉላ ናይቲ ጉጁቶንታ ኣቱማሳይ ፃላላ ኢቻሹ ሺ ገዳና።

ዩሱሲ ኣባ ቦላ ሃሙቲዳስ
(ማር 6:45-52፤ ዮሃ 6:15-21)

22 ሄራካ ኢዛ ካሊዛይቲ ዎጎሎን ጌሊዲ ጌዴ ፒንላ ኢዛፕ ካሴቲዲ ፒናና ማላ ኣዛዚዲ ኣሳ ሞይዛናስ ባሲ ጉዩ ኣቲዳስ። 23 ዴሬዛ ሞይዚዳፕ ጉዩ ዎሳ ዎሳናስ ባርካ ዙማ ቦላ ኬዚዳስ።

ጋዴይ ጳጳሚንካ ያን ዙማ ቦላ ባርካ ዳስ። 24 ሄሳ ዎዴ ዎጎሎያ አባ ካንፋ ቢሺን ዳምባላይ ዴንዲዲ ዳሮ ሜቶሎ ኦይኪዳስ።

25 ቃማፔ ኮይሮ ኩቶይ ባቂሺን ዬሱሲ አባ ቦላራ ሃሙተዲ ኢዛ ካሊዛይቲ ዲዛሶ ዪዳስ። 26 ዬሱሳ ካሊዛይቲካ ኢዚ አባ ቦላራ ሃሙተ ዪሺን ቤዪ ባቢዳ ጊሽ ኢዛ ሞይቲሌ ጊዲኔ ዋሲዳ።

27 ዬሱሲ ሄራካ “አይኮይ ባ! ታናኮ፤ ባቦፍቲ!” ጊዳስ።

28 ጳፅሮሲ “ጎዶ! ኔና ጊዲኮ ታ አባ ቦላራ ሃሙተዳ ኔኮ ባና ማላ ታና አዛዛ” ጊዳስ።

29 ዬሱሲ ኢዛ “ሃያ!” ጊዳስ። ጳፅሮሲካ ዎጎሎዛፔ ዎጲዲ ሃፋ ቦላራ ሃሙተዲ ዬሱሳኮ ዪዳስ። 30 ጊዶ አቲን ጫርኮዛ ዎልቃ ቢዪዲ ባቢዳ ጊሽ ሃፋን ሚቴቲሉ ኦይኪዲ “ጎዶ! ታና አሻ!” ጊ ዋሲዳስ።

31 ዬሱሲ ሄራካ ባ ኩሼ ዬዲ ኦይኪዲ “ኔኖ፣ አማኖይ ፓጪዳይሶ! አዛሰ ሲዳዲ?” ጊዳስ።

32 ዬሱሲኔ ጳፅሮሲ ዎጎሎዛን ጌሊዳ ማላ ጫርኮይ ሲርጽ ጊዳስ። 33 ሄሳፌ ጉዬ ዎጎሎን ዲዛይቲ “ኔኒ ቲሙ ያሳ ና!” ጊዲ ኢዛሰ ጎይኒዳ።

ዬሱሲ ጌንሴሬዳን ሃርጋንቻታ ፓሊዳስ

34 ዬሱሲኔ ኢዛ ካሊዛይቲ አባ ፒኒዲ ጌንሴሬዳ ጌቴቲዛሶ ጋኪዳ። 35 ሄን ዲዛይቲ ዬሱሳ ጊዲዳይሳ ኤሪዲ፣ ሄ ሄራን ዩዪ አጳናሰ ዲዛ አሳሰ ኪታ ዬዲዳ። አሳይካ ሃርጋንቻታ ኡባ ዬሱሳኮ ኤሂዳስ። 36 ሃርጋንቻቲ ኢዛ አፋላ ዪራ ፃላላ ቦቻና ማላ ዬሱሳ ዋሲዳ። ቦቸዳይቲ ዉሪካ ፓዲዳ።

15

1 ቃሴካ ዬራሳላሜፔ ዪዳ ፋርሳዌቲኔ ሙሴ ዎጋ ታማርሲዛይቲ ዬሱሳኮ ሸቂዲ 2 “ኔና ካሊዛይቲ ካሴ ኑ አዎታ ዎጋ አዛሰ ጳይሲዛ? ቁማ ማናሰ ኩሼ ሜጩቴቲና” ጊዳ።

3 ዬሱሲካ ኢሰታሰ “አንቴ አንቴ ዎጋሰ ጊዲ ያሳ አዛዛ አይሰ ሻሬቲ? 4 ያሲ ‘ኔ አዩዮኔ ኔ አዎ ቦንቻ፤ ባ አዎ ቦላ ዎይኮ ባ አዩ ቦላ ኢታ ቃላ ሃሳዩዳዳይ ሃይቆ!’ ጊ አዛዚዳስ። 5 አንቴ ጊዲኮ አይ አሲካ ባ አዎ ዎይኮ ባ አዮ ታ አንቴሰ ኦፋናሰ ቤሲዛዝ አይ ሚሼካ ያሳሰ ያርሾ ኦፋ ሸሻዲሰ’ ጊኮ፣ 6 ‘ሄ አዳዚ ባ አዎ ዎይኮ ባ አዮ ቦንቸዳሰ’ ጌታ፤ ሄሳ ጊሽ አንቴ ዎጋ ጊሽ ያሳ ቃላ

ሻሬታ። 7-9 አንቴኖ፣ ቆጶፔ ቆሞን ሃኒዛይቶ! አሳያሲ አንቴ ጊሽ
ዮተሼ

ሃይሲ ዳሬይ

ታና ዱናን ፃላላ ቦንቹስ፤

ዎዝናይ ጊዲኮ ታፔ ሃኪዳስ፤

ሜላ ሃዳ ታና ጎይኔስ፤

ኢስታ ተሚርቲይካ አሲ ዎሲዳ ዎጋ፣

ጊዲዲ ሲንሳፌ ሃናናይሳ ዮተዳይሲ ቱማኮ” ጊዳስ።

10 ዬሱሲ አሳ ባኮ ጃይጊዲ “ሲደቱ ዎዝናን ዎሲቱ። 11 አስ
ቱኒሲዛይ አዛዴ ዱናራ ሃ ኬዚዛይሳፌ አቲን ዱናራ ዲጌ
ጌሊዛይ ቱኒሴና”

ጊዳስ።

12 ቃሴ አዛ ካሊዛይቲ አዛኮ ሸቂዲ “ፋርሳዌቲ ኔ ጊዳይሳ
ሲይዲ ሃንቄቲዳይሳ ኤራዲ?” ጊዳ።

13 አዚ ኢስታስ “ታ አዎ ሳሎይሲ ቶኮንታ ሚሊ ዉሪካ
ዶቃሌታና። 14 ኢስታ አጋጊቲ ኢስቲ ቆቄቲ ካሌሊዛ ቆቄታ ጊዲዳ
ጊሽ፣ ቆቄቲ ቆቄ ካሌሊኮ ናሞዓይ አሶይ አሳራ ኦይኬቲዲ አፎን
ዉላና” ጊዳስ። *

15 ጴጥሮሲ ዬሱሳ “ኔ ዮተዳ ለሚሶዛ ኦስ ቢርሻ” ጊዳስ።

16 አዚካ “አንቴ ሃዒ ጋካናሰካ ኤሪቤኬታ ጉሴ? 17 ዱናራ
ጌሊዛይ ዉሪ ዲጌ ቃንሌ ካንሲዲ ጌዴ ካሪ ኬዚዛይሳ ኤሪኬቲ?

18 ዱናራ ኬዚዛይ ጊዲኮ ዎዝናፔ ፑልቲስ። አስ ቱኒሲዛይ ሄሳ።

* 19 ኢታ ቆፋይ፣ ሹሞፖ ዎዶይ፣ ላይማይ፣ ላይማታናስ ቃቃቶይ፣
ካይሶይ፣ ዎርዶ ማርካቴሌኔ አሳ ሱንሐ ሞርይ ዉሪ ዎዝናፔ
ፑልቲስ። 20 አስ ቱኒሲዛይ ሃይታንታፌ አቲን ኩሼ ሜጩቶንታ
ሙሲ አስ ቱኒሴና” ጊዳስ።

ካናኔ ዳሬ ማጫሳይ አማኖ

(ማር 7:24-30)

21 ዬሱሲ ሃፔ ኬዚዲ ጌዴ ጃርሴኔ ሲዶና ጌቲቲዛ ዳሬ
ቢዳስ። 22 አሲ ካና ማጫሲ ዲዛራ ሄ ሄሪፔ ኬዛዳ ዬሱሳኮ
ያዳ “ጎይ፣ ዳዉቱ ናዉ! ታስ ሚሼታ! ታ ናያ ቱና አያናይ ኦይኪን
ኬሃ ዎያዉስ” ጋዳ ዋሳዲስ።

23 ጊዶ አቲን አዚ አሲ ቃላካ አዚስ ዛሪቤና። ሂስቲን ሄ
ዎዴ አዛ ካሊዛይቲ አዛኮ ሸቂዲ “ኦና ካላ ካላ ዎይሲዛ ጊሽ
ኔ አዞ ሞይዚኮቹ?” ጊዲ አዛ ኦይቹዳ።

* 15:14 ሉቃ 6:39 * 15:18 ማቶ 12:34

24 ኢዚካ ኢስታስ “ታኒ ኢስራዔል ኩላፌ ቆዩዳ ደርሳታኮ ፃላላ ኪቲታዲስ” ጊዳስ።

25 ማጫሳያካ ዩሱሳ ቶሆ ቦላ ኩንዳዳ “ጎደ! ታና ማዳርኪ!” ጋዲስ።

26 ኢዚካ ኢዚስ ዛሪዲ “ናይታ ካል ኤኪዲ ካና ቡቱላታስ ዩጋናስ ቤሴና” ጊዳስ።

27 ኢዛካ “ኤ ጎደ፤ ቡታላቲካ ባ ጎዳ ማዳፕ ጋዴን ዎዲዳ ካል ማዲ ማቴስ” ጋዲስ።

28 ሂዘጊን ዩሱሲካ ማጫሳዮ “ሃኔ ማጫሳዬ፥ ኔ ኣማኖይ ጊታ! ኔ ኮይዳ ማላ ኔስ ሃኖ” ጊዳስ። ማጫሳይ ናያካ ሄራካ ፓዳዲስ።

29 ዩሱሲ ሄፕ ዴንዲዲ ጋሊላ ኣባ ላንቄ ቢዲ ሄን ዲዛ ኢሲ ዙማ ቦላ ኬዚ ኡቲዳስ። 30 ቆዳን ዳር ዴሬይ ዎቤታ፥ ቆቄታ፥ ሲላታ፥ ሃሳዮንታ ዲዳታ ሃራታካ ዳር ሃርጋንቻታ ኤሂዲ ኢዛ ሲንሳን ዎሊዳስ፤ ኢዚካ ኢስታ ፓሊዳስ። 31 ዲዳይ ሃሳዩሺን፥ ቶሆ ሲላይ ፓዳሺን፥ ዎቤይ ሲቲ ጊዲ ሃሙቲሺን፥ ቆቄይ ያሊሺን ቤዩዲ ኣሳይ ማላሌቲዳስ፤ ኢስራዔል ጎዳካ ጋላቲዳስ።

ዩሱሲ ኦይዲ ሺ ኣሳ ሚዚዳስ
(ማር 8:1-10)

32 ዩሱሲ ባና ካሊዛይታ ዪይጊዲ “ኣሳይ ታናራ ሄቩ ጋላስ ጋምዒዳ ጊሺኔ ማና ካሊ ባይንዳ ጊሽ ኣሳይ ታና ሚቹስ። ኦኔ ቦላን ጋፋን ዳቡሪዲ ኩንደንታ ማላ ማላ ኡሎራ ዩዳናስ ኮዩኬ” ጊዳስ።

33 ኢዛ ካሊዛይቲ “ሃይሳን ኣይኮይካ ባይንዳ ባዞ ቢታን ሃይሳ ኮና ዴሬ ሚዛናስ ጊዲዛ ቁማ ኦ ኣዎፕ ዴማኔ?” ጊዳ።

34 ዩሱሲ ኢስታ “ኢንቴስ ኣፑን ኡኬሊ ዲዜ?” ጊ ኦይቹን ኢስቲካ “ላፑን ኡኬሊኔ ቂ ጉላ ሞሌቲ ዴቲስ” ጊዳ።

35 ኢዚካ ዴሬዚ ጋዴን ኡታና ማላ ኣዛዚዳስ። 36 ላፑን ኡኬላኔ ሞሊዛ ባ ኩሺን ኦይኪዲ ጋላቲዳፕ ጉዬ ማንሊዲ ባና ካሊዛይታስ ኣሚዳስ፤ ኢስቲካ ዴራስ ጊሺዳ። 37 ኣሳይ ዉሪካ ሚዲ ካሊዳስ፤ ዩሱሳ ካሊዛይቲ ኣሳፕ ኣቲዳይሳ ላፑን ሌማቴ ኩሚላ ሺሺዳ። 38 ሚዳይቲካ ናይቲኔ ማጫሳይ ባይንዳ ኣዳቲ ፃላላ ኦይዲ ሺ ጊዲዳ።

39 ዩሱሲ ዴሬዛ ሞይዚዳፕ ጉዬ ዎጎሎን ጌሊዲ ማጊዶኔ ጌቲቲዛሶ ቢዳስ።

16

1 ፋርሳዌቲኔ ሳዱቃዊ ጌቲቲዛይቲ ዩሱሳኮ ሸቂዲ ኢዛ ፓጫናስ “ሳሎፔ ማላታ ቤሳ” ገዲ ኦይቺዳ። * 2 ኢዚካ ኢስታስ “አማርሳ ዎዴ ሳሎይ ዞሲኮ ‘ጋይይ አዋታና’ ጌታ። 3 ዎንታ ቦላ ‘ሳሎይ ዳዲኮ ዳዲዳስ፤ ሃቺ ኢራይ ቡካና’ ጌታ፤ ሳሎ ሜቆ ያሊዲ ሻኪ ኤሬታ ሺን ታ ያና ዎዴ ማላታ ሻኪ ኤራናስ ዳንዳዬኬታ። * 4 ሃይሲ ኢታኔ ላይማ ዩሌታይ ማላታ ኮዬስ፤ ገዶ ኦቲን ዮናሳ ማላታፔ ኦቲን ሃራ ማላታይ ኢዛስ አሜቴና” ገደሰ። ዩሱሲ ኢስታ ሄን አጋገዲ ሃራሶ ቢደሰ። *

5 አባ ፒደዳ ማላ ዩሱሳ ካሊዛይቲ ቁማ ኦይካናይሳ ባሌቲዳ። 6 ዩሱሲካ “ቆፐፔ፤ ፋርሳዌታ ኢርሾሬኔ ሳዱቃዊታ ኢርሾሬ ናጌቲቲ” ገደሰ። *

7 ኢስቲ ቃሴ ባ ገደን “ኑኒ ካል ኦይኮንታ ገሽ ሄሳ ገደሰ” ገዲ ኢሶይ ኢሳራ ሃሳዬቲዳ

8 ዩሱሲካ ኢስታ ቆፋ ኤሪዲ “ኢንቴና አማናይ ፓጩዳይቶ! ካል ኦይኮንታ ገሽ አዛስ ኢሶይ ኢሳራ ሃሳዬቲቲ? 9 ኢቻሹ ኡኬል ኢቻሹ ሺ አሳስ ገዲዲ አቸን ለማቴይ ቲርፒን ኢንቴ ዴንጲዳኮኔ ዩሺ ቆፐኬቲ? * 10 ሄሳላካ ላቸን ኡኬል ኦይዲ ሺ አሳስ ገዲዲ አቸን ለማቴይ ቲርፒን ኢንቴ ዴንጲዳኮኔ ዎዘናን ዎሊቤኬታ ጉሴ? * 11 ሂስቲን ታ ኢንቴስ ዮቲዳይ ካላ ገሽ ገደንታይሳ ዎንዲ ዩሺ ቆፐኬቲ? ሃሲካ ፋርሳዌታ ኢርሾሬኔ ሳዱቃዊታ ኢርሾሬ ናጌቲቲ” ገደሰ።

12 ሃሲ ኢዚ ኢስታ ቆሬሲዛይ ቡኬሶ ዴንሳናስ ጉጂዛ ኢርሾ ገሽ ገደንታ ፋርሳዌታኔ ሳዱቃዊታ ቲሚርቴሬ ናጌታና ማላ ገዲዳይሲ ኢስታስ ጌሊደሰ።

ጳጳርሲ ዩሱሲ ያሳ ና ገደይሳ ዮቲዳስ

13 ዩሱሲ ቁሳሪያ ፒሊጲሲዮሴ ጌቲቲዛ ቢታ ጋኪዳ ዎዴ ባና ካሊዛይታ “አሳይ ታና አሳ ና ኦና ገዜ?” ገዲ ኦይቺዳስ።

14 ኢስቲካ “ኢሲ ኢሲ አሳይ ‘ፃማቁዛ ዮሃኒሳ’ ጌስ፤ ባጋ አሳይ ‘ኤላሳ’ ጌስ፤ ባጋይ ‘ኤርማሳ ዎይኮ ናቤታፔ ኢሳዴ ገደንታ ኣኔና’ ጌስ” ገዲ። *

* 16:1 ሉቃ 11:38 * 16:3 ኢሲ ኢሲ ገሻ ማፃፊታን ፓይዶ ናምዓኔ ሄቫ ቦላ ዩሱሲ ሃሳዬዳ ለሚሶዛ ሳዔቲቲና። * 16:4 ማቶ 12:39፤ ሉቃ 11:29
 * 16:6 ሉቃ 12:1 * 16:9 ማቶ 14:17-21 * 16:10 ማቶ 15:34-38
 * 16:14 ማር 6:14-15፤ ሉቃ 9:7-8

15 ኢዚካ ኢስታ “ኢንቲ ታና ኦና ጌቲ?” ጊዳስ።

16 ሲሞና ጌቲቲዛ ጳጳሮሲ “ኔኒ ኪርሰቶሳ ዴዖ ያሳ ና ጊዳኪ?” ጊዳ ዛሪዳስ። *

17 ዩሱሲ “ዮና ና ሲሞና ኔኒ ኣንጃቲዳዳ! ኔስ ሃይሳ ቆንጨሲዳይ ሳሎን ዲዛ ታ ኣዋፔ ኣቲን ኣሾኔ ሱሌ ጊዳና።

18 ኔኒ ዛላ፤ ሃይሳ ዛላ ቦላ ታኒ ታ ዋሳ ኬሌ ኬፃና፤ ጋናሜ ፔንጌቲካ ኢዛ ያኔቴና። 19 ሳሎ ካዎቴላ ቁልፎታ ታ ኔስ ኢማና፤ ኔኒ ቢታ ቦላ ሃኖ ጊዛይ ዉሪ ሳሎኒካ ሃናና። ቢታ ቦላ ኔ ሃኖ። ጊዳይሲ ዉሪካ ሳሎኒካ ሃኔና” ጊዳስ። *

20 ቃሴካ ኢዚ ኪርሰቶሳ ጊዳዳይሳ ኢስቲ ኦናስካ ዮቶንታ ማላ ባና ካሊዛይታስ ሎዔሌ ዮቲዳስ። †

ዩሱሲ ባ ቦላ ጋካና ሜቶ ጊሽ ናምዓንሉካ ዮቲዳስ

21 ሃሳፌ ሃ ሲሚን ዩሱሲ ዩሩሳላሜ ባናይሳ፣ ሄን ዴሪ ጨማታን፣ ቁሴታ ሃላቃታኒኔ ሙሴ ዋጋ ታማርሲዛይታ ኩሼን ዋዩ ኤካናይሳ፣ ሃይቃናይሳ፣ ሄቫንሉ ጋላስ ሃይቆፔ ዴንዳናይሳ ባና ካሊዛይታስ ቆንጨሲዳ ዮቲዳስ።

22 ጳጳሮሲ ዩሱሳ ጌዴ ኢሲ ባጋ ዛሪዳ “ጎዶ! ሃይሲ ኔ ቦላ ጋኮፎ!” ጊዳ ሃንቀዳስ።

23 ዩሱሲ ጳጳሮሳኮ ሸቂዲ “ሃይሶ ፃላዔ! ሃይሳፌ ኪቻ! ኔኒ ኣሳዛፔ ኣቲን ያሳ ዮዖይ ኔ ዎዝና ጊዶን ባይንዳ ጊሽ ኔ ታስ ቋጴ ጊዳዳሳ” ጊዳስ።

24 ቃሴካ ዩሱሲ ባና ካሊዛይታስ “ታና ካላናስ ዶሲዛ ኢሲ ባና ካዶ፤ ባ ማስቃሌ ቶኪዲ ታና ካሎ። ‡ 25 ባ ሼምፖ ኣሻና ኮዩዛ ኢሲ ዉሪ ቆይሳና፤ ጊዶ ኣቲን ባ ሼምፖ ታ ጊሽ ቆይሲዛይይ ኣሻና። * 26 ኢሲ ኣላሜን ዲዛዝ ኩሜላ ሃሪድ ባ ሼምፖ ቆይሲኮ ኢዛ ኣይ ማዳኔ? ዎይኮ ኢሲ ባ ሼምፖ ጊሽ ቃንፃና ዳንዳዩዛዚ ኣዜ? 27 ኣሳ ናይ ባ ኣዋ ቦንቸራኔ ሳሎ ኪታንቻታራ ያና፤ ኢሳስ ኢሳስ ኢዛ ኦሶ ማላ ኢዛዳ ዋጋ ኢማና። * 28 ታ ኢንቴስ ቱሙ ጋይስ፤ ሃይሳን ኤቂዳ ኣሳታ ጊዶፌ ኣሳ ናይ ባ ካዎቴላራ ዩሺን ቤያና ጋካናስ ሃይቆይ ኢስታ ቦቸንታ ኣሳቲ ዴቲስ” ጊዳስ።

* 16:16 ዮሃ 6:68-69 * 16:19 ማቶ 18:18፤ ዮሃ 20:23 † 16:20 ኪርሰቶሳ ጉሲ ያሳፌ ቲዩቲዳዳ ጉሳ። ‡ 16:24 ማስቃሌ ጉሲ ሜቶ ጉሳ። * 16:25 ማቶ 10:39፤ ሉቃ 17:33፤ ዮሃ 12:25 * 16:27 ማቶ 25:31፤ ማዛ 62:12፤ ኦር 2:6

17

ዮሴፍ ማዳይ ላሜቲዳስ
(ማር 9:2-13፤ ሉቃ 9:28-36)

1 ኡሱፑን ጋላሳፊ ጉዩ ዮሱሲ ጴጥሮሳኔ ያቆቤ ቃሴካ ያቆቤ አሻ ዮሃንሳ ሳናራ ኤኪዲ ኢስታራ ፃላላ ኢሲ ጶቃ ዙማ ቦላ ኬዚዳስ። * 2 ኢስቲ ሄን ዲሺን ዮሱሳ ማዳይ ላሜቲዳስ፤ ኢዛ ኣይፊሶይ ኣዋ ኣርሼ ማላ ፖሊዳስ፤ ኢዛ ማይገይካ ፖፖ ማላ ያልቂዳስ። 3 ሄራካ ሙሴይኔ ኤላሲ ዮሱሳራ ሃሳዪሼ ኢስታሰ ቤቲዳስ። 4 ጴጥሮሲ ዮሱሳ “ጎዶ! ኑ ሃኒን ዲዛኮ ኑስ ሎፖኮ! ኔ ሼኔ ገዲኮ ኢሲ ዳሴ ኔስ፣ ኢሲ ዳሴ ሙሴስ፣ ኢሲ ዳሴ ኤላሳስ ሄሹ ዳሴ ኦላ?” ገዳስ።

5 ኢዚ ቡሮ ሃሳፖን ዲሺን ፖሊዛ ሻራይ ኢስታ ካሚዳስ፤ ሻራ ጋላራ “ታኒ ኢዛን ኦፋዬቲዛ ታ ደሲዛ ታ ናይ ሃይሳ፤ ኢዚ ገዛዛ ሰዪቲ” ገዛ ቃላ ገሪሰ ሰዬቲዳስ። *

6 ኢዛ ካለዛይቲካ ሄሳ ሰዪዳ ዋዴ ዳጋሚዲ ቢታ ቦላ ጉፋኒዳ። 7 ዮሱሲ ኢስታኮ ሸቂ ኢስታ ባ ኩሼን ቦቺዲ “ዴንዲቲ፤ ባቦፍቲ!” ገዳስ። 8 ኢስቲ ጶቂ ገ ያለሺን ዮሱሳፕ ኣቲን ኢዛራ ሃራ ኣስ ኦናካ ቤሲቤቲና።

9 ኢስቲ ዙማ ቦላፊ ዋዲሺን ዮሱሲ “ኣሳ ናይ ሃይቆፕ ዴንዳና ጋካናስ ኢንቲ ቤፖይሳ ኦናሰካ ዮቶንታ ማላ” ገ ኣዛዚዳስ።

10 ዮሱሳ ካለዛይቲ “ሂስቲን ሙሴ ዋጋ ታማርሲዛይቲ፣ ኤላሲ ካሴቲዲ ያና ቤሴስ ኣዛሰ ገዛ?” ገዲ ኦይቺዳ። *

11 ኢዚካ ኢስታሰ “ቱማኮ፤ ኤላሲ ዪዲ ዉርሲካ ገገሳና ገዲ ዛሪዳስ። 12 ታ ኢንቲሰ ገዛይ ኤላሲ ዪዳስ፤ ገዶ ኣቲን ኣሳይ ባ ኮይዳ ማላ ኢዛ ቦላ ኦሊዳስ ኣቲን ኢዛ ኤርቤና፤ ሄሳላካ ኣሳ ናይ ኢስታ ኩሼን ዋዬ ቤያና” ገዳስ። *

13 ሄ ዋዴ ዮሱሳ ካለዛይቲ ዮሱሲ ኢስታሰ ዮቲዛይሰ ፃማቂዛ ዮሃንሳ ገሽ ገዲዳይሳ ኤሪዳ።

ዳይደንላ ኦይኪዳ ኢሲ ና ዮሱሲ ፓላዳስ
(ማር 9:14-29፤ ሉቃ 9:37-43)

14-15 ዮሱሲኔ ኢዛ ካለዛይቲ ኣሳኮ ሰሚዳ ማላ ኢሲ ኣሲ ዮሱሳኮ ሸቂዲ ኢዛ ሲንፋን ጉልባቲዲ “ጎዶ! ታ ና ዳይሳ

* 17:1 2ጴጥ 1:17-18 * 17:5 ሜዴ 22:2፤ ዛሬ 18:5፤ ማቶ 3:17፤ 12:8፤ ኢሳ 2:7፤ ማር 1:11፤ ሉቃ 3:22 * 17:10 ሚክ 4:5 * 17:12 ማቶ 11:14

ቦላፌ ዩጊዛ ሃርጌይ ዳሮ ዋይሲዛ ገሽ ታሰ ማራሪኪ! ዳሮ ዋዴ ታማን ኩንዴስ፤ ሃላንካ ጌሌስ። 16 ታኒ ናዛ ኔና ካሊዛይታኮ ኤሃዲሰ ሺን ኢሰቲ ኢዛ ፓላና ዳንዳዬቤቲና” ገዴስ።

17 ዬሱሲ “ኔኖ አማኖንታ ጌላ ዬሌታዛ! አይዴ ጋካናሰ ታ ኢንቲናራ ዳኔ? ቃሴ አይዴ ጋካናሰ ታ ኢንቲና ዳንዳያኔ? አኔ ናዛ ሃ ታኮ ኤሂቲ” ገዴስ። 18 ሄሳፌ ጉዬ ዬሱሲ ዳይዳንሳ ሰሪዲ ናዛፔ ኬሲዴስ፤ ናዚካ ሄ ሳቲፔ ሲሚዲ ፓዲዴስ።

19 ዬሱሳ ካሊዛይቲ ፃላላ ኢዛኮ ሺቂዲ “ኑኒ ዳይዳንሳ ኬሳናሰ አዛሰ ዳንዳይቤይኮኒ?” ገዲ ኦይቺዳ።

20 ኢዚካ ኢሰታሰ “ኢንቲሰ አማኖይ ፓጩ ገዲዳ ገሽ ዳንዳይቤኬታ፤ ታ ኢንቲሰ ቱሙ ጋይሰ፤ ቁሪ ጋሼ አይፌ ማላ አማኖይ ኢንቲ ቦላ ዲዛኮ ሃይሳ ዙማ ሃይሳፌ ዳንዳዳ ጌዴ ባ!’ ኢንቲ ገዳኮ ኢዚ ኢንቲሰ ባና። ኢንቲና ፆናናይ ዴና። * 21 ሃይሳ ማላይ ገዲኮ ፆማኒኔ ዋሳን አቲን ሃራን ኬዜና” ገዴስ። *

22 ኢሰቲ ጋለላን ኢሲፌ ዲሺን ዬሱሲ ኢሰታ “ታና አሳ ና አሳሰ አሉ አማና። 23 ኢሰቲካ ኢዛ ዋቆና፤ ኢዚካ ሄቫንላ ጋለሰ ዴንዳና” ገን ኢዛ ካሊዛይቲ ኬሂ ሚሼቲዳ።

ፆሳ ኬላ ገራ ቃንፆ

24 ዬሱሲኔ ኢዛ ካሊዛይቲ ቁፊርናሆሜ ጌቲቲዛሶ ጋኪዳፔ ጉዬ ፆሳ ኬላ ገራ ኤኪዛይቲ ጴፀሮሳኮ ሺቂዲ “ኢንቲ አሰታማሬይ ፆሳ ኬላ ገራ ናሞዑ ዲናሬዛ አይሰ ቃንፆኔ?” ገዴ። *†

25 ኢዚካ ኢሰታሰ “ቃንፆሰ” ገዴስ። ጴፀሮሲ ሶ ጌሊዳ ማላ ዬሱሲ ካሴቲዲ “ሲሞና ዴሬ ካዋቲ ገራ ገዲን ዋይኮ ቃራፃ ገዲን ባ ናይታፔ ኤኪዛዬ? ሃራታፔ ኤኪዛ ሚሳቲዜ?” ገዴስ።

26 ጴፀሮሲካ “ሃራታፔ ኤኬቲሰ” ገዴስ። ዬሱሲ “ሂሰቲኮ ናይታ ቦላ አጮይ ባ ጉሳካ! 27 ሂሰቲኮካ ኢሰታ ኑ ቆጴጶንታ ማላ ኔ ሞሌ ኦይኪዛ ጌቲ ኤካ ባዳ አባን ዬጋ፤ ኮይሮ ኦይኪዳ ሞሌዛ ዴና ኔ ፖቃዳ ዴሚዛ ሚሻ ኤካዳ ታ ሱንላራኔ ኔ ሱንላራ ገራ ቃንፆ” ገዴስ።

* 17:20 ማቶ 21:21፤ ማር 11:23፤ 1ቆሮ 13:2 * 17:21 ኢሲ ኢሲ ጌኤሻ ማፃፋታን ፓይዶ ናሞዑ ታማኔ ኢሲን ቦላ ዲዛ ቆፋይ ጉጃቲቤና፤ ቃላይካ ማር 9:29 ዲዛይሳ ማላ። * 17:24 ኬሳ 30:13-15፤ 38:26 † 17:24 ኢሲ ዲናሬይ ሄ ዋዴ ኢሲ አሳሰ ናሞዑ ጋላሳ ዳሞዛ ላጌ።

18

ሳሎ ካዎቴላን ኡባፌ አቆናይ ኦኔ?

(ማር 9:33-37፤ ሉቃ 9:46-48)

1 ሄ ዎዴ ዩሱሳ ካሊዛይቲ ኢዛኮ ሸቂዲ “ሳሎ ካዎቴላን ኦ ጋራሳን ኡባፌ አቆናዴይ ኦኔ?” ጊ ኦይቺዳ። * 2-3 ዩሱሲ ኢሲ ና ያይጊ ኤሂዲ ኢሰታ ጊደን ኤሲዲ “ታ ኢንቴሰ ቱሙ ጋይሰ፤ ኢንቴ ሲሞንታ ኢደኮኔ ጉላ ናይታ ማላ ሃኖንታ ኢደኮ ሙሌካ ሳሎ ካዎቴላ ጌሌኬታ። * 4 ሄሳ ጊሽ ሃ ናዛ ማላ ባና ዘቂቲሲዛዴይ ሳሎ ካዎቴላን ኡባፌ አቆና። 5 ሃይሳ ማላ ጉላ ና ታ ሱንላን ኤኪዛዴይ ታና ኤኬሰ። *

6 “ጊደ ኦቲን ታና ኦማኒዛ ጉላታፔ ኢሳዴ ቆጶሌዛይ ዴዎ ዎፃ ሹቕ ባ ቆቆን ቃሹቲዲ ኦባ ጨማን ዩጌቲዲ ማቴቲኮ ኢዛሰ ሎፖ ጊደና” ጊዴሰ። 7 ሃና ኦላሜያ ኦሲ ቆጶና ጋሶ ጊዲዳ ጊሽ ኢዚሰ ኦዩ-ኦና! ቆጶይ ዩሰ ኦጌና ሽን ቆጶዛሰ ጋሶ ጊዲዛዴሰ ኦዩ-ኦና!

8 ኔ ኩሼይ ዎይኮ ኔ ቶሆይ ኔና ቆጶናሰ ጋሶ ጊዲኮ ኔፔ ቃንፃ ዲጋ! ኔ ናሞሱ ኩሼሱ ዎይኮ ናሞሱ ቶሆራ ጌዴ ማርና ታማን ዩጌታናፔ ዎቤ ዎይኮ ቶሆ ሲላ ጊዲዳ ሄ ጌዴ ዴዎይ ዲዛሶ ጌሎይ ኔሰ ሎናና። 9 ሃሳሉካ ኔ ኦይፌይ ኔሰ ቆጶ ጊዲኮ ኔፔ ኬሳ ዩጋ! ናሞሱ ኦይፌራ ጌዴ ጋናሜ ታማን ኔ ዩጌታናፔ ኢሲ ኦይፌራ ዴዎይ ዲዛሶ ኔ ጌሊዛይሲ ኔሰ ሎፖ። *

10 “ሃይታ ጉላታ ጊደፌ ኢሲኒዮካ ኢንቴ ካቆንታ ማላ ናጌቲቲ! ታ ኢንቴሰ ቱሙ ጋይሰ፤ ሳሎን ዲዛ ኢሰታ ኪታንቻቲ ሳሎን ታ ኦዎ ኦይፌሶ ኡባ ጋላሰ ያሌቴሰ። 11 ኦሳ ናይ ቆዩዲይታ ኦሻናሰ ዩዴሰ። **

ቆዩዳ ደርሳ ሌሚሶ (ሉቃ 15:3-7)

12 “ኦኔ ታሰ ዮቲቲ ኢሳዴሰ ያቲ ደርሲ ዲኮ ቃሴ ኢሰታፌ ኢሲና ቆይኮ፣ ሃንኮ ኡዲፋን ታማኔ ኡዲፋናታ ዙማ ቦላ ዩጊዲ ቆዩዳር ኮያና ቢ ኤሬኔ? 13 ታ ኢንቴሰ ቱሙ ጋይሰ፤ ሃንኮ ቆዩንታ ኦቲዳ ኡዲፋን ታማኔ ኡዲፋን ደርሳታፔ ኦሊዲ ቤቲዳ

* 18:1 ሉቃ 22:24 * 18:2-3 ማር 10:15፤ ሉቃ 18:17 * 18:5 ማር 9:42-48፤ ሉቃ 17:1-2 * 18:9 ማቶ 5:29 * 18:11 ሉቃ 19:10 * 18:11 ኢሲ ኢሲ ጌሻ ማፃፋቲ ጋይደ ታማኔ ኢሲን ቦላ ዲዛ ቆፋ ጉጃቲሰ፤ ኢዚካ ሉቃሳ ሸምፖ 10 ቦላ ዲዛይሳ ማላ።

ደርሳይን ኡፋዬቴስ። 14 ሄሳሉካ ሃ ጉላታ ጊደፌ ኢሶይ ጳያና ማላ ሳሎን ዲዛ ኢንቴ ኣዋ ሼኔ ጊዳና።

ቆሂዳዴስ ኣይ ኦፋና ቤሲዛኮ

15 “ኔ ኢሻይ ኔና ቆሂኮ ኢዛኮ ባዳ ኢዛ ፃላላ ኔናራ ኤካዳ ኢዛ ሞሮ ኢዛስ ዮታ፤ ኢዚ ኔ ጊዛ ሲዪኮ ኔ ኢሻ ኔ ኣስ ኦፋሳ።

* 16 ኢዚ ኔ ጊዛይሳ ሲዮንታ ኢጂኮ ዮጋይ ወሪ ናምዑ ማርካን ዋይኮ ሄሹ ማርካን ላጲዛ ጊሽ ኢሳዴ ዋይኮ ናምዑ ኣስ ኔናራ ኤካ ባዳ ኢዛ ሃሳይሳ። * 17 ኢዚ ኢስታካ ሲዮንታ ኢጂኮ ዋሳ ኬፋስ ዮታ፤ ዋሳ ኬፋዮካ ሲዮንታ ኢጂኮ ኢዛዴ ኔ ኣማናንታይ ማላኔ ዮቲን ሲሞንታ ኢታ ኣሳ ማላ ቆዳ።

18 “ታ ኢንቴስ ቱሙ ጋይስ፤ ኢንቴ ቢታ ቦላ ቃቹዳይ ወሪካ ሳሎኒካ ቃሹቴዳ ጊዳና፤ ኢንቴ ቢታ ቦላ ቢርሺዳዚ ሳሎኒካ ቢርሹቴዳይሳ ጊዳና። * 19 ቃሴካ ታ ኢንቴስ ቱሙ ጋይስ፤ ኢንቴ ቢታ ቦላ ናምዑ ጊዲዲ ኣይ ሚሸካ ኤሮ ኤሮ ጊዲ ኢንቴ ኦይቹኮ ሳሎን ዲዛ ታ ኣዋይ ኢንቴስ ኢማና። 20 ናምዑ ዋይኮ ሄሹ ጊዲዲ ታ ሱንላን ኢንቴ ሽቁዛሶን ሄን ኢንቴ ጊደን ታ ዳና” ጊዳስ።

ማር ጊሽ

21 ሄሳ ዋዴ ጳፅርሲ ዬሱሳኮ ሸቂዲ “ጎዶ! ታ ኢሻይ ታና ቆሂኮ ታ ኢዛስ ኣፑንቶ ኣቶ ጎ? ላፑንቶ ኣቶ ጎ?” ጊዳስ። *

22 ዬሱሲካ ኢዛስ ዛሪዲ “ላፑን ታሙቶ ላፑን ኣቲን ላፑንቶ ፃላላ ጋ፣ ጊኬ፤ *

23 “ሄሳ ጊሽ ሳሎ ካዋቴሉ ኣሸካራ ቦላ ዲዛ ሚሹ ሺሻና ኮይዳ ካዋ ሚሳታወስ። 24 ሚሻ ቆዳ ኦይኪዳ ማላ ኢዛ ኣሸካራታፔ ዳሮ ሚሎኔ ቢራ ኣጮይ ኢዛ ቦላ ዲዛዴ ኤኪ ዩዳ። † 25 ኣሸካራይካ ኢዛ ቦላ ዲዛ ኣጮዛ ቃንጋይ ያንዳ ጊሽ ኢዚካ ኢዛ ማቹያካ ኢዛ ናይቲኔ ኢዛስ ዲዛዚ ወሪ ባይዜቲዲ ሚሻይ ቃንጃታና ማላ ኢዛ ጎዳይ ኣዛዚዳስ። 26 ሄ ዋዴ ኣሸካራዚ ጎዳዛ ቶሆ ቦላ ኩንዲዲ ‘ታኒ ታ ቦላ ዲዛ ኣጮዛ ወርሲ ኔስ ቃንፃና

* 18:15 ሉቃ 17:3 * 18:16 ዛሬ 19:15 * 18:18 ማቶ 16:19፤ ዮሃ 20:23 * 18:21 ሉቃ 17:3-4 * 18:22 ሜዴ 4:24 † 18:24 ዳሮ ሚሎኔ ቢራ ዳሮ ሚሎኔ ቢራ ጊዛይሲ ኣማራፉ ማፃፃን ‘ሜክሊቴ’ ጌስ፤ ኢሲ ሜክሊቴይ ሄ ዋዴ ኢሲ ኣሳስ ታማኔ ኢቻሹ ላይላ ዳሞዜፔ ቦላ ጊዲዳይሳ ቤሲስ።

ጋካናስ ታስ ጉላ ዎዴ ኢማርኪ! ጊዲ ዎሲዴስ። 27 ኢዛ ጎዳይካ ኢዛስ ሚሼቲዲ ኢዛ ኣጮዛ ወርሲ ማሪዲ ዬዲዴስ።

28 “ሄ ኣሽካራይካ ባ ጎዳ ኣቻፌ ከዚዳ ማላ ጉላ ኣጮይ ኢዛ ቦላ ዲዛ ባ ላጌ ዴሚዲኔ ኄ ቦላ ዲዛ ታ ሚሻዮ ሃዒ ሃኒን ቃንፃ፣ ጊዲ ጩሊ ኦይኪዴስ። † 29 ሄ ኢዛ ላጌ ኣሽካራይ ታስ ጉላ ዎዴ ኢማርኪ! ታ ኔስ ቃንፃና፣ ጊዲ ኢዛ ቶሆ ቦላ ኩንዲዲ ዎሲዴስ።

30 “ጊደ ኣቲን ኢዛስ ጉላ ዎዴ ኢማናስ ኮዮንታ ኢዲዲ ኢዛ ላጌዚ ባ ቦላ ዲዛ ኣጮዛ ቃንፃና ጋካናስ ቃሾ ከፋን ዬጊዴስ።

31 ሄሳ ኢዚ ኣሉሽን ቤዪዳ ኣሳይኔ ሃንኮ ኢዛ ላጌ ኣሽካራቲ ዳሮ ሚሼቲዲ። ቢዲካ ሃኒዳይሳ ወርሲ ባ ጎዳስ ዮቲዳ።

32-33 “ሄ ዎዴ ጎዳዚ ሄ ኣሽካራ ዪይጊሲ ኤሂዲ፣ ሃይሶ ኔኖ! ኢታዞ፣ ኔ ታና ዎሲን ኔ ቦላ ዲዛ ኣጮዛ ታ ኔስ ኣጋዲሲሽን ታ ኔና ማሪዲ ማላ ኔካ ኔ ላጌዛ ማሪናስ ቤሴኔ? 34 ጊዲ ኢዛ ቦላ ዲዛ ኣጮዛ ኢዚ ወርሲ ቃንፃና ጋካናስ ቃቻና ማላ ቃቸዛይታስ ኣሉ ኢሚዴስ። 35 ሄሳ ጊሽ ኢንቲ ኢሶይ ኢሳ ዎዝናፔ ማሮንታ ኣጊኮ ሳሎን ዲዛ ታ ኣዎይካ ኢንቴና ማሪና” ጊዴስ።

19

ዬሱሲ ኤኮ ጊሺኔ ጌሎ ጊሽ ታማርሲዴስ (ማር 10:1-12)

1 ዬሱሲ ዮቲ ወርሲዳፔ ጉዬ ጋሊላ ኣጊዲ ዮርዳኖሴ ፒንፋን ዲዛ ዩሁዳ ኣወራጃ ቢዴስ። 2 ዳሮ ዴሬይ ኢዛ ሄን ካሊን ኢዚካ ሃርጋንቻታ ፓሉዴስ።

3 ፋርሳዌቲ ኢዛ ፓጫናስ ኢዛኮ ሸቂዲ ኣይ ጋሶንካ “ኣሲ ባ ማቾ ኣንጂ ዬዳና ቤሲዜ?” ጊዲ ኦይቺዳ።

4 ኢዚካ ኢስታስ “ዖሲ ኮይርፔ ማጫኔ ኣዴ ማዲዳይሳ ናባቢቤይኮቲ? ጊዴስ። * 5 ቃሴካ ‘ኣሲ ኣዎኔ ኣዮ ኣጊዲ ባ ማቺራ ኢሲፌ ጊዴስ። ናምዓይካ ኢሲ ኣሾ ጊዴቲስ’ ጌቴቲዳይሲ ሃይሳ ጌዶን ጊዴኔ? ጊዴስ። * 6 ናምዓይ ኢሲ ኣሾ ኣቲን ሲንሳፌ ናምዑ ጊዴቴና። ሄሳ ጊሽ ዖሲ ጋሉ ዎዲዳይሳ ኣሲ ሻኮሮ” ጊዴስ።

† 18:28 ጉላ ኣጮይ ጊዛይሳ ኣማራፉ ማፃፋን ‘ዓቱ ዲናራ’ ጌስ፤ ሄ ዎዴ ኢሲ ኣሳስ ኢሲ ጋላሳ ኦሶ ዳዋዜ ቤሴስ። * 19:4 ሜዴ 1:27፤ 5:2 * 19:5 ሜዴ 2:24

7 ኢስቲካ ኢዛስ “ሂስቲን ሙሴይ ኅሲ ባ ማቸ ኣንጂ ዩዲዳ ኣንጅ ዋራቃታ ኢዚስ ኢሚ ዩዶ ጊዲ ኣዛስ ኣዛዚዳ?” ጊዳ። *

8 ዩሱሲካ ኢስታስ “ሙሴይ ኢንቴ ዎዝና ሙሜቴሳ ቤዪዲ ማቸታ ኢንቴ ኣንጅና ማላ ፒቃዴ ኢንቴስ ኢሚዴስ ኣቲን ኮይሮፔ ሄሳ ማላ ጊዳና።

9 “ታ ኢንቴስ ቱሙ ጋይስ፤ ባ ኣዚናፔ ሃራራ ላይማቶንታ ዲሺን ባ ማቸ ኣንጂዲ ሃራ ማቸ ኤኪዛዴይ ዉሪ ላይማቴስ። ኣንጅቲዳሮካ ኤኪዛዴይ ኢዚራ ላይማቴስ” ጊዳስ። * 10 ዩሱሳ ካሊዛይቲ ኢዛስ “ማቸ ዎጋይኔ ኣዚና ዎጋይ ሃይሳ ማላ ጊዲኮ ማቸ ኤኮንታ ኣጎይ ሎዎ” ጊዳ።

11 ጊዶ ኣቲን ዩሱሲ ኢስታስ “ኢሲ ኢሲ ኢሚቲዳ ኣሳታፔ ኣቲን ሃይሳ ቲሚርቴዛ ኦኒካ ኤካናስ ዳንዳዬና። 12 ጋሶይካ ኢሲ ኢሲ ኣሳይ ባ ኣዩ ኡሎፔ ዩሌቲሼ ሹፋ ጊዲዲ ዩሌቴስ፤ ኢሲ ኢሲ ኣሳይ ኣሳ ኩሼን ቃራቴቲዲ ጉንዲሌስ፤ ኢሲ ኢሲ ኣሳይ ሳሎ ካዎቴሳስ ጊዲ ባና ባርካ ጉንዲላ ኦሲዛ ኢሲካ ዴስ። ሃይሳ ኤካናስ ዳንዳዩዛዴይ ኤኮ” ጊዳስ።

ዩሱሲ ጉላ ናይታ ኣንጂዴስ
(ማር 10:13-16፤ ሉቃ 18:15-17)

13 ሄ ዎዴ ዩሱሲ ኢስታ ሶላ ባ ኩሼ ዎሊዲ ዎሳና ማላ ጉላ ናይታ ኢዛኮ ኤኪ ኤሂዳ፤ ጊዶ ኣቲን ኢዛ ካሊዛይቲ ናይታ ኤሂዳ ኣሳታ ሶላ ሃንቁቲዳ። 14 ዩሱሲ “ናይቲ ሃ ታኮ ዩቶ፤ ዲጎፍቴ፤ ሳሎ ካዎቴሊ ሃይታንታ ማላሳ!” ጊዳስ።

15 ባ ኩሼ ናይታ ሶላ ዎሊዲ ኣንጂዳፔ ጉዬ ሄፔ ዴንዲ ቢዴስ።

ናቴሳ ዲሬ ኣዳዛ ኦይሻ
(ማር 10:17-31፤ ሉቃ 18:18-30)

16 ሄሳፌ ጉዬ ኢሳዴይ ዩሱሳኮ ሺቁዲ “ኣስታማሬ! ሜርና ዴዎ ዴማናስ ታኒ ሎዎ ኦሶ ኣይ ኦሉ?” ጊዲ ኦይቺዴስ።

17 ዩሱሲካ “ታና ኣዛስ ሎዎ ጊሽ ኦይቻይ? ሎዎይ ኢሲ ያሳ ያላላ፤ ጌዴ ዴዎይ ዲዛሶ ኔ ጌላና ኮይኮ ኣዛዘታ ናጋ” ጊዳስ።

18-19 ኣዴዚ “ኣዛዘቲ ኣዎይቲ?” ጊዲ ኦይቺዴስ። ዩሱሲካ ዛሪዲ “ኣስ ዎዶፓ፤ ላይማቶፓ፤ ካይሶቶፓ፤ ዎርዶ ማርካቶፋ፤ ኔ

* 19:7 ዛሬ 24:1-4፤ ማቶ 5:31 * 19:9 ማቶ 5:32፤ 1ፉር 7:10-11

አዎኔ ኔ አዮ ቦንቻ፤ ኔ ሾር ኔ ማላ ሲቃ” ገዴሰ። * 20 ናቴላዚ ዛሪዲ “ሃይሳ ወርሳ ታ ናጋዲሰ፤ ሃራይ ኣዚ ታሰ ፓጩዴ?” ገዴሰ።

21 ዩሱሲካ ዛሪዲ “ኔ ሙሌ ዓላና ኮይኮ ባዳ ኔ ሃሪዳዝ ወርሳ ባይዛዳ ሚሻ ወርሳ ማንቆታሰ ኢማ፤ ኔኒ ሳሎን ሚሽ ዴማንዳሳ፤ ሃሳፌ ጉዬ ሲማ ያዳ ታና ካላ” ገዴሰ።

22 አዴዚ ሃሳ ሲይዲ ኢዛሰ ዳር ሚሽ ዲዛ ገሽ ኬሂፕ ሚሽቴሽ ቢዴሰ። 23 ዩሱሲ ባና ካሊዛይታ “ታ ኢንቴሰ ቱሙ ጋይሰ፤ ዲሬቲ ሳሎ ካዎቴላ ጌላናይሲ ዳር ሜቶ። 24 ቃሴካ ታኒ ኢንቴሰ ገዛይ ዲሬይ ሳሎ ካዎቴላ ጌላናይሳፌ ጋሜላይ ናርፕ ለኮራ አዴላ ካወያና” ገዴሰ። *

25 ሃሳ ሲዩዳ ኢዛ ካሊዛይቲ ዳር ቆፒዲ “ሂሰቲን ኦኒ ኣታናሰ ዳንዳዩዜ?” ገዲ ዩሱሳ ኦይቸዳ።

26 ዩሱሲካ ኢሰታ ያሊዲ “ሃይሲ ኣሳ ኣቻን ዳንዳዬቴና፤ ያሳ ኣቻን ገዲኮ ወሪካ ዳንዳዬቴሰ” ገዴሰ።

27 ጴጥሮሲ ኢዛሰ ዛሪዲ “ኑ ወርሲካ ኣገዲ ኔና ካሊዳሰ፤ ሂሰቲን ሃዒ ኑ ኣይ ዴማኔሻ?” ገዴሰ።

28 ዩሱሲካ ኢሰታሰ “ታ ኢንቴሰ ቱሙ ጋይሰ፤ ኣሳ ናይ ቡር ያና ኦራላ ኣላሜን ባ ቦንቻ ኣልጋ ቦላ ኡቲዛ ዎዴ ኢንቴ ታና ካሊዳይቲ ታማኔ ናምቡ ኣልጋ ቦላ ኡቲዲ ታማኔ ናምቡ ኢሰራዔሌ ናይታ ቦላ ፒርዳና። * 29 ታ ሱንላ ገሽ ገዲ ባ ኬፍ፣ ባ ኢሻታ፣ ባ ሚቸታ፣ ባ አዎ፣ ባ አዮኔ ባ ናይታ፣ ዎይኮ ባ ቢታ ኣገዛ ኣሲ ወሪ ዪቱ ኩሽ ዳኮ ኤካና፤ ሜጲና ዴያካ ላታና። 30 ገዴ ኣቲን ዳር ሲንፍ ገዲዳ ኣሳቲ ጉዬ ገዳና፤ ዳር ጉዬን ዲዛ ኣሳቲ ሲንላታና። *

20

ዎይኔ ኣታኪልቲ ኦሳንቻታ ለሚሶ

1 “ሳሎ ካዎቴላ ባ ዎይኔ ኣታኪልቲ ገደን ኦሊዛ ኦሳንቻታ ቃፃራናሰ ማለደራ ኬዚዳ ኢሲ ኣታኪልቲይ ዲዛ ጋዳዴ ሚሳታወሰ። 2 ኢሲ ጋላሳ ዳሞዛ ገዲዛዝ ሃሳዬቲዲ ገገዳፕ ጉዬ ኦሳንቻታ ዎይኔ ኣታኪልቲ ኦሶ ኦይሊዴሰ።

* 19:18-19 ኬሳ 20:13-16፤ ዛሬ 5:17-20፤ ለዌ 19:18 * 19:24 ጋሜላይ ገዛይሳ ኢሲ ኢሲ ባጋ ጋሞላ ቃላን ጋሊይ ጌቴሰ። * 19:28 ማቶ 25:31፤ ሉቃ 22:30 * 19:30 ማቶ 20:16፤ ሉቃ 13:30

3 “ማላዶ ሃቡ ሳቲን ኬዚዲ ኦሶይ ባይንዳ ማላ ጊያይ ኤቁዘሶን ኤቁዳ ሃራ ኣሳታ ዳሚዳ። 4 ‘ኢንቲ ቢዲ ታ ዋይኔ ጊደን ኦሊቲ፤ ታ ኢንቲሰ ቤሲዛ ሚሼ ኢማና፣ ጊዳ። 5 ኢሰቲካ ቢዳ። ቃሴካ ገላሳፌ ኡሱፑን ሳቲኒኔ ኡዲፋን ሳቲ ቦላ ኬዚዲ ሃራ ኦሳንቻታ ኦሶን ጌልሊዳ። 6 ኦማርሳ ዋዳ ታማኔ ኢሲ ሳቲ ጊዲዛ ዋዳ ኬዚዲ ጮ ኤቁዳይታ ሃራታ ዳሚዲ ‘ኢንቲ ኩማላ ገላሰ ኦሶይ ባይንዳ ኣዛሰ ሃይሳን ኤቁቲ?’ ጊዲ ኦይቺዳ።

7 “ኢሰቲካ ‘ኑና ኦሊሲዛ ኣሲ ቆዩዳ ጊሽ ኤቁደሰ’ ጊዳ። ኢዚካ ኢሰታ ‘ኢንቲካ ቢዲ ታ ዋይኔ ኣታኪልቲ ጊደን ኦሊቲ’ ጊዳ።

8 “ጋዴይ ቃሚሽን ዋይኔ ኣታኪልቲዛ ጎዳይ ኦሳንቻታ ኣላፊዛሰ ‘ጉዬፕ ዩዳይታፕ ኦይካዳ ኮይሮ ዩዳይታ ጋካናሰ ዲዛ ኦሳንቻታ ወርሲ ዪይጋዳ ኢሰታ ኦሶ ዋጋ ቃንፃ’ ጊዳ። * 9 ታማኔ ኢሲንፋ ሳቲ ቦላ ኦሶን ጌሊዳይቲ ዩዲ ኢሶይ ኢሶይ ኩማላ ገላሳ ዋጋ ኤኪዳ።

10 “ኮይሮ ኦሶን ጌሊዳይቲ ዩሼ ባ ዋዝናራ ሂንኮይታፕ ቦላራ ዳሮ ዳማና ጊ ቆፕሺን ኢሰታሰካ ሂንኮይታራ ጊና ኢሚዳ። 11-12 ሚሻ ኤኪሼ ቃንፃዛዴ ቦላ ‘ሃይቲ ወርሴላን ኦሶን ጌሊዲ ኢሲ ሳቲ ፃላላ ኦሊዳይቲ ኩማላ ገላሰ ኦሶን ዱራዳኔ ኣዋን ጮጌቲዲ ፔራዳ ኦሳራ ዋሰታ ኢሰታሰ ኢሲ ጊና ቃንፃይ?’ ጊዳ።

13-14 “ኢዚካ ኢሰታፌ ኢሳዳሰ ‘ታ ጀላዉ! ኔና ቆሃቤኪ፤ ኢሲ ገላሳሰ ጊዲዛ ዳሞዛን ኦላናሰ ታናራ ገጋቤይኪ? ሃራ ሃሂ ኔ ገሻ ኤካዳ ባ፤ ኔሰ ኢሚዳይሳ ማላ ወርሴላን ዩዳይሳሰካ ታ ኢማና ኮያይሰ። 15 ሂሰቲን ታ ሚሻን ታ ደሲዳዚ ኦላናሰ ዳንዳዒኪና? ዋይኮ ታ ኪያ ጊዲዳይሲ ኔና ቃናቲሲዜ?’

16 “ጉዬን ዲዛይቲ ሲንሌ፣ ሲንሌን ዲዛይቲ ጉዬ ኣቆና” ጊዳ። *

ዩሱሲ ባ ሃይቆ ጊሽ ሃቡንሉ ዮቲዳሰ
(ማር 10:32-34፤ ሉቃ 18:31-34)

17 ዩሱሲ ዩሩሳላሚ ቢሼ ባና ካሊዛ ታማኔ ናምዓታ ዲማ ሻኪ ኤኪዲ 18 “ሂያ ኔኒ ዩሩሳላሚ ባና ጎሰ፤ ኣሳ ናይ ቁሴታ ሃላቃሲኔ ጮሴ ዋጋ ታማርሲዛይታሰ ኣጲ ኢማታና፤ ኢሰቲካ ኢዚ ሃይቃና ማላ ኢዛ ቦላ ፒርዳና። 19 ኢዛ ቦላ ቁጲ ካዳናሲኔ

* 20:8 ሉዌ 19:13፤ ዛሬ 24:15 * 20:16 ማቶ 19:30፤ ማር 10:31፤ ሉቃ 13:30

ጋራፋና ማላ፣ ዋዳና ማላካ ዳሬታሰ አሉ ኢማና፤ ሄዡንሉ ጋላሰ ኢዚካ ሃይቆፔ ዳንዳና” ጊዳሰ።

ዛቢዳሳ ናይታ ኣዩይ ኦይሻ
(ማር 10:35-45)

20 ሄሳፌካ ዛቢዳሳ ናይታ ኣያ ባ ናይታራ ዩሱሳኮ ሺቃዳ ኢዛ ሰንሳን ጉልባታዳ ዩሱሲ ኢዚሰ ኢሲ ሚሽ ኦላና ማላ ዋሳዲሰ።

21 ኢዚካ ኢዛ “ኣይ ኮያይ?” ጊዳሰ፤ ኢዛካ “ሃይቲ ታ ና ናምዓቲ ኔ ካዋቲላን ኢሶይ ኔ ኡሻቻራ፣ ኢሶይ ኔ ሃዲርሳራ ኡታና ማላ ኦላርኪ!” ጋዲሰ።

22 ዩሱሲካ ዛሪዲ “ኢንቲ ዋሲዛዝ ኤሬኬታ፤ ታኒ ኡዩዛ ፀዓ ኢንቲ ኡያና ዳንዳያኔ?” ጊዳሰ። ኢሰቲካ “ኤ ዳንዳዮሰ” ጊዳ።

23 ኢዚካ “ታ ፀዓፔ ቱሙ ኢንቲ ኡያናሺን ታ ኡሻቻኒ ኔ ታ ሃዲርሳን ኡቲሉ ታ ኣዋይ ገገሲዳዳንታሰ ኣቲን ታኒ ኢሚዛዝ ዳና” ጊዳሰ። 24 ታማቲ ሄሳ ሰይዲ ናምዑ ኣሻታ ቦላ ሃንቄቲዳ።

25 ዩሱሲ ኢሰታ ኢሲ ቦላ ያይገዲ “ኣይዛቤ ሃላቃቲ ባ ሃሪዛ ዳሬ ቦላ ጎዳቲዛይሳ ማላ ጎዳቲሉ ዲዛይቲ ዋልቃራ ሃሪዛይሳ ኢንቲ ኤሬታ። 26 ኢንቲ ጊደን ሄሳ ማላ ሃናናሰ ቤሴና፤ ኢንቲሬ

ጊታ ጊዳና ኮዩዛዳይ ኢንቲሰ ኦላዛዳ ጊዳ። * 27 ኢንቲሬ ቦላ ጊዳናሰ ኮዩዛዳይ ኢንቲሬ ጋርሰ ጊዳ። 28 ኣሳ ናይ ኣሳይ ኢዛሰ ኦላና ማላ ጊደንታ ኣሳሰ ኦላናሲኔ ባ ሸምፖ ዳርታ ገሽ ኣሉ ኢማናሰ ዩዳሰ” ጊዳሰ።

ዩሱሲ ኣይሬ ቆቄ ናምዑ ኣሳታ ፓሊዳሰ
(ማር 10:46-52፤ ሉቃ 18:35-43)

29 ዩሱሲ ባና ካሊዛይታራ ኢያርኮሬ ኬዚዲ ቢሸን ዳር ዳሬይ ኢዛ ካሊዳሰ። 30 ሄን ኣይሬይ ቆቄዳ ናምዑ ኣሳቲ ኦጌ ዳናን ኡቲ ዳቲሰ። ዩሱሲ ኣዲ ቢዛይሳ ሰይዲ “ጎደ! ዳወቲ ናዉ ኦና ማራ!” ጊዲ ዋሲዳ።

31 ዳሬዚ “ሃይዚቲ!” ጊዲ ሃንቄዳሰ፤ ጊደ ኣቲን ኢሰቲ ዳርሲ ዋሲሽ “ጎደ! ዳወቲ ናዉ ኦና ማራ!” ጊዳ።

32 ዩሱሲካ ኤቂዲ ኢሰታ ያይገዲ “ታ ኢንቲሰ ኣይ ኦላና ማላ ኮዩቲ?” ጊዳሰ።

33 ኢሰቲካ “ኦ ኣይሬይ ያላና ማላ ኮዮሰ” ጊዳ። 34 ዩሱሲ ኢሰታሰ ሚሽቲዲ ኢሰታ ኣይሬታካ ባ ኩሼራ ቦሽቲን ሃራካ ያሊዲ ኢዛ ካሊዳ።

* 20:26 ማቶ 23:11፤ ማር 9:35፤ ሉቃ 22:26

21

ዩሱሲ ጌታ ቦንቸን ዩሩሳሌም ጌሊዳስ

(ማር 11:1-11፤ ሉቃ 19:28-38፤ ዮሃ 12:12-19)

1 ኢስቲ ዩሩሳሌም ማታን ዳብራዛይቲ ዙማ ቦላ ዲዛ ቤቴፋጌ ጌቴቲዛሶ ጋኪዳ ማላ ዩሱሲ ባና ካሊዛይታፔ ናምዓታ ከቲዳስ።

2 “ሃኖ እንቲ ማታን ዲዛ ጉታዮ ቢዲ እንቲ ሄ ጋኪዳ ማላ ኢሲ ሃሪ ዲዛራ ባ ጉቴይራ ቃሼታ ዲሺን እንቲ ዳማና። ቢርሺዲ ሃ ታኮ ኤኪ ዩቲ። 3 ኦኒካ እንቲና ‘ኣይስ ሃይሳላ ኦሌቲ?’ ጌኮ ‘ጎዳይ ኢስታ ኮዩሶ’ ጌቲ፤ እንቲና ኦይቸዛዳይ ሄራካ ዩዳና።

4-5 “ሃይሲካ ሃኒዛይ ካሴ ናቤን ጸዮኒስ ሂዝጌቲ

‘ሂኮ! ኔ ካዎይ ኣሽኬ ጌዲዲ ሃሪዮኔ ሃሪይ ጉቴዮ ቶጊዲ ኔኮ ያና’

ጌቴቲዳይሲ ፖሌታናሳ” ጌዳስ። *

6 ኢዛ ካሊዛይቲ ዩሱሲ ኢስታስ ዮቲዳ ማላ ኦሊዲ። 7 ሃሪዮ ኢዚ ጉቴይራ ኤሂዲ ባ ማይዖ ኢስታ ቦላ ዋሊን ኢዚካ ሃሪታ ቶጊዳስ። *

8 ዳራፔ ዳሪዛ ባጋይ ባ ማይዖ ኦጌ ቦላ ሚጨዳስ፤ ባጋ ኣሳይ ሚላ ቦንጮ ዲሊ ዲሊ ኦጌ ቦላ ኣሊ ኣሊ ዩጊዳስ። 9 ኢዛፔ ሲንላራ ቢዛ ዳሬይኔ ጉዩራ ካሊዛ ዳሬይካ ባ ቃላ ቶቁ ሂስቲዲ “ሆሳና! ዳጩቲ ናይ ጋላቲቶ!

ጎዳ ሱንላን ዩዳይ ኣንጄቲዳዳ!

ዖሲ ጋላቲቶ!” ጌዳ። †

10 ኢዚ ዩሩሳሌም ጌሊዳ ዎዳ ካታማ ኣሳይ ዉሪ “ሃይሲ ኦኔ?” ጌዲ ያርክ ያርኪዳስ።

11 ኢዛ ካሊዲ ዩዳ ዳሬይካ “ሃይሲ ጋለላ ጌደን ዲዛ ናዚሬቲፔ ዩዳ ናቤ ዩሱሳ ጌዳኔ?” ጌዳስ።

ዩሱሲ ያሳ ኬሌን ዛልዔ ዛልዒዛ ኣሳ ጎዲዳስ

(ማር 11:15-19፤ ሉቃ 19:45-48፤ ዮሃ 2:13-22)

12-13 ሃሳፌ ዩሱሲ ያሳ ኬላ ጌሊዲ ያሳ ኬላ ካሪ ጌደን ጋላን ባይዚዛይታኔ ሻሚዛይታ ጎዲዳስ። ሚሽ ላሚዛይታ ፃራጶዛታኔ ሃራጶ ባዩዚዛይታ ኦይዳ ሺሪ ሺሪ ዩጊዲ “ታ ኬላይ ዎሳ ኬሌ

* 21:4-5 ዛካ 9:9 * 21:7 ሃሪታ ቶጊዳስ ጊዛይሲ NIV ጋርሳን ዳስ፤ ሃራይ ቃሴ ቲንቤቴይ ፖሌታና ማላ ሃሪ ጉቴ ቦላ ኡቲዳስ ባጋ ጌሻ ማፃፋይ ጌስ። † 21:9 ሆሳና ኢብራዊታ ቃላራ ሆሳዒና ጉሳ “ኣቶቴሌ” “ኦና ኣሻርኪ!” ጉሳ።

ጌቴቴሰ፣ ጌቴቴዲ ፃፊቴዳሰ፤ አንቴ ቃሴ ቦንቁዛይታ ጎንጎሎ ሂሰቴዳታ” ጌዴሰ። *

14 አይፌ ቆቁታኔ ቶሆይ ሲሊዳ አሳታ ዩሱሳኮ ያሳ ከሌ ኤሂዳ። አዚካ አሰታ ፓሌዳሰ። 15 ጌዴ አቴን ቁሴታ ሃላቃቴኔ ሙሴ ዎጋ ታማርሲዛይቲ አዚ ኦሌዳ ማላታታ ቤዩዳይሳኒኔ ጉላ ናይቲ “ዎዜ ካዎ፣ ጋላታይ ዳወቴ ናሰ ጌዴ!” ጌዴ ዋሲዛይሳ ሲዩዳ ጊሽ ዳር ሃንቁቲዳ።

16 አሰቴካ ዩሱሳ “ሃይቲ ናይቲ ገዛይሳ ሲያይ?” ጌዴ፤ ዩሱሲካ አሰታሰ “ኤ ሲያዲሰ፤ ናይታ ዱናፕኔ ቆሪ ማሂ ቁሪ ናይታ ዱናን ታኒ ጋላታ ገረሳዲሰ ገዛሶ ሙሌራካ ናባቢ ኤሬከቴ?” ጌዴሰ። 17 አሰታ ዩጊ አጊዲ ሄ ካታማፔ ከዚዲ ቢታኒያ ጌቴቴዛሶ ቢዲ ሄን አቁዳሰ።

አይፌይ ባይንዳ ባላሴ ሚሊዮ
(ማር 11:12-14፣20-24)

18 ዩሱሲ ዎንቴላ ጋላሰ ማላዶ ጉዬ ካታማ ሲሚሺን አዛ ጋፊሲዳሰ። 19 ኦጌ ማታን አሲ ባላሴ ጌቴቴዛ ሚሊ ቤዩዲ ጌዴ አዚኮ ሸቁሺን ሃይላ ፃላላፔ አቴን አይፌይ ባይንዳይሳ ቤዩዲ “ሂያፔ ጉዬ ኔ ቦላ አይፌይ ዶፖ!” ጊን ባላሴ ሚላያ ሄራካ ማላዲሰ።

20 ዩሱሳ ካሊዛይቲ ሄሳ ቤዩዲኔ ማላሌቲዲ “ሃና ባላሴያ ዋናዳ ሄራካ ማላዳ?” ጌዴ። 21 ዩሱሲካ አሰታ “ታ አንቴሰ ቱሙ ጋይሰ፤ አንቴሰ አማኖይ ዲኮኔ አንቴ ሲቶንታ አጊኮ ባላሴ ሚላይ ቦላ ሃኒዳይሳ ማላ ፃላላ ጌዶንታ ሃይሳ ዙማ ሃይሳፊ ቆቃሌታዳ ዱጌ አባን ጌላ፣ አንቴ ጊዳኮካ አዚ ጌላና” ጌዴሰ።

22 አንቴሰ አማኖይ ዲኮ አንቴ ዎሳን ኦይቺዳ ሚሽ ወርሲካ ኤካና።

ዩሱሳ ጎዳቴላ ጊሽ ሸቁዳ ኦይሻ
(ማር 11:27-33፤ ሉቃ 20:1-8)

23 ዩሱሲ ያሳ ከሌ ጌሊዲ ታማርሲሺን ቁሴታ ሃላቃቴኔ ዳሪ ጨማቲ አዛኮ ሸቁዲ “ሃይሳ ወርሳ ኦና ሼኔን ኦላይ? ሃይሳ ኦላናሰ ሼኔ ኔሰ ኦኒ አሚዳ?” ጌዴ አዛ ኦይቺዳ።

24 ዩሱሲካ አሰታሰ ዛሪዲ “ታካ አንቴና አሲኖ ኦይቻይሰ፤ አንቴ ታሰ ዛሪኮ ታካ ሃይታ ኦሊዛይታ ኦና ሼኔን ኦሊዛኮኔ አንቴሰ ዮታና። 25 ዮሃኒሳ ዪንቃቴይ አዎፔ ዩዴ? ሳሎፔ ዩዴይ? አሳፔ?” ጌዴሰ። አሰቴካ “ኑ ሳሎፔ ዩዴሰ” ጊኮ ሂሰቴን አዛሰ

* 21:12-13 እሳ 56:7፤ ኤር 7:11

አማኒቤኬት?’ ጋና ጊዲ ባ ጊደን ኢሶይ ኢሶይ አሳራ ዘሬቲዳ።
26 ቃሴ ኑ ‘አሳፕ’ ገኩ፣ አሳይ ወሪካ የሃኒሳ ናቤ ጊዲ አማኒዛ
ጊሽ ኑ ባቦሰ” ጊዳ።

27 ሄሳ ጊሽ ዩሱሳሰ “ኑ ኤሮኮ” ጊዲ ዛሪዳ። ኢዚካ ኢስታሰ
“ሃይታ ታ ኦሊዛይታ ኦና ሼኔን ኦሊዛኮኔ ታካ ኢንቴሰ የቲኬ”
ጊዳሰ።

ናምዑ ናይታ ለሚሶ

28 ዩሱሲ ኢስታ “ኢንቴሰ ኣይ ሚሳቲዜ? ናምዑ ኣቱማ ናይ
ዲዛ ኢሳዳይ ዳሰ፤ ኢዚካ ኮይሮ ናዛኮ ቢዲ ‘ታ ናዛ! ሃቺ
ጌዴ ዋይኔ ሚላሶ ባዳ ኦላ’ ጊዳሰ። 29 ናዚ ቃሴ ‘ቢኬ!’ ጊዲኔ
ጉዬፕ ሙዙቲዲ ቢዳሰ።

30 “ናምዳንሉ ናዛካ ካሴይሳሐካ ‘ባ!’ ጊን ናዚ ‘ኤሮ!’
ጊዲ ቦንታ ኣጋጊዳሰ። 31 ሃይታ ናምዳታፔ ኣዋ ሼኔ ፖሊዳይ
ኣዋይሴ?” ጊዲ ኦይቺዳ። ኢስቲካ “ኮይሮ ናዛ!” ጊዳ።
ዩሱሲካ ኢስታሰ፣ “ታ ኢንቴሰ ቱሙ ጋይሰ፤ ቃራፃ ቃንፃሲዛይቲኔ
ላይማቲዛይቲ ሳሎ ካዋቴሊ ኢንቴፌ ሲንላን ጌላና።

32 “ፃማቁዛ የሃኒሲ ኢንቴና ፃሎቴላ ኦጌ ቤሳናሰ ኢንቴኮ
ዩዳሰ ሺን ኢንቴ ኢዚ ጊዛይሳ አማኒቤኬታ፤ ጊዶ ኣቲን ቃራፃ
ቃንፃሲዛይቲኔ ላይማቲዛይቲ ጊዲኮ አማኒዳ፤ ኢዚ ሃኒዳይሳ
ኢንቴ ቤዩ ሲሚዲካ ማሮቴላን ጌሊዲ አማኒቤኬታ” ጊዳሰ። *

ዋይኔ ሚላ ጊደን ኦሊዛ ጎሻንቻ ለሚሶ

(ማር 12:1-12፤ ሉቃ 20:9-19)

33 “ሃራ ለሚሶካ ሲዩቴ፤ ዋይኔ ሚሊ ቶኪዛሶይ ዲዛዳይ
ሄ ዋይኔዛሰ ቢርዳ ዩሺ ኣሊዲ ዋይኔዛ ኣይፌ ጉምዳናሰ ኦላ
ቦኪዳሰ። ዋይኔዛ ናጋናሰ ሚላ ቦላ ሻኮ ጊጊሲዳሰ። ሄሳፌ ጉዬ
ጋዴዛ ዋይኔ ሚላራ ጎይዛይታሰ ኪራ ኢሚዲ ሃራ ዳሬ ቢዳሰ። *†

34 ቦኔይ ጋኪሺን ዋይኔ ሚላዛ ኣይፌ ኤካናሰ ባ ኣሸካራታ ጋዴዛ
ጎይዛይታኮ ዩዲዳሰ። 35 ጋዴዛ ጎይዛይቲ ኣሸካራታ ኦይኪዲ
ኢሳ ዋዲዳ፤ ኢሳ ቃሴ ሹቻን ጫዲዳ። 36 ጋዳ ጎዳይ ካሴይታፔ
ኣዲዛ ሃራ ኣሸካራታ ዩዲዳሰ። ጎይዛይቲ ሃሳካ ካሴይታ ቦላ
ኦሊዳይሳ ማላካ ኢስታ ቦላካ ፖሊዳ። 37 ወርሴላን ኦኒ ኤሪዜ
‘ኢስቲ ኢዛ ቦንቻናኮኔ’ ጊዲ ባ ና ኣሊ ዩዲዳሰ። 38 ጊዶ ኣቲን
ጋዳ ጎይዛይቲ ናዛ ቤዩዳ ማላ ‘ሃይሲ ኢዛ ላታናይሳኮ! ኣኔ ሃ

* 21:32 ሉቃ 3:12፤ 7:29-30 * 21:33 ኢሳ 5:1-2 † 21:33 ሻኮ ኢሲ
ኢሲ ባጋ ጋምላ ቃላን ቱላ ጌቴቴሰ።

ዪቴ፣ ኢዛ ዎዲ ደጋ ላቶሰ፣ ጊዳ። 39 ናዛ ኦይኪዲ ዎይኔይ ቶኩቲዳሶፕ ጌዴ ካሬ ኩሲዲ ዎዲ።

40 “ኤር! ዎይኔዛ ጎዳይ ዪዛ ዎዴ ሄ ጋዳ ጎዪዛ አሳታ ዎሰታና ኢንቴሰ ሚሳቲዜ?” ጊዴሰ። 41 ኢሰቲካ “ሄይታንታ ኢታታ ዳር ዎይሲ ዎዲ ዎይኔይ ቶኩቲዛ ጋዳፕ ቤሲዛ ዎይኔ ኣይፌ ዎዴራ ኢዛሰ እሚዛ ሃራ ጋዴ ጎይዛይታሰ ኪራሳና” ጊዲ ኢዛሰ ዛሪዳ።

42 ዬሱሲካ ኢሰታሰ “ጌሻ ማፃፋን ጊምቤ ከይዛይቲ ኢታ ጊዲ ዎራ ዬጊዳ ሹቻይ ከላሰ ማዛኔ ቦላ ዎዲዛ ሹቻ ጊዲዴሰ፤ ያሲ ሃይሳ ኦሊዴሰ፤ ኢዛ ኦሶይካ ኑ ኣይፌሰ ማላሊሲዛዝ፣

ጌቴቲ ዓፊቲዳይሳ ናባቢቤኬቲ? *

43 “ሃሳ ጊሽ ታ ኢንቴሰ ያሳ ካዎቴሊ ኢንቴፊ ኤኬታዳ ኣይፌ ኣይፊዛ ዴሬታሰ ኢሜታና። 44 ሃይሳ ሹቻ ቦላ ኩንዲዛይ ሜቃና፤ ሹቻይ ኢዛ ቦላ ዎዲዛዴይካ ሊቃና” ጊዴሰ። §

45 ቄሴታ ሃላቃቲኔ ፋርሳዌቲ ኢዛ ለሚሶይ ኢሰታ ጊሽ ጊዲዳይሳ ኤሪዳ። 46 ጊዶ ኣቲን ኢሰቲ ኢዛ ኦይኪ ቃቸንታ ማላ ኣሳይ ዬሱሳ ናቤ ማላ ያሊዛ ጊሽ ባቢዳ።

22

ሳርጌሰ ያይጌቲዳ ኣሳታ ለሚሶ (ሉቃ 14:15-24)

1 ቃሴካ ዬሱሲ ሃራ ለሚሶ 2 “ሳሎ ካዎቴሊ ባ ናሰ ሳርጌ ጊሊሲዳ ኢሲ ካዎ ሚሳታዉሰ። 3 ካዎይካ ዲጊሳሰ ዮቲዳይታ ያይጋናሰ ባ ኣሽካራታ ዬዲዴሰ፤ ያይጌቲዳይቲካ ኑ ቦኮ፣ ጊዳ።

4 “ቃሴካ ሃራ ኣሽካራታ ‘ካሴ ኢሰታሰ ዮቲዳይታ ሄኮ ታ ሳንጋ ቦራታኔ ዎዲዳ ሜሃታ ሹካዳ ዲጊሳ ጊሊሳዲሰ፤ ዉሪካ ጊጌቲዳ ጊሽ ሳርጌሶ ሃ ዪቴ!’ ጊዲ ዮቲቴ። 5 ያይጌቲዳይቲ ጊዲኮ ኢዛ ያይሳ ዉዳን ዬጎንታ ኣጊዲ ኢሶይ ባ ጎሻሶ፣ ኢሶይ ባ ዛልዔሶ ቢዴሰ። 6 ሃንኮ ኣቲዳይታ፣ ኣሽካራቲ ኦይኪዲ ዳር ዎይሲዲ ዎዲ።

* 21:42 ማዛ 118:22-23 § 21:44 ኢሲ ኢሲ ጌሻ ማፃፋቲ ፓይዶ ኦይዲ ታማኔ ኦይዲ ቦላ ዲዛይሳ ጉጃቴሰ፤ ቆፋይካ ሉቃሳ ሹምፖ 20:18 ዲዛይሳ ሚሳቲሰ።

7 “ካዎይካ ሃንቁቲዲ ዋታዳራታ ዬዲዲ አሽካራ ዋዲዳይታ ዳይሲዳሰ፤ ኢስታ ካታማ ፀጊዳሰ። 8 ባ አሽካራታካ ‘ሳርጌዛ ዲጊሴይ ጊጊዳሰ፤ ጊዶ ኣቲን ሳርጌዛሶ ያይጌቲዳይቲ ሳርጌሰ ቤሲዛይታ ጊዲቤቴና። 9 ጌዴ ኦጌ ቦላ ኮዚዲ ኢንቲ ዳሚዳ ኣሰ ዉርሲ ሃ ሳርጌ ዲጊሴሰ ያይጊቲ’ ጊዳሰ። 10 አሽካራቲካ ኦጌ ቦላ ኮዚዲ ባ ዳሚዳይታ ሎዖታካ ኢታታካ ዉርሲ ሺሺዲ ሳርጌዛሶ ኢማላ ኩንሊዳ።

11 “ካዎይካ ያይጌቲዳ ኢማላ ቤያናሰ ሶ ጌሊዛ ዋዴ ሳርጌ ማይዖ ማይዖንታ ኣሰ ዳሚዳሰ። 12 ‘ሃይሶ! ሳርጌ ማይዖ ማይዖንታ ዋናዳ ሃይሳ ጌላናሰ ዳንዳያዲ?’ ጊ ኦይቺን ኣዴዛሰ ዛራና ቃላይ ዳዩዳሰ። 13 ካዎይካ ባ አሽካራታ ‘ሃይሳ ኣዴዛ ቶሆኔ ኩሼ ሺሺ ቃቺዲ ሄን ካሬን ዲዛ ዲማን ኮሲ ኦሊቲ፤ ሄን ዬሆኔ ኣቻ ጋርጬቶ ጊዳና።’ *

14 “ያይጌቲዳይቲ ዳርታ፤ ዶሬቲዳይቲ ጊዲኮ ጉላታ” ጊ ዮቲዳሰ።

ጊራ ቃንፃናሰ ሺቂዳ ኦይሾ
(ማር 12:13-17፤ ሉቃ 20:20-26)

15 ሄሳፌ ጉዬ ፋርሳዌቲ ኮዚ ቢሼ “ኢዛ ዲናፔ ባላ ቃላ ዋሰቲ ዳሚ ኦይኪኖ?” ጊዲ ዘሬቲዳ። 16 ባና ካሊዛይታ ሄርዶሳ ኣሳታራ ኢዛኮ ኪቲዲ “ኣስታማሬ! ኔኒ ቱማንቻኔ ያሳ ኦጌ ቱማፔ ታማርሲዛይ ጊዲዳይሳኔ ኦናሰካ ዲማ ማዶ ኦሉንታ ዉርሳካ ኢሲ ማላ ኔ ያሊዛይሳ ኑ ኤርሰ። 17 ኔሰ ኣይ ሚሳቲዛኮኔ ኣኔ ኑሰ ዮታ? ቁሳሬሰ ጊራ ቃንፃናሰ ቤሲዜ? ቤሴኔ?” ጊዳ።

18 ዬሱሲካ ኢስታ ጌኔ ቆፋ ኤሪዲ “ኢንቴኖ ቆዴፔ ቆሞን ሃኒዛይቶ ታና ዮዖን ባሌሊ ኦይካናሰ ኣዛሰ ኮዬቲ? 19 ኢንቴ ጊራ ቃንፃዛ ሚሻ ኣኔ ታና ቤሲቲ” ጊን ኢሰቲካ ኢሲ ዲናሬ ጌቲቲዛ ሚሽ ኢዛሰ ኤሂዳ። 20 ኢዚካ “ሃይሳ ሚሻ ቦላ ዲዛ ሚሲሌይኔ ያሬቲዳ ሱንሳይ ኦናይሴ?” ጊዳሰ።

21 ኢሰቲካ ኢዛሰ “ቁሳሬይሳ” ጊዳ። ኢዚካ ኢስታሰ ዛሪዲ “ቁሳሬይሳ ቁሳሬሰ፤ ያሳይሳ ያሳሰ ኢሚቲ” ጊዳሰ። 22 ሄሳ ሲዩዳ ዋዴ ማላሌቲዲኔ ኢዛ ኣጊ ቢዳ።

ሃይቂዳይታ ዳንላ ጊሽ ሺቂዳ ኦይሾ
(ማር 12:18-27፤ ሉቃ 20:27-40)

* 22:13 ማቶ 8:12፤ 25:30፤ ሉቃ 13:28

23 “ሃይቁዳይታስ ዳንደይ ባዋ” ገዲ አማኒዛ ሳዲቃዌቲ ሄ ጋለስ ዩሱሳኮ ሸቂዳ። * 24 “አስታማሪ! ሙሴይ ‘አሳዳይ ማቾ ኤኪዲ ና ዩሎንታ ሃይቁኮ ኢዛ አሻይ ሃይቁዳይሳ ማቾ ኤኪዲ ባ አሻ ላቲዛ ና ኢዛስ ዩሎ’ ገደሰ። * 25 ኑ አቻን ላፑን አሻቲ ዳቴስ ሸን ኮይሮ አሻይ ማቾ ኤኪዲ ና ዩሎንታ ሃይቁዳ ገሸ ካሎ አሻይ ኢዛ ማቾኖ ኤኪደሰ። 26 ናምዓንሉ አሻይካ ሃይቁዳ አሻሶ ና ዩሎንታ ሃይቁዳሰ፤ ሄሳሶካ ሃኒሺን ማጫሳያ ላፑንሳ አሻ ገላዲሰ። 27 ወርሴሳን ማጫሳያ ሃይቃዲሰ። 28 ሄሳ ገሸ ላፑናቲ ወሪካ ኢዛ ኤኪዳ ሸን ሃይቆፔ ዳንሳ ጋለስ ማጫሳያ ላፑንታፔ አዋይሳ ማቾ ገዲኔ?” ገዲ።

29 ዩሱሲካ አስታስ ዛሪዲ “ጌሻ ማፃፋታኔ ያሳ ዋልቃ አንቲ ኤሮንታ ገሸ ባሌቲታ። 30 ሃይቆፔ ዳንዲዳፔ ጉዬ አሳይ ሳሎ ከታንቻታ ማላ ገደና አቲን ኤኬቴቴናኔ ጌሌቴና። 31-32 ሃይቁዳይታ ዳንሳ ገሸ ገዲኮ ያሲ ‘ታኒ አብራሃሜ ያሳ፣ ዩሳቃ ያሳ፣ ያቆሴ ያሳ’ ገዲ አንቲስ ዮቶይሳ ናባቢቤኬቲ? ያሲ ፓፃታ ያሳ አቲን ሃይቆሳታ ያሴ ገደና” ገደሰ። * 33 ዳሬይካ ሄሳ ሲይዲ ኢዛ ቲሚርቴዛን ማላሌቲዳሰ።

ወርሶፔ አጂዛ አዛዘ
(ማር 12:28-34፤ ሉቃ 10:25-28)

34 ዩሱሲ ሳዲቃዌታ ጮዑ ሂስቲዳይሳ ሲይዲ ፋርሳዌቲ አሲ ቦላ ሸቂቲዳ። 35-36 አስታ ገደፌ አሲ ሙሴ ዋጋ ሎዔሲ ኤሪዛዳይ ዩሱሳ ፓጫናስ ኮይዲ “አስታማሪ! ሙሴ ዋጋታ ገደን ኡባፌ አጂዛይ አዋይሴ?” ገዲ ኦይቺዳሰ። *

37 አዚካ ዛሪዲ “ኔ ሳዳ ያሳ ኔ ኩሜላ ዋዝናፔ፣ ኔ ኩሜላ ሸምፖፌ፣ ኔ ኩሜላ ቆፋፔ ደሳ።” * 38 ሃይሲ ኮይሮኔ ኡባፌ አጂዛ አዛዘ። 39 ናምዓንሉይካ ኢዛ ሚሳቴስ፣ ሄሲካ ኔ ሾሮ ኔ ሁዔ ማላ ደሳ ገዛይሳ። * 40 ሙሴ ዋጋይኔ ናቤታ ቲሚርቴይ ወሪካ ሃይታ ናምዑ አዛዘታን ቃሼቴስ” ገደሰ።

ከርሰቶሳ ገሸ ሸቂዳ ኦይሾ
(ማር 12:35-37፤ ሉቃ 20:41-44)

* 22:23 ሃዋ 23:8 * 22:24 ዛሬ 25:5 * 22:31-32 ኪሳ 3:6
* 22:35-36 ሉቃ 10:25-28 * 22:37 ዛሬ 6:5 * 22:39 ሉዌ 19:18

41 ፋርሳዌቲ ኢሲ ቦላ ሸቄቲ ዲሺን ዬሱሲ ኢሰታ።
42 “ኪርሰቶሳ ገሽ እንቴ ኣይ ጌቲ? ኢዚ ኦና ና?” ጌ ኦይቺዳሰ፤
ኢሰቲካ ኢዛሰ ዛሪዲ “ኢዚ ዳወቲ ና” ጌዳ።

43-44 ኢዚካ ኢሰታሰ
“ሂሰቲን ዳወቲይ ዓሎ ኣያና ዎልቃን
‘የሳይ ታ ጎዳ’ ጌዲ ዋኒ ያይጌዴ?
‘ታ ኔ ዎርኬታ ኔ ቶሆ ጌደን ጉልባቲሳና ጋካናሰ ኔ ታ ኡሻቻን
ኡታ!’ ጌዴሰ። * 45 ሄሳ ገሽ ዳወቲይ ኢዛ ‘ታ ጎዳ’ ጌዲ
ያይጌኮ ዋኒዲ ኢዛሰ ና ጌዳና ዳንዳዪዪ?”
ጌዴሰ። 46 ኢዛሰ ኢሲ ቃላ ዛሪና ዳንዳዪዲ ኣሲ ዎይኮ ሄ
ጋላሳፌ ሲሚን ኢዛ ኦይሾ ኦይቻና የሊዳ ኣሲ ኦኒካ ቤቲቤና።

23

ዬሱሲ ፋርሳዌታኔ ሙሴ ዎጋ ታማርሲዛይታ ካዲዳሰ
(ማር 12:38-39፤ ሉቃ 11:43-46፤ 20:45-46)

1 ቃሴካ ዬሱሲ ዳሬዛሰኔ ባና ካሊዛይታሰ። 2 “ሙሴ ዎጋ
ታማርሲዛይቲኔ ፋርሳዌቲ ሙሴ ዎምባራ ቦላ ኡቲዳ። 3 ሄሳ
ገሽ ኢሰቲ እንቴሰ የቲዛይሳ ወርሲ ኦፊቲኔ ናጌቲ፤ ጌደ ኣቲን
ኢሰቲ ዲናን ሃሳዪዛይሳ ማላ ኦሶን ቤሶንታ ገሽ እንቴ ኢሰታ
ኦሶ ካሎፍቲ።

4 “ሂሳሶካ ኣሲ ቶካናሰ ዳንዳዮንታ ዴዎ ቶሆ ቃቺዲ ኣሳ ሃሽ
ቦላ ዎፊቲሰ ሽን ባሲ ጌዲኮ ቢራዴ ያራንካ ቦቺቲና። 5 ኢሰታ
ኦሶ ወርሲ ኣሲ ቤያና ማላ ኦፊቲሰ፤ ባ ኣሽንኪታቤ ጌሻ ማፃፋ
ጌደፋ ፃፊ ኡኪዳ ኢሲ ኢሲ ያቂሴታ ኪታቤ ሲኪዲ ሊጴ ቦላ
ዎይኮ ኩሽን ቃቺዛዝ ኦፊቲሰ። ባ ማይዎ ማጫራ ኣዲሴቲሰ።
6 ዲጊሳይ ዲዛሰን ቦንቾ ሶ ኣይሁዳ ዎሳ ኬላንካ ሲንላራ ኡታና
ደሴቲሰ። 7 ሄሳሶካ ጌያ ጌደን ሳር ጌቲታናሰኔ ኣሳይ ኢሰታ
‘ኣሰታማሬ!’ ጋና ማላ ኮዬቲሰ።

8 “እንቴ ጌዲኮ ‘ኣሰታማሬ’ ጌቲቲ ያይጌቶፍቲ። እንቴ
ኣሰታማሬይ ኢሳ ፃላላ ጌዲሺን እንቴ ወሪካ ኢሶይ ኢሳሰ
ኢሻንታ። 9 ሳሎን እንቴሰ ኢሲ ኣዎይ ፃላላ ዲዛ ገሽ ቢታ
ቦላ ኦናካ ‘ኣዎዎ!’ ጌዲ ያይጎፕቲ። 10 እንቴ ኣሰታማሬይ ኢሲ
ኪርሰቶሳ ፃላ ጌዲዳ ገሽ እንቴ ‘ኣሰታማሬቶ!’ ጌቲቶፍቲ።

* 22:43-44 ማዛ 110:1

11 እንገሮ ገደን ኡባፌ ኣጲዛዳይ እንቴስ ኦሌዛዳ ገደና። *

12 ባና ጾቁሲዛዳይ ካወያና፤ ባና ካወሺዛዳይ ቦንቹታና። *

13 “እንገሮኛ ቆጴጌ ቆሞን ሃኒዛይቶ፣ ሙሴ ዋጋ ታማርሲዛይቶ፣ እንገሮኛ ፋርሳዌቶ! ኣሳይ ያሳ ካዎቴሉ ጌሎንታ ማላ ኣሳ ቦላ እንገሮ ፔንጌ ጎርዲዛ ጊሽ እንገሮና ኣዬ-ኣና! እንገሮ እንገሮ ጌሌኬታኔ ጌላናስ ኮዪዛይታካ ጌልሌኬታ። 14 እንገሮኛ ቆጴጌ ቆሞን ሃኒዛይቶ፣ ሙሴ ዋጋ ታማርሲዛይቶ፣ ቃሴካ ፋርሳዌቶ! እንገሮኛ ኣዬ-ኣና! ኣዚናይ ባይንዳ ማጫሳታ ኬላ ካሎሲሼ ኣሳ ኣይፊ ሲንላን ኣዱሳ ዋሳ እንገሮ ዋሲዛ ጊሽ እንገሮ ኢታ ፐርዳ ፐርዳታና። *

15 “እንገሮኛ ቆጴጌ ቆሞን ሃኒዛይቶ፣ ሙሴ ዋጋ ታማርሲዛይቶ፣ ቃሴካ ፋርሳዌቶ! ኢሲ ኣስ ኣይሁዳ ኣማኖን ጌልላናስ ኣባ ቦላራኔ ቢታ ቦላራ ዩዩ ዳቡርዲኔ ኣማንሊዳ ኣሳ እንገሮፊ ናምዑ ኩሹ ኣሌዲ ጋናሜ ና እንገሮ ኬሲዛ ጊሽ እንገሮና ኣዬ-ኣና!

16 “እንገሮኛ! እንገሮኛ ቆቂ ኡቲዲ ሃራታ ካሌሊዛይቶ! እንገሮኛ ኣዬ-ኣና! ‘ኦኒካ ያሳ ኬላን ጫቂኮ ኣይኮይ ባ’ ገደ ኣቲን ‘ያሳ ኬላ ገደን ዲዛ ዋርቃን ጫቂኮ ጫቆ ጎሜይ ጋካና’ ጌታ።

17 እንገሮኛ ቆቂዳይቶ! ባሌቲዳይቶ፣ ዋርቃፊኔ ዋርቃ ዲማሲዳ ያሳ ኬላፊ ኣዋይሲ ኣጲዜ? 18 ሃሳላካ ‘ኦኒካ ያርሾ ያርሺዛሶ ቦላ ጫቂኮ ኣይኮይ ባዎ፤ ሺን ያርሺዛሶን ዲዛ ያርሾ ቦላ ጫቂኮ ጫቆይ ጎሜሲ’ ጌታ። † 19 እንገሮኛ ቆቂቶ! ያርሾፔኔ ያርሾ ሺሺዛሶፔ ኣዋይሴ ኣጲዛይ? 20 ሃሳ ጊሽ ያርሾ ሺሺዛሶ ቦላ ጫቂዛዳይ ያርሾሶዛ ቦላኔ ያርሺዛሶ ቦላ ዲዛ ኡባ ሚሻን ጫቆስ። 21 ሃሳላካ ያሳ ኬላዛ ቦላ ጫቂዳይ ያሳ ኬላኒኔ ኢዛ ገደን ኣቂዛይሳን ጫቆስ። 22 ሳሎን ጫቂዛዳይካ ያሳ ኣልጋኒኔ ኣልጋ ቦላ ኡቲዳይሳን ጫቆስ። *

23 “እንገሮኛ ቆጴጌ ቆሞን ሃኒዛይቶ፣ ሙሴ ዋጋ ታማርሲዛይቶ፣ ፋርሳዌቶ! እንገሮና ኣዬ ኣና! ኣሱታፔ፣ ኣኮጋፔኔ ካትካልዓፊ ታማፊ ኢሲኖ ኢሜታ ሺን ዋጋታፔ ዋናቲዛይታ ሄይቲካ ቱማ ፐርዳ፣ ማርቴሊኔ ኣማኔቴሉ ገዲኮ ካጲዳታ። ሄይታ

* 23:11 ማቶ 20:26-27፤ ማር 9:35፤ 10:43-44፤ ሉቃ 22:26 * 23:12 ሉቃ 14:11፤ 18:14 * 23:14 ኢሲ ኢሲ ገሻ ማፃፋቲ ፓይዶ ታማኔ ኦይዲ ቦላ [14] ዲዛ ቆፋ ጉጃቴስ፤ ቆፋይካ ማርቆሳን ሸምፖ 12:40 ዲዛይሳ ሚሳቴስ። † 23:18 ያርሾ። ኣሲ ባ ጎዳስ ገዲ ኦሌዛ ኦሶይ ወራ ያርሾ ጌቴቴስ። * 23:22 ኣሳ 66:1፤ ማቶ 5:34

አጎንታ ዲሼ ሃይታጎንታ አንቴ ኦፋናሰ አንቴሰ ቤሴሰ ሺን አገዳታ።
* 24 አንቴኖ ቆቂ ኡቲዲ ካሌሊዛይቶ! ኡዔ ጋጨዲ ኡዬታ ሺን ጋሚላ ሙሜ ሚቲታ!

25 “አንቴኖ ቆጴፔ ቆሞን ሃኒዛይቶ፣ ሙሴ ዋጋ ታማርሲዛይቶኔ ፋርሳዌቶ! አንቴሰ አዬ-አና! ፀዓሲኔ ኬሬሰ ቦላ ባጋ ቁጩታ ሺን ኢዛ ገደን ዲዛይሳ አንቴ ቦንቃኒኔ ኡዜቴላን ሺሺዳታ። 26 ኔኖ ቆቂ ፋርሳዌዙ! ኮይርታዳ ፀዓሲኔ ኬሬሰ ገደ ባጋ ገሻ! ሄሳፌ ጉዬ ካሬ ባጋይ ገሽ ገዳና።

27 “አንቴኖ ቆጴፔ ቆሞን ሃኒዛይቶ፣ ሙሴ ዋጋ ታማርሲዛይቶ፣ ቃሴ ፋርሳዌቶ! ቦላ ባጋይ ኖራራ ሜሽቲዲ ሎዲዛይቲ ገደይ ገዲኮ ሃይቂዳይታ ሜቆሴኔ ዳር ቱናኔቴላን ኩሚዳ ዱፎታ ሚሳቲዛ ገሽ አንቴና አዬ-አና! * 28 አንቴካ ቦላ ባጋራ አሳሰ ሂሎ አሳታ ሚሳቲታ፤ አንቴ ገደይ ገዲኮ ጨሞኒኔ ኢታቴላን ኩሚዳሰ።

29 “አንቴኖ ዱናን ጨሚዛይቶ! ሙሴ ዋጋ አሰታማሬቶ፣ ቃሴካ ፋርሳዌቶ! አንቴሰ አዬ-አና! ናቤታ ዱፎ ሎዔሊዛይቶ፣ ሂሎ አሳታ ዱፎ ሃዉልቴራ ገገሲዛይቶ! 30 ኑ አዋቲ ናቤታ ዋጲዛ ዋዳ ኑ ዲዛኮ አሰታራ ዙፔቶኮኮ ሺን፣ 31 አንቴ ናቤታ ዋጲዳ አሳታ ናይታ ገዲዳይሳ አንቴ ዱናራ አንቴርካ አንቴ አንቴ ቦላ ማርካቲታ። 32 ሂሰቲኮ ኦሴቲዲ ፖሌቶንታ ኦኔ ቦላ ዲዛ አንቴ አዋታ ኦሶ ፖሊቴ። †

33 “አንቴኖ ዱኪዛ ኢታ ሾሻ ናይቶ! ጋናሜ ታማ ፐርዳፌ አንቴ ዋኒ ኣታኔ? * 34 ሄሳ ገሽ ናቤታኔ ኤራንቻታ አሰታማሬታካ ታ አንቴሰ ዬዳና። አንቴ ኢሰታ ገደፌ ኢሲ ኢሲ አሳታ ዋጲና። ባጋይታ አንቴ ካቃና፤ ባጋይታ አንቴ አይሁዳ ዋሳ ኬላን ጋራፋናኔ ሃ ካታማፔ ሃራ አንቴ ጎዳና። 35 ሄሳ ገሽ ሂሎ አቤሌ ሱላፌ ሃ ሰሚን ያሳ ኬላኒኔ ያርሾ ያርሺዛሶ ገደን አንቴ ዋጲዳ ባራኪዮ ና ዛካራሳ ሱላ ጋካናሰ ቢታ ቦላ ጉኪዳ ሂሎታ ሱላ ኡባሰ አንቴ ኦይሼታና። * 36 ታ አንቴሰ ቱሙ ጋይሰ፤ ካሴ አጲዳ ዮዖ ኡባሰ ሃይሲ ሃ ዬሌታይ ኦይሼታና።

37 “ሃኔ ዬሩሳሌሜ! ናቤታ ዋጲዛሬ! ኔኮ ኪቴቲዳይታ ሹቻራ ጫዲዛሬ! ሃኔ ዬሩሳሌሜ ኩቶ ኣያ ባ ጨዬታ ባ ቄፌ ገደ

* 23:23 ለዌ 27:30 * 23:27 ሃዋ 23:3 † 23:32 ቦኔ፣ ኢሰታ ዳሬን ሚላቲ ሃይላ ኪሲዛይኔ ጨሊሊዛይ ቦኔይ ማቲሺን ገደይሳ ቤሴሰ። * 23:33 ማቶ 3:7፤ 12:34፤ ሉቃ 3:7 * 23:35 ሜዴ 4:8፤ 2ታር 24:20-21

ሺሺዛ ማላ ታ ኔ ናይታ ሺሻናስ ኣፑን ዎዴ ኮያዲናሺን ኔ ጊዲኮ ኮያባካ። 38 ሄኮ ኢንቴ ኬሌ ካይስ ጊዲ ኣታና። * 39 ታ ኢንቴስ ቱሙ ጋይስ፤ ኢንቴ ጎዳ ሱንጎን ዪዛዴይ ኢንጃቲዳዴ ጋና ዎዴይ ጋካናስ ናምዓንጾ ታና ቤዬኬታ” ጊዴስ። *

24

ዎዴ ወርሴላ ማላታታ
(ማር 13:1-2፤ ሉቃ 21:5-6)

1 ዬሱሲ ያሳ ኬላፌ ኬዚ ቢሺን ኢዛ ካሊዛይቲ ያሳ ኬላዚ ሹቻን ኬፃቲዳይሳ ቤሳና ኮይዲ ዬሱሳኮ ሸቂዳ። 2 ኢዚካ ኢሰታስ “ሃይሳ ወርሲ ፃሌቲ? ታ ኢንቴስ ቱሙ ጋይስ፤ ሃይሲ ኢንቴ ቤዪዛ ኢሶይ ኢሳ ቦላ ዲዛ ሹቻይ ላሌቶንታ ኢሲ ሹቸካ ሃይሳጾ ዳና” ጊዴስ።

3 ኢዚ ዳብራዛይቲ ጌቴቲዛ ዙማ ቦላ ኡቲ ዲሺን ኢዛ ካሊዛይቲ ፃላላ ኢዛኮ ሸቂዲ “ኣኔ ኑስ የታ፤ ሃይሲ ኔ ጊዛይሲ ኣይዴ ሃናኔ? ኔ የሳሲኔ ዎዴ ወርሴላስ ማላታይ ኣዜ?” ጊ ኦይቸዳ።

4 ዬሱሲካ ዛሪዲ “ኣኒካ ኢንቴና ባሌጶንታ ማላ ናጌቴቲ። 5 ቡሮ ዳርቲ ‘ታ ኪርሰቶሳ’ ጊሼ ታ ሱንጎን ያና፤ ዳርታካ ባሌላና። 6 ኦላኔ ኦላ ጊሽ ሃሳዬቲዛ ዎሬ ኢንቴ ሲያና። ሃ የዎቲ ወሪካ ዎልቃራ ፖሌታና ሺን ወርሴላ ቡሮ ጊዲዳ ጊሽ ኢንቴ ሃይሳን ዳጋሞንታ ማላ ናጌቴቲ። 7 ዴሬይ ዴሬ ቦላ፣ ካዎይ ካዎ ቦላ ዴንዳና፤ ዲማ ዲማ ዴሬን ኮሻይኔ ቢታ ቃሊ ሃናና። 8 ሄሲ ወሪካ ሚፃስ ሌሶ ማላ። 9 ሄ ዎዴ ኢንቴና ዎዬስ ኣሊ ኢማና፤ ኢንቴና ዎፋና፤ ታ ሱንጎ ጌዶን ዴሬ ኡባን ኢንቴ ኢፃቲዳይታ ጊዳና። *

10 “ሄ ዎዴ ዳር ኣሳይ ቆጶታና፤ ኢሶይ ኢሳ ኣሊ ኣሊ ኢማናኔ ባ ጊዶን ኢፃታና። 11 ዳር ዎርዶ ናቤቲ ዴንዳናኔ ዳርታ ባሌላና። 12 ኢታቴሊ ዳሪዛ ጊሽ ዳርታፔ ሲቆይ ኢርፃና። 13 ወርሴላ ጋካናስ ሚኒዳዴይ ኣታና። * 14 ዴሬ ኡባስ ማርካ ጊዳና ማላ ሃይሲ ካዎቲላ ሚሺራቾ ቃላይ ኩሜላ ኣላሜን የቲታና፤ ሄሳፌ ጉዬ ወርሴላ ያና።

15 “ሃሳ ጊሽ ናቤ ዳኔላን የቲቲዳይሳ ማላ ‘ሃራሲዛ ቱናቴሊ’ ኢንጃቲዳሶን ኤቂዳይሳ ኢንቴ ቤዪዛ ዎዴ ናባቢዛዴይ ዎዝናን

* 23:38 ኤር 22:5 * 23:39 ማዛ 118:26 * 24:9 ማቶ 10:22
* 24:13 ማቶ 10:22

ዎል። * 16 ሄ ዎዴ ዩሁዳን ዲዛይቲ ፑዴ ዙማ ቦላ ጋንጌቶ።
 17 ኩላ ካራ ቦላ ዲዛዴይ ኦኒካ ባ ሚሽ ኩላፌ ኩላና ጊዲ ዲጌ
 ዎዲ። * 18 ጋዴ ጊደን ዲዛዴይ ኦኒካ ባ ማይያ ኤካና ጊዲ
 ሶ ሰሞ። 19 ሄ ጋላሳታን ቃንላራ ዲዛ ማጫሳታሲኔ ና ቋንሲዛ
 ኣዬታሰ ኣዬ-ኣና! 20 ሄሳ ጊሽ ኢንቴ ጋንጎይ ባልጎ ዎይኮ ሳምባታ
 ጋላሰ ጊደንታ ማላ ዎሲቴ። 21 ሄ ዎዴ ኣላሚይ ሜዴቶሳፕ ሃቲ
 ጋካናሰ ሃኒ ኤርንታ ሚሽ ሲንላፊካ ኢዛ ሚሳቲዛይ ባይንዳ
 ዎልቃማ ሜቶይ ሃናና። 22 ሄ ጋላሳቲ ቃሞንታኮ ኣሾ ማይዒዳ
 ኣሲ ወሪ ኣቴና ሺን ዶሬቲዳይታ ጊሽ ሄ ጋላሳቲ ቃማና።

23 “ሄ ዎዴ ኦኒካ ‘ሄኮ ኪርሰቶሲ ሃይሳን ዴሰ!’ ዎይኮ
 ሄሳን ዴሰ፣ ጊዛዴ ኣማኖ። 24 ዎርዶ ኪርሰቶሳኔ ዎርዶ ናቤቲ
 ቡር ዴንዲዲ ኢሰታሰ ዳንዳይቲኮ ዶሬቲዳይታ ባሌላናሰ ጊዲ
 ዎልቃማ ማላታታኔ ካሴ ኦሴቲ ኤርንታ ሚሽ ኦላና።

25 “ሄኮ ሃይሳ ታ ኢንቴሰ ካሴታ ዮታይሰ። 26 ሄሳ ጊሽ ‘ሄኮ
 ሃርኪ ባዘን ዴሰ፣ ጊዲ ኢንቴሰ ዮቲኮ ሄ ኩዘፕቴ፤ ‘ሄኮ ኢልፕኔን
 ዴሰ፣ ጊኮ ኣማኖ። * 27 ዎልቃንሲ ኣዎ ኣርሼይ ሞኪዛሶራ
 ዎልቃሚዲ ኣዎ ኣርሼይ ወሊዛሶ ጋካናሰ ፖሊዛይሳ ማላ ኣሳ
 ና ዩሳይካ ሃሳላ ሃናና። 28 ኣሃይ ዲዛሶ ኣንኮ ካፎይ ሺቄሰ። *

29 “ሄራካ ሄ ኢታ ሜቶ ጋላሳታፕ ጉዬ
 ኣዎ ኣርሼይ ቆማና፤
 ኣጊናይ ባ ፖዎ ዲጋና፤
 ያሊንቴቲ ሳሎፕ ቆቆፊታና፤

ሳሎ ዎልቃማቲካ ቃፃና። *

30 ሄ ዎዴ ኣሳ ና ማላታይ ሳሎ ቦላ ቤታና። ቢታ ቦላ ዲዛ
 ዴሬይ ወሪ ዩካና፤ ኣሳ ናይካ ሳሎ ሻራ ቦላ ዳር ዎልቃራኔ
 ጊታ ቦንቸራ ዩሺን ኣሳይ ቤያና። 31 ኪታንቻታካ ዳር ዎልቃማ
 ፀራምባ ጊሪሳራ ዩዳና። ኢሰቲካ ዶሬቲዳይታ ኦይዲ ማዒዜኔፕ
 ሳሎሰ ሃ ባጋ ጋፃፕ ሄ ጋፃ ባጋ ጋፃ ጋካናሰ ወርሲ ኢሲ ሶ ሺሻና።

32 “ባላሴ ጌቲቲዛ ሚላፌ ሃይሳ ታማሪቴ፤ ባላሴ ሚላይሰ
 ኡንቁሎይ ጨሊሊዛ ዎዴ ኢዛ ሃይላ ኩሲሺን ቦኔይ ማቲዳይሳ
 ኢንቴ ኤሬታ። 33 ሄሳላ ሃይታ ኢንቴ ቤዩዛ ዎዴ ኢዚ ፔንጌ
 ማቲዳይሳ ኢንቴ ኤራና። 34 ታ ቱሙ ጋይሰ፤ ሃይሲ ወሪ ፖሌታና

* 24:15 ዳኔ 9:27፤ 11:31፤ 12:11 * 24:17 ሉቃ 17:31 * 24:26
 ሉቃ 17:23-24 * 24:28 ሉቃ 17:37 * 24:29 ኢሳ 13:10፤ 34:4፤ እዩ
 2:10፤31፤ 3:15፤ ኣጁ 6:12-13፤ ሃዚ 32:7፤ እዩ 2:10፤ 3:15

ጋካናስ ሃ ዩሌታይ አዴና። 35 ሳሎይኔ ሳዓይ አዳና ሺን ታ ቃላይ ጊዲኮ ሙሌካ አዴና።

ጎዳይ ያና ጋላስ ኦኒካ ኤሬና
(ማር 13:32-37፤ ሉቃ 17:26-30፤34-36)

36 “ሄ ጋላሳዮኔ ሄ ሳቴዮ አዋፔ ኣቲን ሳሎ ኪታንቻታ ጊዲንካ ናዛ ጊዲንካ ኦኒካ ኤሬና። 37 ኖሄ ዋዴ ሃኒዳይሳ ማላ አሳ ና ዩሲ ሄሳ ማላ ጊዳና። * 38 ጳይሲዛ ሃላፌ ካሴ ኖሄይ ማርካቤን ጌሊዛ ጋላስ ጋካናስ አሳይ ሚሼኔ ኡዩሼ፣ ኤኪሼኔ ጌሊሼ ጋምዒዴስ። 39 ሄ ዋዴይ ጋካናስ አዚ ሃናናኮኔ አሳይ ኤርንታኔ ቆፖንታ ባሻ ሃላይ ዩዲ ሚቲዳይሳ ማላ ታ አሳ ናይ ዪዛ ዋዴይካ ሄሳሶ ሃናና። *

40 “ሄ ዋዴ ናምዑ አሳቲ ኢሲፌ ጎሻን ፔዓና ሺን ኢስታፌ አሳዴይ ኤኬታና፤ አሳዴይ አታና። 41 ናምዑ ማጫሳቲ ዋፃን ኢሲፌ ጋጫና ሺን ኢስታፌ ኢሲኔያ ኤኬታና ኢሲኔያ አታና።

42 “ሂስቲኮ አንቴ ጎዳይ ያና ጋላሳ አንቴ ኤርንታ ጊሽ ቤጊዲ ናጊቴ። 43 ሃይሳ ዋዘናን ዋሊቴ፤ ካይሶይ ቃማፌ አፋንላ ሳቴ ቦላ ያናኮኔ ኤሪዛኮ ኢዛ ሚሽ ካይሶይ ኤኮንታ ማላ ኬላ አዋይ ቤጊዲ ናጋና። 44 አሳ ናይካ አንቴ ቆፖንታ ሳቴ ቦላ ያና፤ አንቴካ ሄሳሶ ጊጌቲዳይታ ጊዲቴ።

45 “ዋዴራ ሶ አሳ ቁማ ሚዛና ማላ ጎዳይ ባ ኬላ አሳ ቦላ ሹሚዳ አማኔቲዛ ጨንጫ ኦሳንቻይ ኦኔ? 46 ኬላ አዋይ ሲሚዲ ዪዛ ዋዴ ኢዛስ ኢሚዳ ሃዳራ ኦሊ ፖሊሼ ቤቲዳ ኦሳንቻይ ኦንጃቲዳይሳ። 47 ታ አንቴስ ቱሙ ጋይስ፤ ጎዳይ ኢዛ ባ ሃሪዳ ኡባ ቦላ ሹሚስ። 48 ጊዶ ኣቲን ሄ ኦሳንቻይ ኢታ ጊዲዲ ‘ታ ጎዳይ ጋምዒዲ ያና ጊ ቆፒዲ፣ 49 ዴንዲ ሃንኮ ኦሳንቻታ ዋጳ ኦይኪኮ ማሶቲዛይታሪ ሚኮኔ ኡዩኮ፣ 50 ኢዚ ቆፖንታ ጋላሳኒኔ ሳቴን ኢዛ ጎዳይ ዩዲ፣ 51 ኢዛ ቃንፃሊ ካዓና፤ ኢዛ ኤፃ ቆጴፔ ቆዋን ሃኒዛይታሪ ኦላና። ሄንካ ዩሆይኔ አቻ ጋርጩቺ ሃናና።

25

ታሙ ጌላዖታ ሌሚሶ

1 “ሄ ዋዴ ሳሎ ካዋቴሊ ሚሺራ ሞካናስ ዖምፔ ኦይኪዲ ኬዚዳ ታሙ ጌላዖታ ሚሳታዉስ። * 2 ሄ ታማታፔ ኢቻሹ

* 24:37 ሜዴ 6:5-8 * 24:39 ሜዴ 7:6-24 * 25:1 ሉቃ 12:35

ጌላዎቲ ኤያታ፣ ሃንኮ ኢቻሻቲ ቃሴ ጨንጫታ። 3 ኤያቲ ኩራዜ ምጥፎ ኦይኪዳ ሺን ወሪኮ ጉጃና ሃራ ናጌ ላምባ ኦይኪቤቴና። 4 ጨንጫቲ ጌዲኮ ባ ኩራዜዛራ ወሪኮ ጉጃና ላምባ ሃራ ፃርሙሴን ኦይኪዳ። 5 ማቸዮ ኤካና ሚሺራይ ዮንታ ጋምዒን ጲሰኮይ ዳዒን ኦሳይ ወሪካ ጲሰኪዳሰ።

6 “ሌላ ጌዶል ጌዲሺን ‘ሚሺራዚ ዬሰ! ኬዚዲ ሞኪ ኤኪቲ!’ ገዛ ዪይሳ ቃላይ ሲዬቲዳሰ። 7 ሄሳ ዎዴ ጌላዎቲ ወሪካ ዳንዲዲ ባ ምጥፎ ምጥፎ ኦይሴላኔ ጊጌቱል ኦይኪዳ። 8 ኤያቲ ጨንጫታ ኑ ምጥፎይ ቶዓና ገዛ ጊሽ ኢንቲ ላምባፎ ኑሰ ኢሚቲ’ ጌዳ።

9 “ጨንጫ ጌላዎቲ ኢሰታሰ ዛሪዲ ኑሰ ዲዛ ላምባይ ኑሳራኔ ኢንቲሳራ ጌዶንታ ጊሽ ቢዲ ላምባ ባይዚዛይታፎ ኢንቲሰ ሻሚቲ’ ጌዳ። 10 ኢሰቲ ላምባ ሻማና ቢ ኪቸን ሚሺራዚ ጋኪ ዎጲዳሰ። ካሴ ጊጌቲ ኡቲዳ ጌላዎቲ ቡላቻሶ ኢዛራ ጌሊዳ፤ ካሬይካ ጎርዴቲዳሰ።

11 “ጉል ጋምዒሼ ሃንኮ ጌላዎቲ ዬዲ ‘ጎዶ! ጎዶ! ካሬ ኑሰ ዶያ!’ ጌዳ። 12 ኢዚካ ዛሪዲ ‘ታ ኢንቲሰ ቱሙ ጋይሰ፤ ታ ኢንቲና ኤሪኬ!’ ጌዳሰ። 13 ሄሳ ጊሽ ያና ጋላሳ ዎይኮ ሳቲዛ ኢንቲ ኤርንታ ጊሽ ጊጌቲዲ ናጌቴ።

ሄቩ ኦሳንቻታ ሌሚሶ (ሉቃ 19:11-27)

14 “ዎሳ ካዎቱል ባሲ ዲዛዚ ወርሲ ባ ኢሻካራታሰ ሃዳራ ኢሚዲ ሃራ ዳሬ ባና ዳንዲዳ ኢሲ ኦሰ ሚሳቲሰ። *

15 ኢሻካራታሰ ኢሳሰ ኢሳሰ ኢሰታ ዎልቃ ማላ ጊጊሲዲ ኢሳሰ ኢቻሹ ሺ ቢራ፣ ኢሳሰ ናምዑ ሺ ቢራ፣ ሃንኮይሳሰ ቃሴ ኢሲ ሺ ቢራ ኢሚዲ ቢዳሰ። 16 ኢቻሹ ሺ ቢራ ኤኪዳ ኦይዚ ሄራካ ሚሻን ዛልዔ ኦይኪዲ ሃራ ኢቻሹ ሺ ቢራ ዎጲሲዳሰ። 17 ቃሴካ ናምዑ ሺ ቢራ ኤኪዳይሲ ሃራ ናምዑ ሺ ቢራ ዎጲሲዳሰ። 18 ኢሲ ሺ ቢራ ኤኪዳይሲ ባ ጎዳ ቢራ ቢታን ሞጊዲ ቆቲዳሰ።

19 “ኢሻካራታ ጎዳይ ባ ቢዳሶን ዳር ዎዴ ጋምዒ ሲሚዲ ሚሻ ኢሰታራ ሳላዔቲዳሰ። 20 ኢቻሹ ሺ ቢራ ኤኪዳ ኢሻካራይ ሃራ ኢቻሹ ሺ ቢራ ዎጲሲዳይሳ ኤኪ ዬዲ ‘ጎዶ! ኔ ታሰ ኢቻሹ ሺ ቢራ ኢሚዳሳ ሺን ሄኮ ሃይሳ ታ ሃራ ኢቻሹ ሺ ቢራ ዎጲሳዲሰ’ ጌዳሰ። 21 ኢዛ ጎዳይካ ‘ሎዎ ኦላዳሳ፤ ኔዮ ሎዎ

* 25:14 ሉቃ 19:11-27

አማኔቲዳ አሸካራዘ! ኔ ጉላ ሚሻን አማኔቲዳ አስ ጊዲዳ ጊሽ ታ ኔና ዳሮ ሚሻ ሶላ ሹማና፤ ጌዳ ኔ ጎዳ ኡፋይሳሶ ጌላ፣ ጊዳስ።

22 “ሃሳሶካ ናምዑ ሺ ቢራ ኤኪዳይሲ ጎዳዘኮ ሸቂዲ “ጎዳ! ኔ ታሰ ናምዑ ሺ ቢራ አማዳሳ ሺን ሄኮ ሃራ ናምዑ ሺ ቢራ ዎጂሳዲሰ፣ ጊዳስ። 23 ጎዳዚካ ‘ሎዔላዳሳ፤ ሃይሶ ሎጾኔ ታሰ አማኔቲዳ አሸካራዘ! ኔኒ ጉላን አማኔቲዳዳ ጊዲዳ ጊሽ ታ ኔና ዳሮ ሚሻ ሶላ ሹማይስ፤ ጌዳ ኔ ጎዳ ኡፋይሳሶ ጌላ፣ ጊዳስ።

24 “ኢሲ ሺ ቢራ ኤኪዳ አሸካራይ ሸቂዲ “ጎዳ! ኔኒ ዜሮንታሶፔ ማጻዛዴኔ ላሎንታሶፔ ሺሺዘ ማንጻ ኢታ አስ ጊዲዳይሳ ታ ኤራይስ። 25 ሃሳ ጊሽ ታ ባባዳ ቢታ ቦካዳ ኔ ቢራ ቦኪዳ ኦላን ሞጋዳ ቆታዲስ፤ ኔ ሚሽ ሃሳ ቤያ!’ ጊዳስ።

26 “ኢዛ ጎዳይ ዛሪዲ ‘ሃይሶ ኢታ ኣዛላ አሸካራዘ! ታኒ ዜሮንታሶፔ ማጻዛዳ ላሎንታሶፔ ሺሺዛዳ ጊዲዳይሳ ኔ ኤራይ? 27 ሂሰቲን ታ ሲማ ዪዛ ዎዴ ታ ሚሻ ዩሎራ ታ ኤካና ማላ ቲርፒሲ ዛልዲዛ አሳሰ ኔ አማናሰ ቤሴሴሺን’ ጊዳስ።

28 “ኣኔ ሃዲ ኢዛፔ ሺ ቢራ ኤኪዲ ታሙ ሺ ቢራይ ዲዛዴሰ አሚቲ። 29 ዲዛዴሰ ጉጃታናኔ ዳሪ ዳሪ ባና፤ ባይንዳዴፌ ሄ ዲዛ ጉላያካ ኢዛፔ ኤኬታይቻና። * 30 ሃይሳ ጎባይ ባይንዳ አሸካራ ጌዳ ዩኪዛሶኔ ኣቼይ ጋርጨቲዛሶ ሄን ካሬን ዲዛ ቋማን ኬሲ ዩጊቲ’ ጊዳስ። *

ወርሴላ ፒርዳ

31 “ኣሳ ናይ ባ ኪታንቻታ ኡባራ ቦንቾን ዪዛ ዎዴ ባ ቦንቾ ኣልጋ ሶላ ኡታና። * 32 ዳሬይ ወሪ ኢዛ ሲንሱ ሺቃና፤ ኢዚካ ማሄ ሃሚዛዳይ ዳይሺ ዶርሳፌ ቆሪ ሻኪዛ ማላ ኣሳ ኢሳ ኢሳፌ ቆሪ ሻካና። 33 ዶርሳታ ኢዛሰ ኡሻቻ ባጋራ፣ ዳይሻታ ሃዲርሳ ባጋራ ኤሳና። 34 ሄ ዎዴ ካዎይ ኡሻቻ ባጋራ ዲዛይታ ኢንቴኖ! ታ ኣዎይ ኢንቴና ኣንጂዳይቲ ሃ ዩቲ! ኣላሚይ ሚጄቶሳፔ ኢንቴሰ ጊጌቲዳ ካዎቲላ ላቲቲ! ጋና። 35 ጋሶይካ ታኒ ጋፊን ታና ሚዚዴታ፤ ታ ሳሚቲን ታና ኡሺዴታ፤ ታ አማላ ጊዲዳ ዩን ታና ሞቢ ኤኪዴታ። 36 ታ ካሎቲን ታና ማይዚዴታ፤ ታ ሳኬቲን ታና ሃርጊሲዴታ፤ ታ ቃሺቲን ታና ኦይቺዴታ፣ ጋና።

* 25:29 ማቶ 13:12፤ ማር 4:25፤ ሉቃ 8:18 * 25:30 ማቶ 8:12፤ 22:13፤ ሉቃ 13:28 * 25:31 ማቶ 16:27፤ ማቶ 19:28

37 “ዲሎተካ ዛሪዲ ‘ጎዶ! ኔ ጋፊን ኑ ኔና አይዳ ሚዚዶን? ወይኮ ኔ ሳሞተን አይዳ በዩዲ ኑ ኔና ኡሺዶን? 38 ኑ አይዳ ኔና በዩዲ ኡማላቴላ ሞኪዶን? ወይኮ አይዳ ኔ ካሎተን በዩዲ ኔና ማይዚዶን? 39 ሄሳሶካ ኔ ሳኬተን ወይኮ ቃሹተን አይዳ በዩዲ ኔና ኦይቸዶን?’ ገና። 40 ካወይካ ዛሪዲ ‘ታ ኢንቴሰ ቱሙ ጋይሰ፤ ሃይታ ላፋ ጊዲዳ ታ ኢሻታፔ ኢሳዳሰ ኦሊዳይሲ ኢንቴ ታሰ ኦሊዳ ማላ’ ገና።

41 “ቃሴካ ሃዲርሳ ሳጋራ ዲዛይታሰ፤ ‘ኢንቴኖ ቃንጌቲዳይቶ! ታፔ ሻኬቲዲ ዳቡሎሳሲኔ ኢዛ ኪታንቻታሰ ጌጌቲዳ ሜርና ታማን ቢቱ ገና። 42 ጋሶይካ ታ ጋፊን ታና ሚዚቤኬታ፤ ታ ሳሞተን ታና ኡሺቤኬታ፤ 43 ታና ኡማላቴላ ሞኪቤኬታ፤ ታ ካሎተን ታና ማይዚቤኬታ፤ ታ ሳኬቲኒኔ ቃሹተን ታና ኦይቸቤኬታ’ ገና።

44 “ኢሰተካ ዛሪዲ ‘ጎዶ፥ ኔ ጋፊን ወይኮ ኔ ሳሞተን ወይኮ ኔ ኢማላ ጊዲን ወይኮ ኔ ካሎቲኒኔ ኔ ሳኬቲን ወይኮ ኔ ቃሹተን ኑ ኔና በዩዲ አይዳ ኔሰ ጋኪቤኮን?’ ገና።

45 “ሄ ወዳ ኢዚካ ኢሰታሰ ዛሪዲ ‘ታ ኢንቴሰ ቱሙ ጋይሰ፤ ሃንታ ላፋ ታ ኢሻታፔ ኢሳዳሰ ኢንቴ ኦሶንታ ኢጊዳይሲ ታሰ ኢንቴ ኦሶንታ ኢጊዳ ማላ’ ገና። 46 ሄይቲ ጌዴ ሜርና ፒርዳን ባና፤ ዲሎቲ ጊዲኮ ሜርና ዴዎኮ ባና” ጊዳሰ። *

26

አይሁዳቲ ዩሱሳ ዋዳናሰ ማቄቲዳ
(ማር 14:1-2፤ ሉቃ 22:1-2፤ ዮሃ 11:45-53)

1-2 ዩሱሲ ሄሳ ሃሳዩ ዉርሲዳፔ ጉዬ ባና ካሊዛይታሰ “ናሞቡ ጋላሳፌ ጉዬ ፓዚጋ ጊዲዳይሳ ኤሬቲ? ኣሳ ናይ ካቄታናሰ ኣዲ ኢሜታና” ጊዳሰ። *

3-4 ሄሳፌ ጉዬ ቄሴታ ሃላቃቲኔ ዳሬ ጨማቲ ቃያፋ ጌቴቲዛ ቄሴታ ሃላቃ ጌቤን ሺቂዲ ሂላራ ዩሱሳ ኦይሉዲ ዋዳናሰ ማቄቲዳ። 5 ጊዳ ኣቲን “ኣሳ ጊዳን ኦሺ ዴንደንታ ማላ ባዓሌ ጋላሰ ጊዳፖ” ጊዲ ቃቸዳ።

ዩሱሳ ሺቶ ቲዩዳ ማጫሳዮ
(ማር 14:3-9፤ ዮሃ 12:1-8)

6 ዩሱሲ ቢታኒያን ኢንቸራቻ ሃርጌራ ዲዛ ሲሞና ጌቴቲዛዳ ሶን ዲሺን፥ 7 ኢሲ ማጫሲ ዲዛራ ዋጋይ ኬሂ ኣልዎ ጊዲዳ

* 25:46 ዳኔ 12:2 * 26:1-2 ኬሳ 12:1-27

አልባሰደርሴ ጌቴተዛ ሺቶ ቢልቃፄ ኩሜል ኦይካዳ ዩሱሳኮ ሺቃዳ ኢዚ ማዳን ኡቴዲሺን ኢዛ ሁዔ ቦላ ሺቶዛ ጉሳዲሰ።
** 8 ኢዛ ካሊዛይቲ “ሄሳ ቤዩዲ ሃይሲ አዛሰ ማላ ሞሬቴዜ?
9 ሺቶዚ ዳር ዋጋሰ ባይዜቲዲ ሚሻይ ማንቆታሰ እሜቴዛኮቺ?” ጊዳ።

10 ዩሱሲ ሄሳ ኤሪዲ “ሃኖ ማጫሳዮ አዛሰ ዋይሴቲ? ኢዛ ታሰ ሎ? ኦላዲሰ። 11 ማንቆቲ ኡባ ዋዴ ኢንቴናራ ዴቴሰ፤ ታ ጊዲኮ ኡባ ዋዴ ኢንቴናራ ዲኬ ጊዴሰ። * 12 ኢዛ ሺቶዛ ታ ቦላ ጉሲዳይሲ ታና ሞጎሰ ገቢሳናሳ። 13 ታ ኢንቴሰ ቱሙጋይሰ፤ ሃይሲ ሚሺራቾ ቃላይ ሳባኬቴዛ አላሚ ዩሾን አዋንካ ኢዛ አሉዳይሲ ኢዞ ቆፊሲዛዝ ጊዲዲ ሃሳይታና” ጊዴሰ።

ዩሁዳይ ዩሱሳ አሉ ኢማናሰ ገጌቴዴሰ
(ማር 14:10-11፤ ሉቃ 22:3-6)

14 ሄሳፊ ጉዬ ታማኔ ናምዓታፔ ኢሶይ አሰቆርንቶ ዩሁዳ ጌቴተዛይሲ ቁሴታ ሃላቃታኮ ቢዲ፣ 15 “ታ ኢንቴሰ ኢዛ አላ ኢሚኮ ኢንቴ ታሰ አይ ኢማኔ?” ጊዴሰ። ኢሰቲካ ኢዛሰ ሄቹ ታሙ ቢራ ኢዛ ኩሾን ታዩቢ ኢሚዳ። * 16 ሄ ጋላሳፊ ሲሚዲ ዩሁዳይ ዩሱሳ ኢሰታሰ አሉ ኢማናሰ ኢንጄ ዋዴ ናገሼ ጋምዒዴሰ።

ጎዳ ካዎ
(ማር 14:12-21፤ ሉቃ 22:7-13፤ ዮሃ 13:21-30)

17 ኡኬላ ባዓሌ ጌቴተዛ ባዓሌ ጋላሰ ኢዛ ካሊዛይቲ ዩሱሳኮ ሺቁዲ “ኔ ፓዚጋ ማናሶ አዋን ገቢሳና ማላ ኮያይ?” ጊዳ።

18 ኢዚካ ኢሰታሰ ዛሪዲ ጌዴ ካታማ ቢዲ ኤቤሎ ጌቴተዛ አሰ “አሰታማሬይ ታ ዋዴይ ማቲዳ ገሽ ታና ካሊዛይታራ ፓዚጋ ታ ኔ ኬላን ቦንቻና ጊዴሰ፣ ጊዲ ዮቲቴ” ጊዴሰ። 19 ኢዛ ካሊዛይቲካ ዩሱሲ ኢሰታ አዛዚዳ ማላ ፓዚጋ ካዎ ገገሲዳ።

20 ጋዴይ ኦማርሲሺን ዩሱሲ ታማኔ ናምዓታራ ማዳን ኡቴዴሰ። 21 ኢሰቲ ሙሳን ዲሺን ኢዚ ኢሰታሰ “ታ ቱሙ ጋይሰ፤ ኢንቴፊ ኢሶይ አሉ ኢማና” ጊዴሰ።

22 ኢሰቲካ ኬሂ ሙዞቲዲ ታራን ታራን “ጎዶ ታኔሻ?” ጊዳ። 23 ኢዚካ ዛሪዲ “ታና አሉ ኢማናዴይ ኬሬን ታናራ ኩሾ ዩዲዛዴ። * 24 ኢዛ ገሽ ካሴ ፃፊቴዳይሳ ማላ አሳ ናይ ባና፤

* 26:7 አልባሰደርሴ ቦንቾ ሚሽ ኢዛፔ ኦሴቴዛ ቦላ አልፎ ሹቻ። * 26:7 ሉቃ 7:37-38 * 26:11 ዛሬ 15:11 * 26:15 ዛካ 11:12 * 26:23 ማዛ 41:9

ገደ ኣቲን ኣሳ ና ኣሌ ኢሚዛዴሰ ኣዩ-ኣና! ሄሳዴይ ዩሌቶንታ ኣቲዳኮ ኢዛሰ ሎጾኮሺን” ገዴሰ።²⁵ ኢዛ ኣሌ ኢማና ዩሁዳይ “ኣሰታማሬ! ታኔሻ?” ገዴሰ። ኢዚካ “ኤ፣ ኔ ገደ ማላ” ገዴሰ።

²⁶ ኢሰቲ ሙሳን ዲሺን ዩሱሲ ሚዛ ቁማፔ ኤኪዲ ኣንጂዴሰ። ማንሊዲኔ ባና ካሊዛይታሰ ኢሚዲ “ሄዩቴ ሚቴ፤ ሃይሲ ታ ኣሾኮ” ገዴሰ።²⁷ ቃሴካ ኡሻ ዴንሊዲ ጋላቲዲኔ ባና ካሊዛይታሰ ኢሚዲ “ዉሪካ ሃይሳፌ ኡዩቴ፤²⁸ ዳሮ ኣሳ ናጋራፔ ማራና ጉኪዛ ታ ኦራላ ጫቆ ሱላይ ሃይሳ። *²⁹ ታ ኢንቴሰ ገዛይ ታ ኣዎ ካዎቴላን ታ ኢንቴናራ ኦራላ ዎይኔን ኡሻዛ ኡያና ጋካናሰ ሃይሳፌ ሲንላን ሃይሳ ዎይኔ ኡሻ ኢንቴናራ ኡዩኬ” ገዴሰ።

³⁰ ማዛሙራ ዩጻዳፔ ጉዬ ፑዴ ዳብራዛይቴ ጌቴቲዛ ዙማ ቦላ ኬዚዳ።

ጳፅሮሲ ኢዛ ካዳናይሳ ዩሱሲ ካሴቴዲ ዮቲዴሰ
(ማር 14:27-31፤ ሉቃ 22:31-34፤ ዮሃ 13:36-38)

³¹ ዩሱሲ ኢሰታሰ “ኢንቴ ዉሪ ሃቺ ኦማርሲ ታናን ጳጳቴዲ ታና ዩጊ ባና፤ ሄሚዛይሳ ታ ሾጫና፤ ማሄቴኔ ላሌታና” ጌቴቲዲ ካሴ ሃፌቲዴሰ። *³² ገደ ኣቲን ታኒ ዴንዲዳፔ ጉዬ ኢንቴፌ ሲንላታዳ ጌዴ ጋሊላ ባና” ገዴሰ። *

³³ ጳፅሮሲ ዛሪዲ “ሃንኮይቲ ዉሪ ኔ ጌደን ጳጳቴኮካ ታኒ ሙሌካ ጳጳቴኬ!” ገዴሰ።³⁴ ዩሱሲካ ኢዛሰ ዛሪዲ “ቱሙ ጋይሰ፤ ሃቺ ቃማ ኩቶይ ዋሶንታ ካሴታዳ ሄሹቶ ኔ ታና ካዳና” ገዴሰ።³⁵ ጳፅሮሲ ቃሴ “ኔናራ ታ ሃይቃና ኮሺኮካ ሙሌካ ታ ኔና ካዲኬ!” ገዴሰ። ዩሱሳ ካሊዛ ሃንኮይቲካ ኩሜል ኢዛይሳላካ ገደ።

ጌቴሴማኔን ዩሱሳ ዎሳ
(ማር 14:32-42፤ ሉቃ 22:39-46)

³⁶ ሄሳፌ ጉዬ ዩሱሲ ባና ካሊዛይታራ ጌዴ ጌቴሴማኔ ጌቴቲዛሶ ቢዴሰ። ኢሰታካ “ሄ ባዳ ታ ዎሲሺን ኢንቴ ሃይሳን ኡቲሺቴ” ገዴሰ።³⁷ ጳፅሮሳራ ዛቢዳሳ ናይታ ናምዓታ ባናራ ኤኪ ቢዲ ሙዙቴሊኔ ዳሮ ቆፎ ኦይኪዴሰ።³⁸ ሄሳፌካ “ታ ሸምፖያ ሃይቃና ጋካናሰ ዳሮ ሙዙታዲሰ፤ ታናራ ሚኒዲ ሃኒን ታኪቴ” ገዴሰ።

* 26:28 ኬሳ 24:8፤ ኤር 31:31-34 * 26:31 ዛካ 13:7 * 26:32 ማቶ 28:16

39 ኢስታፌ ጉል ጌዴ ሃኪ ቢ ጉፓንዲ “ታ አዋዉ! ኔስ ደንዳዬቲኮ ሃይሲ ሜቶይ ታፔ አቶ፤ ጊዶ አቲን ታኒ ኮይዳ ማላ ጊዶንታ ኔኒ ኮይዳ ማላ ሃኖ” ጊ ዋሲዴስ። 40 ሃሳፌ ሲሚዲ ባና ካሊዛይታኮ ዩዲ ኢስቲ ቋስኪሺን ደሚዴስ። ጳፀርሳካ “ሃይቶ አሳቶ! ኢንቲ ታናራ ኢሲ ሳቴኮኔ ሚናናስ ያኒዴ? 41 ፓጩን ኢንቲ ጌሎንታ ማላ ሚኒዲ ዋሲቲ፤ አያናይ ጊጌቲዴስ ሺን አሾይ ጊዲኮ ዳቡራንቻ” ጊዴስ።

42 ቃሴካ ናምዓንሉ ቢዲ “ታ አዋዉ! ሃይሳ ኡያናሲ ታስ አቶንታ ሚሽ ጊዲኮ ኔ ሸኔይ ፖሌቶ” ጊዲ ዋሲዴስ። 43 ቃሴካ ኢዚ ዩሺን ኢስታ አይፌን ቋስኮይ ዳዲዲ ጊሽ ኢቺዳይታ ቤዩዴስ። 44 ኢስታ አጊዲ ቃሴካ ቢዲ ሄቸንሉ ካሴ ዋሲዲ ቃላ ዛሬ ዋሲዴስ።

45 ሃሳፌ ባና ካሊዛይታኮ ሲሚዲ “ሃዒካ ሸምፕዲ ቋስኪዴቲ? ሄኮ ሃዒ ሳቴይ ማቲዴስ፤ አሳ ናይ ናጋራንቻታ ኩሺን አቋ ኢሜታና። 46 ዴንዲቲ አኔ ቦስ! ታና አሌ ኢሚዛዴይ ዩሳ ቦላ ዴስ” ጊዴስ።

ዩሱሲ ኦይኬቲዴስ
(ማር 14:43-50፤ ሉቃ 22:47-53፤ ዮሃ 18:3-12)

47 ኢዚ ሃሳዩሺን ታማኔ ናምዓታፔ ኢሶይ ዩሁዳይ ዩዴስ። ቁሴታ ሃላቃቲኔ ዴሬ ጨማቲ ዩዲዳ ዳር አሳይ ቶራኔ ዲርቃ ኦይኪዲ ዩሁዳራ ኢሲፌ ዴስ። 48 ዩሁዳይካ “ታ ዩሪዛዴይ ኢዛ ጊዲዳ ጊሽ ኦይኪቲ” ጊዲ ካሴ ዮቲ ዋሊዴስ።

49 ሲቲ ጊ ዩሱሳኮ ቢዲ “አስታማሬ! ሳር” ጊሹ ዩሱሳ ዩሪዴስ። 50 ዩሱሲካ “ታ ላጌ! ኔ ዩዳ ቆፋ ፖላ” ጊዴስ። ሄራካ አሳይ ሸቁቲዲ ዩሱሳ ኦይኪዲ ቃቺዴስ። 51 ዩሱሳራ ዲዛይታፔ ኢሶይ ገላ ማሻ ሾዲዲ ቁሴታ ሃላቃዛ አሽካራ ሃይላ ቃንዲዴስ።

52 ዩሱሲካ “አኔ ኔ ማሻ ኮሆን ዛራ ጌልላ፤ ማሻ ሾዲዛይቲ ማሻን ቋያና። 53 ኮሺኮ ታኒ ታ አዋ ኦይቺዛኮ ዳር ሺዬን ቆዴቲዛ ኦሊዛ ኪታንቻ ታስ ዩዶንታ አጋና ሚሳቲዜ? 54 ሃሳሉ ኦሊኮ ቃሴ ጌሻ ማፃፋታን ሃናና ጌቲቲዳይሲ ዋኒ ፖሌታኔ?” ጊዴስ።

55 ሄ ዋዴ ዩሱሲ አሳ “ፓንጋ ኦይኪዛ አሳሉ ማሻኔ ዲርቃ ኤኪዲ ታና ኦይካና ዩዴቲ? ዋንቲን ዋንቲን ያሳ ኬላን ኡታዳ ታ ታማርሲሺን ካሴ ኦይኪቤኬታ ሺን። * 56 ጊዶ አቲን ሃይሲ

* 26:55 ሉቃ 19:47፤ 21:37

ወሪካ ሃኒዳይሲ ካሴ ናቤቲ ጌሻ ማፃፋታን የተዳይሲ ፖሌታናሳ” ጌዴስ። ሄ ዎዴ ዩሱሳ ካሊዛይቲ ኢዛ ዩጊዲ ጳዳዲ።

ዩሱሲ ፒርዳ ዲላታ ሲንሐ ኣጲዴስ

(ማር 14:53-65፤ ሉቃ 22:54-55፣63-71፤ ዮሃ 18:13-14፣19-24)

57 ሄ ዎዴ ዩሱሳ ኦይኪዲ ኣሳቲ ሙሴ ዎጋ ኣስታማሬቲኔ ዴሬ ጨማቲ ኢሲፌ ሸቁዳሶን ቄሴታ ሃላቃ ቃያፋኮ ኤፊዳ። 58 ጌዶ ኣቲን ጳፅርሲ ቄሴታ ሃላቃ ጊቤ ጋካናሰ ሃሆራ ዩሱሳ ካሊዴስ። ጊቤ ጌዶ ጌሊዲ ሃኒዛይሳ ወርሴሐ ቤያናሰ፣ ጊቤ ናጊዛይታራ ኡቲዴስ።

59 ሄ ዎዴ ቄሴታ ሃላቃቲኔ ኣይሁዲታ ዲላታይ ኩሜሐ ዩሱሳ ዎጲሳናሰ ዎርዶ ማርካ ኮዩዴስ። 60-61 ዎርዶ ማርካቲ ዳርቲ ሸቁኮካ ቤሲዛ ማርካቴሐ ዴሚቤቴና፤ ጌዶ ኣቲን ጉዩፔ ናምዑ ኣስ ዳይቲ ሸቁዲ “ሃይሲ ኣዴዚ ‘ታ ያሳ ኩላ ላላዳ ሄሹ ጋላሳራ ዛራዳ ኬፃና ዳንዳያይሰ’ ጌዴስ” ጌዲ ማርካቲዳ። *

62 ሄሳ ሲዩዳ ቄሴታ ሃላቃይ ኡቴላፌ ዴንዲ ኡቁዲ “ሃይቲ ኣሳቲ ኔ ቦላ ማርካቲዛይሳሰ ኣይኮካ ዛሪኪ?” ጌዴስ። 63 ዩሱሲካ ጮዑ ጌዴስ። ቄሴታ ሃላቃይ “ታ ኔና ዴዎ ያሳ ሱንላን ኦይቻይሰ! ኔኒ ኪርሰቶሳ፣ ያሳ ና ጌዲኮ ታስ የታ!” ጌዴስ።

64 ዩሱሲካ “ኔ ጎይሳካ ማላ፤ ጌዶ ኣቲን ኢንቴሰ ኡባሰ ታ የተዛይ ሲንላፌ ኣሳ ናይ ዎልቃማዛ ኡሻቻን ኡቲዲ ሳሎ ሻራራ ዪዛ ዎዴ ኢንቴ ቤያና” ጌዴስ። *

65 ሄ ዎዴ ቄሴታ ሃላቃይ ባ ማይዎ ዳኪዲ “ያሳ ቦላ ጫሻ ቃላ ሃሳዩዴስ፤ ኑሰ ሃይሳፌ ኣጲዛ ሃራ ኣዛ ማርካ ኮሺዜ! ያሳ ቦላ ጫሻ ቃላ ኢዚ ሃሳዩሺን ኢንቴ ኢንቴ ሃይላራ ሲዩዴታ። 66 ኢንቴሰ ኣይ ሚሳቲዜ?” ጌዴስ። ኢስቲካ ዛሪዲ ኢዛሰ “ሃይቆይ ቤሴሰ” ጌዲ።

67 ሄ ዎዴ ዩሱሳ ኣይፌሶን ጨቲሽ ኢጨዳ፤ ባጋይቲ ባቂሹ፣ 68 “ኪርሰቶሳ! ኔ ኔና ናቤ ጋሳሺን ኔና ባቂዳይ ኦናኮኔ ኣኔ ኑሰ የታ” ጌዲ።

ጳፅርሲ ዩሱሳ ካዲዴስ

(ማር 14:66-72፤ ሉቃ 22:56-62፤ ዮሃ 18:15-18፣25-27)

* 26:60-61 ዮሃ 2:19 * 26:64 ዳኔ 7:13

69 ሄሳፌ ጉዬ ጳጳሮሲ ቁሴታ ሃላቃ ገቤን ኡቲ ዲሺን ኢሲ ኩላ ገደን ኦሊዛ ማጫሰ ዲዛራ ኢዛኮ ሺቃዳ “ኔኒካ ጋሊላ ዩሱሳራ ዲዛዳ!” ገደሰ።

70 ኢዚ ቃሴ “ኔ ኣይ ገዛኮኔ ታ ኤሪኬ!” ገዲ ኡባ ኣሳ ሲንሳን ካዲዳሰ። 71 ገቤዛፔ ኬዚዛ ፔንጌ ኢዚ ቢሺን ኢሲ ሃራ ኦሳንቻያ ኢዛ ፃላዳ ሄን ጋዳን ዲዛይታሰ “ሃይሲ ኣዳዚ ናዚሬቲ ዩሱሳራ ዲዛዳኮ!” ገደሰ።

72 ኢዚካ “ታ ኢዛ ኤሪኬ!” ገዲ ናምዓንሖ ካዲዳሰ። 73 ጉላ ጋምዲሺን ሄን ኤቂዳ ኣሳቲ ሺቂዲ ጳጳሮሳ “ኔ ሃሳያይ ኔ ሃይታራ ዲዛይሳ ቆንጨሴሰ፤ ቱማፔ ኔ ኢሰታ ባጋ ኣሳ” ገደ። 74 ኢዚካ ጫቂሺኔ ኣማተሼ ሄሳ ኣዳዛ “ታ ኤሪኬ!” ገደሰ። ሄራካ ኩቶይ ዋሲዳሰ።

75 ሄሳ ዋዴ ዩሱሲ ካሴ ጳጳሮሳሰ “ኩቶይ ዋሳናሰ ኔ ታና ሄቸቶ ካዳና” ገዲ ዮቲዳ ቃላይ ቆሬቲን፣ ጳጳሮሲ ካሬ ኬዚዲ ጫሞ ዩሆ ዩኪዳሰ።

27

የሁዳይ ካቂቲ ሃይቂዳሰ (ማር 15:1፤ ሉቃ 23:1-2፤ ዮሃ 18:28-32)

1 ማላዶ ዋንታራ ቁሴታ ሃላቃቲኔ ዳሬ ጨማቲ ዉሪካ ዩሱሳ ዋቆና ኣጌ ዘሬቲዳ። 2 ዩሱሳ ቃቺ ኤፊዲ ጋዜ ጲላዶሳሰ ኣሉ ኢሚዳ።

3-4 ኢዛ ኣሉ ኢሚዳ የሁዳይካ ዩሱሳ ቦላ ፐርዴቲዳይሳ ቤዩዲ “ኣላ ኢሞንታ ኣጋርኪና” ገዲ ባ ኤኪዳ ሄቸ ታሙ ቢራ ቁሴታ ሃላቃታሲኔ ዳሬ ጨማታሰ ዛሪ ኢሚዲ “ጂሎ ኣሰ ኣላ ኢሚዳ ገሽ ታ ሞራዲሰ” ገደሰ። ኢሰቲካ “ሂሰቲን ኑሰ ኣይ ሜቶ! ኔ ኤራ ኤካ!” ገደ። 5 ሄሳ ገሽ የሁዳይ ቢራ ኤፊዲ ዶሳ ኩላ ገደን ዩጌዲ ኬዚ ቢዲ ጨሌቲ ሃይቂዳሰ።

6 ቁሴታ ሃላቃቲ ቢራ ዳንሉዲ “ሱላ ዋጋ ገዲዳ ገሽ ዶሳ ኩላ ሚሻን ጉጃናሰ ቤሴና” ገደ። 7 ባ ገደን ዘሬቲዲ ኢማላ ገዲዳ ኣሳታሰ ዱፎ ገደና ማላ ኢሲ ኡርቃ ሚሽ ሜጲዛ ሂላዛ ጋዴ ሻሚዳ። 8 ሄሳ ገሽ ሄ ጋዴይ ሃቺ ጋካናሰ ሱላ ጋዴ ጌቲቲሰ።

9-10 ኢዛሰ ዋጋ ገደና ማላ “ኢሰራዔሌ ናይቲ ሄሪገዲ ሄቸ ታሙ ቢራ ቆዲ ኤኪዳ። ዶሲ ታና ኣዛዚዳ ማላ ኡርቃ ሜጲዛ ሂላዛ ጋዴሰ ኢሚዳ” ጌቲቲዲ ናቤ ኤርማሳ ዱናን ዮቲቲዳይሲ ፖሌቲዳሰ።

ዩሱሲ ጲላዎሳ ሲንጻጎ

(ማር 15:2-5፤ ሉቃ 23:3-5፤ ዮሃ 18:33-38)

11 ሄ ዎዴ ዩሱሲ ዳሬ ሃሪዛይሳ ሲንጻ ሽቂዳስ። ዳሬ ሃሪዛይሲካ “ኔኒ ኣይሁዳ ካዎ?” ጊዲ ኦይቺዳስ። ዩሱሲካ “ኔ ጊዳ ማላ ጊዳ” ጊዳስ። 12 ቁሴታ ሃላቃቲኔ ዳሬ ጨማቲ ኢዛ ሞቲሺን ዩሱሲ ኢስታስ ኣይኔ ዛሪቤና። 13 ሄ ዎዴ ጲላዎሲ ዩሱሳ “ኣፑን ዮዖን ኔና ሞቲዛኮኔ ሲዩኪ?” ጊዳስ። 14 ዳሬ ሃሪዛይሲ ኬሂ ማላሌታና ጋካናስ ዩሱሲ ኢሲ ቃላካ ዛሪቤና።

15 ዳሬ ሃሪዛይሳስ ባዓሌ ጋላስ ዳሬይ ቃሾ ኣሳፕ “ኤቤሎይ ኑስ ቢርሼቶ!” ጊ ኦይቺኮ ኢሳዳ ቢርሺዛ ዎጋይ ዳስ። 16 ሄ ዎዴ ጌኔ ኦሶን ኤሬቲዳ ባርባኔ ጌቲቲዛ ኢሲ ቃሾ ኣሲ ዳስ። 17 ዳሬይ ሽቂዳ ማላ ጲላዎሲ “ባርባኔፔኔ ኪርሰቶሳ ጌቲቲዛ ዩሱሳፔ ታ ኢንቴስ ኦና ቢርሻና ማላ ኮይቲ?” ጊዳስ። 18 ጲላዎሲ ኢስቲ ጮ ቃናቴስ ኣሉ ኢሚዳይሳ ኤሪሽ ኦይቺዳስ።

19 ኢዚ ፒርዳ ኣልጋ ቦላ ኡቲ ዲሺን ኢዛ ማቺያ “ኢዛ ጌደን ሃቺ ታኒ ኣጉሞራ ደር ሜቶታዲስ፤ ሄሳ ዪሎ ኣዳዛ ቦላ ኔ ኣይኮካ ኦሶንታ ማላ” ጊዛ ኪታ ጲላዎሳስ ዩዳዲስ።

20 ጊዳ ኣቲን ቁሴታ ሃላቃቲኔ ጨማቲ ኢስታስ ባርባኔይ ቢርሼታና ማላኔ ቃሴ ዩሱሳ ዎቆና ማላ ዎሳናስ ዳሬዛ ቃላይ ጋጋና ማላ ኦሊዳ። 21 ዳሬ ሃሪዛይሲ “ናምዓታፔ ኦና ቢርሻና ማላ ኮይቲ?” ጊ ኦይቺን፣ ኢስቲ “ባርባኔ ቢርሻ!” ጊዳ።

22 ጲላዎሲካ “ሂስቲኮ ኪርሰቶሳ ጌቲቲዛ ዩሱሳ ዎስቶ?” ጊዳስ። ዉሪካ “ካቂቶ!” ጊዳ።

23 ጲላዎሲካ ኣይሲ? “ኣይ ኢታ ኦሊዳ?” ጊዲ ኢስታ ኦይቺዳስ። ኢስቲካ ቃሴ ኬሂ ዎሲዲ “ካቂቶ!” ጊዳ። 24 ጲላዎሲ ሃኒዛይሲ ዉሪካ ኣሳይ ባ ጊደን ቡልዓኬቴጻፌ ኣቲን ሃራ ኣይ ጎዓይ ባይንዳይሳ ዩሺ ዪሊዲ “ሃይሳ ኣዳዛ ሱጻ ጎሜፔ ታ ጌሻ፤ ሃይሳፌ ጉዬ ኢንቴ ሽኔ” ጊዲ ሃሉ ኤሂሲዲ ዳሬዛ ሲንጻን ባ ኩሽ ሜጨቲዳስ። *

25 ዳሬይ ዉሪ “ኢዛ ሱሉ ኑ ቦላኔ ኑ ናይታ ቦላ ጋኮ” ጊዲ ዛሪዳስ። 26 ሄ ዎዴ ባርባኔ ኢስታስ ቢርሺዲ ዩሱሳ ጋራፊሲዳፔ ጉዬ ካቃና ማላ ኣሉ ኢሚዳስ።

ዎታዳራቲ ዩሱሳ ቦላ ቂሊጨዳ
(ማር 15:16-21፤ ዮሃ 19:2-3)

* 27:24 ዛሬ 21:6-9

27 ሃሳፌ ዋታዳራቲ ዩሱሳ ጌዴ ዴሪ ሃሪዛይሳ ጊቤ ኤኪ ቢዲ ዉሪ ሸቆዲ ዩሱሳ ጊዶ አሉዳ። 28 ኢዛ ማይያ ቃሪዲ ሃሪ ዘያ ማይያ ማይዚዳ። 29 አጉንሳ አክሊሌ ፃዒዲ ጊጊሲዳ፤ ኢዛ ሁዔ ቦላ ዋሉዳ፤ ሸምቦቆ ጉፌ ኡሻቻ ኩሼን ኦይሉዲኔ ኢዛ ሲንሳን ጉልባቲዲ “አይሁዳ ካዎ! አንቴስ ቶ!” ጊዲ ኢዛ ቁጂዳ። 30 ኢዛ ቦላ ጨቲዳ፣ ሸምቦቆ ጉፌዛ ኢዛ ኩሼፔ ኤኪዲ ዩሱሳ ሁዔን ዛሪ ዛሪዲ ሸጪዳ። 31 ኢዛ ቦላ ቁጂ ካዒዲይሳፌ ጉዬ ቃሴካ ዘያ ማይያዛ ቃሪ ኤኪዲኔ ካሴ ኢዛ ማይያዛ ዛሪ ማይዚዲ ካቃናሶ ኤኪ ቢዳ።

ዩሱሳ ካቄቴሳ

32 ኢስቲ ኤኪ ቢሺን ቃሪና ጌቲቲዛሶፔ ዪዳ ሲሞና ጌቲቲዛይሳ ዴሚዲ ማስቃሌዛ ኢዛ ዋልቃራ ቶሲዳ። 33-34 ቢርሼቻይ “ሁዔ ጉጌ” ጌቲቲዛ ጎልጎታ ጋኪሺን ጨዬራ ዋላኩቲዳ ዋይኔ ጨጃ “ኡያ” ጊዲ አሚዳ፤ ጊዶ አቲን ኢዚ ጋንዒ ኤኪዲ ኡያና ኮይቤና። * 35 ኢዛ ካቁዳፔ ጉዬን ኢዛ ማይያዛ ቦላ ሳማ ዩጊዲ ጊሼቲዳ። 36 ሄን ኡቲዲ ኢዛ ናጊዳ። 37 “ሃይሲ አይሁዳ ካዎ ዩሱሳ” ጊዛ ሞቶ ቃላ ኢዛ ሁዔፔ ቦላራ ዋሉዳ። 38 ናምቡ ዋምባዴታፔ ኢሶይ ዩሱሳፔ ኡሻቻ ባጋራ፣ ኢሶይ ሃዲርሳ ባጋራ ኢዛራ ኢሲፌ ካቄቴዳ።

39-40 ኦጌራ አጂ ቢዛ አሳይ ጫዩሼኔ ሁዔ ቃሉሼ * “ፆሳ ኩላ ላላዳ ሄቹ ጋላሳን ሃራ ኩፃና ጊዛይሶ! አኔ ኔና አሻ፣ ኔ ፆሳ ና ጊዲኮ አኔ ማስቃሌ ቦላፌ ዋቻ” ጊዳ። *

41 ቄሴታ ሃላቃቲ ዴሬ ጨማታራ ጊዲዲ ኢዛ ቦላ ቁጂሼ፤ 42 “ሃራ አሳ አሺዴስ ሺን ባና አሻናስ ዳንዳይቤና፤ ኢዚ ኢስራዔሌ ካዎ ጊዲኮ አኔ ሃዒ ማስቃሌ ቦላፌ ዋቻ፤ ኑካ ኢዛ አማናና። 43 ፆሳን አማኔቲዴስ፤ ባና ፆሳ ና ጊዳ ማላ ፆሲ ኢዛ ዶሲዛ ጊዲኮ አኔ ሃዒ ኢዛ አሸ” ጊዳ። * 44 ኢዛራ ኢሲፌ ካቄቴዳ ፓንጋቲካ ሃሳላ ጫሻ ቃላ ኢዛ ቦላ ቆቆፊዳ።

ዩሱሳ ሃይቆ

(ማር 15:33-41፤ ሉቃ 23:44-49፤ ዮሃ 19:28-30)

45 ጋላሳፌ ኡሱፑን ሳቲፔ ቢዲ ኡዱፋን ሳቲ ጋካናስ ኩሜላ ቢታይ ቶሚዴስ። 46 ኡዱፋን ሳቲ ጊዲሺን ዩሱሲ ቃላ ቶቁ ሂሰቲዲ “ኤሎሄ! ኤሎሄ! ላማ ሳባቂታን” ጊዲ ዋሲዴስ። ሄሳ

* 27:33-34 ማዛ 69:21 * 27:39-40 ማዛ 22:7፤ 109:25 * 27:39-40 ማቶ 26:61፤ ዮሃ 2:19 * 27:43 ማዛ 22:8

ጉሳሰ ቢርሼላይ “ታ ያሱ! ታ ያሱ! ታና ኣይሲ ኣጋዲ?” ጉሳ። *
 47 ሄን ጋዲን ኤቁዳ ኣሳታፔ ኢሲ ኢሲ ኣሳቲ ኢዛ ዋሶዛ ሲይዲ
 “ኤላሳ ያይጌሰኩ!” ጊዳ። 48 ኢስታፌ ኢሳዳይ ዋዲ ቢዲ ዛንቫ
 ሚሳቲዛ ሴፊንጌ ጌቲቲዛ ሚሽ ኤኪዲ ጫሊዳ ዋይኔ ጫጃን
 ዩጊ ጫዲሲዲኔ ሾምቦቆ ጌቲቲዛ ሚሳ ያራን ቃጲዲ ኡያና ማላ
 ዩሱሳ ዲናኮ ሺሺዳሰ። * 49 ሃንኮ ኣሳይ ቃሴ “ኣጋጊቲ ኣኔ፥
 ኤላሲ ዩዲ ኢዛ ኣሺን ቤያና” ጊዳ። 50 ዩሱሲ ቃሴካ ጵቃ
 ቃላን ዋሲዲ ሺምፖ ኬዚዳሰ።

51 ሄ ዋዴ ያሳ ኬላ ማጋላሻይ ቦላ ሁዔራ ዲጌ ሰሚ
 ዳኬቲዲ ናምዑ ኬዚዳሰ፤ ቢታይ ቃዲዳሰ፤ ዛላቲ ዛዒዳ።
 * 52 ዲፎቲ ደዩቲዳ፤ ካሴ ሃይቁዳ ያሳ ኣሳፔ ዳር ባጋይ
 ዴንዲዳሰ። 53 ዲፎፔ ኬዚዲ ዩሱሳ ዴንላፌ ጉዬ ጌዬ ጌሻ
 ካታማ ጌሊዲ ዳርታ ኣይፊን ቤቲዳ። 54 ማቶ ሃላቃይኔ ኢዛራ
 ኢሲፌ ዩሱሳ ናጊዛይቲ ቢታ ቃላኔ ሃኒዳይሳ ወርሲ ቤዩዲ ዳር
 ባቢዳ። ቃሴ “ሃይሲ ቱማፔ ያሳ ናኮ!” ጊዳ። 55 ጋሊላፔ ዩዲ
 ዩሱሳ ኮሺዛዛን ኦሲ ማዳናሰ ካሊዛ ዳር ማጫሳቲ ሃኒዛይሳ
 ወርሲካ ሃሆራ ያሊሽ ሄን ዴቲሰ። 56 ኢስታ ጊዳን ማግዳሌፔ
 ዩዳ ማራሚራኔ፥ ያቆቤኔ ዮሴፌ ኣዮ ማራሚራ፥ ቃሴካ ዛቢዳሳ
 ናይታ ኣዩዩራ ኢሲፌ ዴቲሰ።

ዩሱሲ ሞጌቲዳሰ
 (ማር 15:42-47፤ ሉቃ 23:50-56፤ ዮሃ 19:38-42)

57 ጋይይ ኦማርሲሺን ዮሴፌ ጌቲቲዛ ኢሲ ዲሬ ኣዴ ዳይሲ
 ኣርማቲያሳ ጌቲቲዛሶፔ ዩዳሰ። ኢዚካ ባ ባጋራ ዩሱሳ ካሊዛዴ።
 58 ኢዚ ጲላያሳ ሲንሉ ሺቁዲ ዩሱሳ ኣሃ ኢዛሰ ኢማና ማላ ዋሲን
 ጲላያሲካ ኢዛሰ ኢማና ማላ ኣዛዚዳሰ። 59 ዮሴፌይ ኣሃ ኤኪዲ
 ጌሺዛ ሞሳ ኣፋላን ፃዲዳሰ። 60 ሹቕ ዋጪዲ ባሲ ጊጊሲዳ
 ዲፎን ኤፊ ዋሊዲ ጊታ ሹቕ ጌንዳርሲዲ ዲፎዛ ጎርዲዳሰ።
 61 ሄሳ ዋዴ ማግዳሌ ማራሚራኔ ሃራ ማራሚራ ዲፎዛ ጊናን
 ኡቲዳ።

62 ሳምባታሰ ጊጌቲዛ ዋንቴላ ጋላሰ ቄሴታ ሃላቃቲኔ ፋርሳዌቲ
 ጲላያሳ ሲንሉ ሺቁዲ፥ 63 “ጎዶ! ሄ ዋርዶይ ካሴ ፓዳ ዲሹ ሄቭ
 ጋላሳፌ ጉዬ ታ ዴንዳና፣ ጊዳ ቃላይ ኑ ዋዝናን ቱርቕ ጊዳሰ። *
 64 ሄሳ ጊሽ ኢዛ ካሊዛይቲ ኢዛ ኣሃ ካይሶቲ ኤኪዲ ዴሬሰ ኣዚ

* 27:46 ማዛ 22:1 * 27:48 ማዛ 69:21 * 27:51 ኬሳ 26:31-33
 * 27:63 ማቶ 16:21፤ 17:23፤ 20:19፤ ማር 8:31፤ 9:31፤ 10:33-34፤ ሉቃ
 9:22፤ 18:31-33

ሃይቆፔ ዴንዲዴስ፣ ገዲ ዋሪሶንታ ማላ ሄቫንላ ጋላስ ጋካናስ ዲፎይ ናጌታና ማላ አዛዛ፤ አካይ ገኮ ካሴይሳፌ ጉዬ ባላይ አዲሳ ገዳና” ገዳ። 65 ጲላዎሲ “ኢንቴስ ናጌዛይቲ ዴቴስ፤ ቢዲኔ ኢንቴስ ኤሬቲዳ ማላ ናጌሲቲ” ገዳስ። 66 ኢሰቲካ ቢዲ ዲፎዛ ዲና ማታሜን ጎርዲዲ ናጋና ዛቤ ኤሲዳ።

28

ዩሱሲ ሃይቆፔ ዴንዲዴስ

(ማር 16:1-8፤ ሉቃ 24:1-12፤ ዮሃ 20:1-10)

1 ሳምባታይ አዲዳፔ ጉዬ ሳሚንታፔ ኮይር ጋላስ ቡር ሳሎይ ዘዲሺን ማግዳሌ ማራማኔ ሃራ ማራማ ዲፎዛ ቤያና ቢዳ።

* 2 ቆፖንታ ዲሺን ገታ ቢታ ቃሊ ሃኒዴስ፤ ጎዳ ኪታንቻይካ ሳሎፔ ዋዲ ዲፋኮ ቢዲ ሹቻ ጌንዴርሲዲ ኢዛ ቦላ ኡቲዴስ።

3 ኪታንቻስ ሜዳይ ዋልቃንሳ ፖፖ ማላ፤ ማይያይካ ሻቻ ማላ ቦላ። 4 ዲፎ ናጌዛይቲ ኪታንቻዛስ ባቢዲ ኮሪዲኔ ሃይቆላ ሚሳቲዳ።

5-6 ኪታናቻይ ማጫሳታ “ባቦፍቴ፤ ኢንቴ ካቄቲዳ ዩሱሳ ኮዩዛይሳ ታ ኤራይስ፤ ኢዚ ሃዲ ሃን ባዋ፤ ኢዚ ካሴ ዮቲዳ ማላ ሃይቆፔ ዴንዲዴስ፤ ሃ ዩዲ ኢዚ ኢቸዳሶ ቤይቲ። 7 ሃዲካ ኤሌሊ ቢዲ ኢዛ ካሊዛይታስ ‘ሃይቆፔ ዴንዲዴስ። ኢንቴፌ ካሴቲዲ ጋሊላ ቤስ፤ ኢንቴ ኢዛ ሃን ዴማና’ ገዲ ዮቲቲ። ሃዳ ታ ኢንቴስ ዮታዲስ” ገዳስ። 8 ማጫሳቲካ ባቦኒኔ ኡፋይሳን ኩሚዲ ኢዛ ካሊዛይታስ ዮታናስ ኤሌሊዲ ዋላን ዲፎይ ዲዛሶ ዩጌ ኢጌዲ ቢዳ።

9 ሃራካ ዩሱሲ ኢስታ ዴሚዲ “ሃይቶ ሳሮ” ገዳስ። ኢሰቲካ ዩሱሳኮ ሸቂዲኔ ኢዛ ቶሆ ኦይኪዲ ኢዛስ ጎይኒዳ። 10 ዩሱሲ ኢስታ “ባቦፍቴ! ቢዲኔ ኢስቲ ጋሊላ ባና ማላ ታ ኢሻታስ ዮቲቲ። ኢስቲ ታና ሃን ቤያና” ገዳስ።

ናጌዛይታ ማርካቴላ

11 ማጫሳቲ ቡር ኦኔ ቦላ ዲሺን ናጌዛይታፔ ጉላ ባጋቲ ካታማ ቢዲ ሃኒዲይሳ ዉርሲ ቄሴታ ሃላቃታስ ዮቲዳ። 12-13 ቄሴታ ሃላቃቲካ ዴሬ ጨማታራ ሸቄቲዲ ዘሬቲዳ፤ ዋታዳራታስ ገዲዛ ሚሽ ኢሚዲ “ ኾኒ ዲሲኪዳሺን ኢዛ ካሊዛይቲ ቃማራ ዩዲ ካይሶቲ ኤፊዳ’ ጌቲ ገዳ። 14 ሃይሲ

* 28:1 ሳምባታ ሃይሳ ቦላ ሳምባታይ ቄራ ጋላሳ።

ዎሬይ ዳሬ ሃሪዛይሳ ማታን ሲዬተኮካ ኑኒ ኢዛሰ ሎዔሊ ዮታና፤ አይኮ ኢታይካ አንቴ ቦላ ጋኮንታ ማላ ኑ ኦላና” ገዳ።
15 ዎታዳራቲካ ሚሻ ኤኪዲ ኢሰቲ ገዳ ማላ ኦሊዳ፤ ሃይሲ ዮዖዚ ሃቺ ጋካናሰ አይሁዳታ አቻን ዳርሶን ዮቴቲሼ ዳሰ።

ዬሱሲ ባና ካሊዛይታ አይፊን ቤቲዳሰ
(ማር 16:14-18፤ ሉቃ 24:36-49፤ ዮሃ 20:19-23፤ ሃዋ

1:6-8)

16 ሄሳፊካ ዬሱሳ ካሊዛ ታማኔ ኢሲኔቲ ዬሱሲ ኢሰታ ቤሲዳ ጋሊላን ዲዛ ዙማ ቦላ ኬዚዳ። 17 ዬሱሳ ቤዩዳ ማላ ኢዛሰ ጎይኒዳ፤ ኢሰታ ጋራሳፊ ጉዲዛ ባጋቲ ሲዲዳ።

18-20 ዬሱሲካ ባና ካሊዛይታኮ ሸቂዲ “ሳሎኒኔ ሳዓን ጎዳቴሌ ታሰ ኢሜቲዳሰ። ሄሳ ገሽ ቢዲ ዳሬ ኡባ አዎ፤ ናዛኔ ዲሎ አያና ሱንሳን ፃማቂሼ፤ ታና ካሊዛይታ ኦሊቴ፤ ታ ኢንቴና አዛዚዳይሳ ዉርሲ ናጋና ማላ ታማርሲቴ። ታካ አላሜ ዉርሴሌ ጋካናሰ ታ ኢንቴናራ ዳይሰ” ገዳሰ። *

* 28:18-20 ሃዋ 1:8

ኑራሳ ጩቆ ማፃፋ ንሞሉ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source
files dated 29 Jan 2022
dffa0cbb-5f77-5875-bf95-f4176677af45